

शमूएलया न्हापांगु सफू म्हसीका

शमूएलया न्हापांगु सफुलिइ इस्राएल देशय् न्यायकर्तातयसु इलानिसें कयाः राजतन्त्रया ई तक जूगु हिउपाःया घटना च्वयातःगु दु। इस्राएलया राष्ट्रिय जीवनय् वःगु थ्व हिउपाःया इतिहासय् खास यानाः स्वम्ह मनूया मू थाय् दु, थुपिं खः –

शमूएल – तःधंपि न्यायकर्तात मध्ये दकलय् लिपायाम्ह न्यायकर्ता

शाऊल – इस्राएलया न्हापांम्ह जुजु

दाऊद – जुजु जुइ न्ह्यः वं याःगु बहादुर ज्याया बखान शमूएल व शाऊलया बखान नापं थःथवय् स्वानाच्चवंगु दु।

परमेश्वर प्रति विश्वास यायेबहः जुयाच्चन धाःसा ताःलाइ तर वय्कःया उजं पालन मयात धाःसा विनाश वइ। थ्व खँ परमेश्वरं पुजाहारी एलीयात धयादीगु वचनय् बांलाक धयातःगु दु। परमेश्वरं धयादी, “जितः हनाबना याइपिन्त जिं हनाबना याये अले जितः हेला याइपिन्त जिं हेला याये” २:३०।

थ्व सफुलिइ राजतन्त्र थापंया बारे थीथी बिचाः तयातःगु दु। इस्राएलीतयसं परमप्रभुयात हे इस्राएलया धात्वेंयाम्ह जुजु तायकिगु, तर परमप्रभुं मनूतयसं बिन्ति याःगुलि इमिगु नितीं छम्ह जुजु ल्ययादिल। इस्राएलया जुजु व प्रजातयसं परमेश्वरया शासनया अधीनय् व न्यायया अधीनय् थःगु जीवन हनीगु थुकिया मू खँ व सत्य खँ खः, २:७-१०। चीमिपिं व तःमिपिं सकसिगु अधिकार परमेश्वरया नियमकथं तया तयेमाःगु दु।

धलः पौ

शमूएल इस्राएलया न्यायकर्ता जूगु १:१-७:१७

शाऊल जुजु जूगु ८:१-१०:२७

शाऊल जुजु राज्य याःगु दैत ११:१-१५:३५

दाऊद व शाऊल १६:१-३०:३१

शाऊल व वया कायपिं स्यूगु ३१:१-१३

१ शमूएल

शमूएल बूगु

1 एफ्राइमया पहाडी देशयागु सूपया लागाया रामतैम शहरय् एल्काना नांयाम्ह छम्ह मनू दु। व यरोहामया काय, एलीहया छय, तोहया छुइ व सूपीया उइ खः। व एफ्राइम कुलयायाम्ह खः।

2 हन्नाह व पनिन्नाह नांयापि वया निम्ह कलाःपि दु। पनिन्नाहया काय्मह्याय्पि दु, हन्नाह धाःसा सुं मचाखाचा मदुम्ह खः।

3 एल्काना दैय्दसं दक्व शक्ति दुम्ह परमप्रभुया आराधना यायेत व बलि छायेत थःगु शहरं शीलौय् थाहां वनीगु खः। उबलय् अन एलीया निम्ह काय्पि परमप्रभुया पुजाहारीत होप्नी व पीनहास दु।

4 अले बलि छाइखुन्हु एल्कानां लाया छगू छगू ब्व थः कलाः पनिन्नाह व वया काय्पिन्त बीगु याइगु खः।

5 तर वं हन्नाहयात माया याइगुलि वं वयात छगू बांलाःगु ब्व बीगु खः, छायाःसा परमप्रभुं वयात सुं मस्त बियादीगु मदु।

6 वया मचाखाचा मदुगुलि हे हन्नाहया लिथुं वयात दुःख बीगु अले क्वहंकाः खँ ल्हाइगु खः।

7 दैय्दसं हे थथे याइगु खः। हन्नाह परमप्रभुया नापलायेगु पालय् वंक्वः पतिकं पनिन्नाहं हन्नाहयागु मन ख्वयकाबीगु अले व ख्वयाः नसा तकं मनसँ च्वनी।

8 वया भाःत एल्कानां वयात न्यनीगु, हन्नाह छ छाया ख्वयाच्चनागु? छाया छुं हे मनसँ च्वनाच्चनागु? छं छाया थुलिमछि दुःख ताय्काच्चनागु? छु जि छिमि झिम्ह काय् स्वयाः अप्वः मजू ला?

हन्नाह व एली

9 छकः शीलौमय् नयेत्वने यायेधुंकाः हन्नाह दन। उबलय् एली पुजाहारी परमप्रभुया नापलायेगु पालया ध्वाखाय् लिक्कसं थःगु थासय् च्वनाच्चंगु खः।

10 हन्नाहं ख्वख्वं तसकं दुःखी जुयाः परमप्रभुयात प्रार्थना यात।

11 हन्नाहं थथे धयाः परमप्रभुयात भाकल यात, “हे दक्व शक्ति दुम्ह परमप्रभु, छिं थः दासीयागु दुःख थुइकाः थः दासीयात माया यानागु खः धयागु जूसा, छिं थः दासीयात ल्वःमंका मदी धयागु खःसा, थः दासीयात छम्ह काय् बियादिसँ अले जिं वयात वयागु जिवंकाछिया निंति छितः बी अले वयागु छेनय् गुबलें ख्वःचा लाइ मखु।”☆

12 वं ताःई तक परमप्रभुया न्ह्यःने प्रार्थना याना हे च्वन। एली वयागु म्हुतु संगु खन।

13 हन्नाह मनमनं प्रार्थना यानाच्चंगु खः। अले वं म्हुतु संकूसां सः धाःसा पिहां मवः। अथे जुयाः एलीं बिचाः यात “श्व मिसा अय्लाखं काये धुंकल।”

14 अले एलीं वयात धाल, “छं अय्लाखं काय्काः जुइगु गुबलय् त्वःताछवयेगु? छं त्वनेगु त्वःताछव!”

15 हन्नाहं लिसः बिल, “अथे मखु, जिमि प्रभु! जि तसकं दुःखय् लाःम्ह मिसा खः। जिं छुं नं अय्ला त्वनागु मदु, जिं ला परमप्रभुया न्ह्यःने थःगु दुःख जक प्वंकागु खः।

16 छिं जितः ज्यालगय् मजूमह मिसा ताय्कादी मते। जिगु दुःख व कष्ट अप्वया वःगुलि प्रार्थना यानाच्चनागु खः।”

17 एली लिसः बिल, “याउँक हूँ, अले इस्राएलया परमेश्वरं छं वय्कःयाके प्वंगु खँ छन्त बियादीमा।”

18 हन्नाहं धाल, “सुभाय, जितः छिगु माया सदां दयाच्चनेमा।” अले व अनं वनाः छुं नसाः नल अले हाकनं दुखी जुइगु त्वःताछवत।

शमूएल बूगु

19 कन्हय् खुन्हु सुथ न्हापां दनाः एल्काना व वया परिवार परमप्रभुया आराधना यायेधुंकाः थःगु छँ रामाय् लिहां वन। अले एल्काना व वया कलाः हन्नाहया दथुइ लसपस जुल, अले परमप्रभुं हन्नाहयात लुमंकादिल।

20 थुकथं हन्नाहया प्वाथय् दत अले वं छम्ह काय् बुइकल। वं वयागु नां शमूएल* तल, अले धाल, “छाय्धाःसा जिं श्वयात परमप्रभुयाके प्वनागु खः।”

हन्नाहं शमूएलयात परमप्रभुयात लःल्हाःगु

21 एल्काना व वया परिवार दय्दसं परमप्रभुयात बलि छाः वनीगु ई थ्यंकः वल। अले थःम्हं यानागु भाकल पूर्वकेगु निंति थः परिवारनापं एल्काना परमप्रभुयात बलि छायेत थाहां वन।

22 थुपालय् हन्नाह धाःसा इपिं नापं मवं। अले थः भाःतयात धाल, “मचायात मांया दुरु त्वंकेगु त्वःतके धुंकाः जि वयात परमप्रभुया न्ह्यःने नापलायेगु पालय् यंकाः लःल्हाये व अन सदांया निंति च्वनीगु जुइ।”

23 वया भाःत एल्कानां लिसः बिल, “छन्त छु बांलाः व हे या। अले मचां दुरु त्वनेगु मत्वःतुतले छैय् हे च्वनाच्चँ। परमप्रभुं छं याःगु भाकल पूर्वकादीमा।” अथे जुयाः हन्नाह छँ हे च्वनाच्चन। थः काय् नं दुरु त्वनेगु मत्वःतुतले वयात सुसाःकुसाः यानाच्चन।

* 1:20 १:२० शमूएल अर्थात परमप्रभुं न्यनादिल

24 अनंलि वया कायूनं दुरु त्वनेगु त्वःतल, थःकाययात चिधिकःसां शीलैय पमरप्रभुया नापलायेगु पालय् यंकल। अले थःनापं स्वदँ दुम्ह द्रहं, छगू एपा† छुचुं, छगू छँगूया म्हिचाय् दाखमघ नं यंकल।

25 अले इमिसं द्रहंयात स्यात अले मचायात धाःसा एलीयाथाय् यंकल।

26 हन्नाहं वयात धाल, “हे जिमि प्रभु, गथे छि म्वाम्ह खः अथे हे छिगु न्ह्यःने दनाः परमप्रभुयात प्रार्थना यानाः वयाच्चनाम्ह मिसा जि हे खः।

27 थ्व हे काय्या नितिं जिं प्रार्थना यानागु खः अले जिं परमप्रभुयाके फ्वनागुकथं वय्कलं जितः बियादिल।

28 अथे जुयाः जिं थ्वयात परमप्रभुयात हे लःल्हाये। थ्व जिवंकाछिया नितिं परमप्रभुयाम्ह हे जुइ।” अले इमिसं अन परमप्रभुया आराधना यात।

2

हन्नाहया प्रार्थना

1 हन्नाहं थथे धकाः प्रार्थना यात,
 “परमप्रभुं जिगु मन तसकं लय्ताय्कादीगु दु,
 वय्कलं यानादीगु ज्या खनाः जि तसकं खुसी जुयागु दु।
 जि जिमि शत्रुतय् न्ह्यःने न्हिले,
 अले परमप्रभुं जितः ग्वाहालि यानादीगुलि जि तसकं लय्तायागु दु।

2 “परमप्रभु थें पवित्रम्ह
 सुं हे मदु, अले वय्कः थें ज्याःम्ह सुं हे मदु।
 झी परमेश्वर थें रक्षा याइम्ह मेपि सुं हे मदु।

3 “छं घमण्ड यायेगु त्वःताछ्व
 अले तःधंछुया न्वंवायेगु त्वःताछ्व।
 छायाःसा परमप्रभु फुक्क खँ स्यूम्ह परमेश्वर खः।
 अले मनूतय्सं याःगु फुक्क ज्याया न्याय यानादी।

4 “तसकं बल्लाःपिनिगु धनु त्वधुगु दु,
 तर लुफि हानाः क्वःदपिन्सं बल काये खंगु दु।

† 1:24 १:२४छगू एपा थ्व झिगू किलोग्राम ति खः

5 गाक्क दुपि नसाया निंति ज्यामि ज्या याना: जुइमाली,
 बरु नये मखंपिनि धा:सा गुबलें नये मास्ति वइ मखु।
 थारिम्ह मिसां न्हयम्ह मचा बुइकूगु दु।
 अय्त्नं यक्वसिया मांयाके छम्ह नं मचा मदु।

6 “परमप्रभुं स्यायेगु व जीवन बियेगु नितां यानादी,
 वय्कलं हे मनूतय्त पातालय् छवयादी अले इमित हाकनं म्वाकादी।

7 परमप्रभुं हे चीमि व त:मि यानादी,
 वय्कलं सुयातं नम्र यानादी अले सुयातं त:धं यानादी।

8 वय्कलं चीमिपिन्त धुलं थकयादी,
 वय्कलं मगा:मचा:पिनिन्त नउया द्रं थकयादी,
 अले इमित इज्जतया थासय् तयादी,
 इमित राजकुमारतय् दथुइ तयादी।

“पृथ्वीयागु जग परमप्रभुयागु हे ख:
 अले उकी हे वय्कलं संसारयात थापं यानादिल।

9 वय्कलं विश्वास याये बह:पिनिगु रक्षा यानादी,
 दुष्टतय्त धा:सा खिउँगु थासय् सुम्क तयादी,

“सुं मनूयागु शक्तिं वयात त्याकेफइ मखु।

10 परमप्रभुया विरोध याइपि नाश जुयावनी,
 वय्क: इमिगु विरोधय् स्वर्गं नँ न्या:गु सलं हालादी।
 पृथ्वीया कुंकुलामय् तक नं वय्कलं न्याय यानादी।

“वय्कलं जित: शक्ति बियादीगु दु
 अले थम्हं अभिषेक यानाम्हय्सिगु छ्यं धस्वाकादी।”

11 अले एल्काना थ:गु छें रामाय् लिहां वन। मचाम्ह शमूएल धा:सा पुजाहारी
 एलीं धा:कथं परमप्रभुया सेवा यायेत अन हे च्वन।

एलीया लुच्चापि कायपि

12 एलीया कायपि लुच्चात ख:, इमिसं परमप्रभुयात वास्ता मया:।

13 मनूनापं पुजाहारीतयसं याना वयाच्चंगु थज्याःगु चलन दु – सुं मनुखं बलि छाये हइबलय् उकियागु ला दाय्कीबलय् पुजाहारीयात ग्वाहालि याइम्हयसिनं धुस् ज्वनाः वइ,

14 अले फ्वसि वा कराई वा जःसि न्ह्यागु थलय् च्वंगु जूसां धुसुलि तियाः वक्क ला पुजाहारीं यंकिगु याइ। शीलोमय् आराधना यायेत वःपिं फुक्क इस्त्राएलीतयत् इमिसं अथे हे व्यवहार याइगु खः।

15 तर आः दाः च्याके न्ह्यः पुजाहारीया ग्वाहालिमिं बलि छाइम्ह मनूयात थथे धाइगु, पुजाहारीया निति दय्केत जितः छुं ला ब्यु, दाय्कातःगु ला वं काइ मखु, कचिगु जक काइ।

16 व मनुखं “न्हापालाक्क दाः छवय्कावा, अले छन्त गुलि माःगु खः यंकी” धकाः लिसः बीगु। पुजाहारीया ग्वाहालिमिं धाःसा थथे धाइगु, “अथे मखु! न्हापालाक्क जितः निं ब्यु, मखुसा जिं लाकाः यंके।”

17 उपि ल्याय्महपिं मनूतयगु पाप परमप्रभुया न्ह्यःने तसकं अप्वयावन छायाःसा इमिसं परमप्रभुयात छायेहःगु बलितयत् तसकं क्वह्यंकल।

18 उबलय् शमूएल भिंगु सूती कापःया एपोद फिनाः परमप्रभुया न्ह्यःने सेवा याना हे च्वन।

19 दैय्दसं वया मांनं वयागु नितिं जामालं सुइगु अले थः भाःतनापं दैय्दसं बलि छायेत वनीबलय् शमूएलया निति व यंकाबीगु खः।

20 एली एल्काना व वया कलाःयात सुवाः बियाः थथे धाइगु, “छिमिसं परमप्रभुयाके फ्वंम्ह थ्व काय्पा पलेसा परमप्रभुं छिमित थ्व मिसापाखें मचाखाचात बीमाः।” अले इपिं थःगु छैं लिहां वनीगु जुयाच्चन।

21 परमप्रभुं हन्नायात सुवाः बियादिल अले वं स्वम्ह काय् व निम्ह म्हाय् बुइकल। उखे मचाम्ह शमूएल परमप्रभुया न्ह्यःने च्वन्ह्यानावन।

एली व वया कायपि

22 आः ला एली तसकं बुरा जुइ धुंकल। थः काय्पिन्सं इस्त्राएलीतयत् याःगु व्यवहारया बारे व परमप्रभुया नापलायेगु पालया ध्वाखाय् सेवा याइपिं मिसात नापं घनिगु खँ तक नं एलीं सिल।

23 वं काय्पिन्त धाल, “छाय् छिमिसं थज्याःगु ज्या यानागु? छिमिसं तसकं मभिंगु ज्या याना जूगु दु धकाः जिं सकलें मनूतयगुपाखें न्यनागु दु।

24 थथे याये मज्यू जिमि कायपिं! परमप्रभुया मनूतयसं छिमिगु बारे धाःगु खँ तसकं बांमलाः।

25 छं जुया: छम्ह मनुखं मेम्ह मनूया विरोधय् पापयात धा:सा परमप्रभुं मिलय् यानादी, तर परमप्रभुया विरोधय् हे पापयात धा:सा सुनां मिलय् याइ?” तर एलीया कायपिन्सं थ: बौयागु खँय् ध्यान मब्यु, छायाधा:सा परमप्रभुं इमित स्यायेगु क्व:छिनादी धुंकूगु ख:।

26 अले मचाम्ह शमूएल परमप्रभु व मनूतयगु दया मायां ब्वलना वन।☆

एलीया परिवारया विरोधय् अगमवाणी

27 परमप्रभुया छम्ह अगमवक्ता एलीयाथाय् वया: थथे धाल, “परमप्रभुं थथे धयादी, ‘छु छिमि पुर्खात मिश्रय् फारोया दास जुयाचवंबलय् जि इमिथाय् खनेदय्क मवया ला?’

28 जिं इस्राएलया फुक्क कुल मध्ये छिमि पुर्खा हास्नयात जिमि पुजाहारी जुइत, जिगु वेदीइ बलि छायेत, गुँगू थनेत व जिगु न्ह्य:ने पुजाहारीया भिंगु सूती काप:या वस: फिना: वयेत ल्ययागु ख:। इस्राएलया फुक्क विशेष देछा छिमि पुर्खातयगु नितिं अलग तयाबिया।

29 छाया छिमिसं जि चवनेगु थासय् जिं छा धका: उजं बियागु बलित व देछायात क्वहांकागु? छाया छं जित: स्वया: थ: कायपिन्त अप्व: हनाबना यानागु? छायाधा:सा जिमि प्रजा इस्राएलं छायाह:गु ब्व नया: छ व इपिं ल्हंगु दु।’

30 “अथे जुया: इस्राएलया परमप्रभु परमेश्वरं धयादी, ‘छिमि पुर्खा व छिमि परिवारं न्ह्याबलें जिगु न्ह्य:ने सेवा यायेमा धका: धयागु ख:। तर परमप्रभुं थथे धयादी, थथे जुइ हे मज्यगु ख:। जित: हनाबना याइपिन्त जिं हनाबना याये अले जित: हेला याइपिन्त जिं नं हेला याये।

31 थज्या:गु ई वयाचवंगु दु कि, जिं छ व छिमि परिवारया बल कम यानाबी अले छंगु परिवारय् सु नं बुरापिं मनूत दइ मखु।

32 जि चवनेगु थासय् संकट जूगु छं खनि। इस्राएलया नितिं भिं यायेगु जुइ अयनं छंगु परिवारय् थनिनिसें छम्ह नं बुरापिं मनूत दइ मखु।

33 अथे जूसां छं सन्तानपाखें छम्ह म्वाकातये अले व पुजाहारी जुया: जिगु सेवा याइ। अले व कां जुइ व निराश जुइ। छं मेपि सन्तानत धा:सा ग्यानापुक सिनावनी।

34 “ ‘छं निम्ह काय होप्नी व पीनहासया बांमला:गु अवस्था छंगु नितिं छगू चिं जुइ। होप्नी व पीनहास निम्हं छन्हुं हे सी।

35 जिं जिगु निंति छम्ह विश्वास याये बहःम्ह पुजाहारी ल्यये। वं हे जिगु मनय् व नुगलय् च्वंगु खँकथं याइ। जिं वया परिवारयात थापं याये अले वं हे जिं जुजु अभिषेक यानाम्ह मनूया न्ह्यःने सदां सेवा याइ।

36 छंगु परिवारय् म्वानाच्चपिं सकलें वयाः चकूगु छकू वहः व छपा मरिया निंति वय्कःया न्ह्यःने क्वछुनाः थथे बिन्ति याये मालि, “जितः पुजाहारीतय्त ग्वाहालि यायेत तयादिसँ अले जिके छपा मरि दयेमा।” ’ ’

3

परमप्रभुं शमूएलयात ल्यःगु

1 थुबलय् मचाम्ह शमूएल एलीं धाःकथं परमप्रभुया सेवा याना तुं च्वन। उबलय् परमप्रभुया वचन कम जक न्यने दइगु अले दर्शन नं उलि बियादी मखु।

2 एलीया मिखा बुलुसे च्वने धुंकल अथे जुयाः वं बांलाक स्वये नं मफु। छन्हु चान्हय् एली थः न्ह्याबलें आराम कायेगु थासय् ग्वार्तुलाच्चन।

3 शमूएल धाःसा परमेश्वरया बाचाया सनू दुगु पवित्र पालय् घनाच्चंगु खः। परमेश्वरया मत च्याना हे च्वंगु खः।

4 अनंलि परमप्रभुं शमूएलयात सःतादिल। शमूएलं लिसः बिल, “जि थन हे दु।”

5 अले एलीयाथाय् ब्वांय वनाः वं धाल, “छिं जितः सःतादियागु ला। जि थन हे दु।” तर एलीं धाल, “मखु, जिं छन्त मसःता। हूँ, घं हूँ।” अले व घं वन।

6 हाकनं परमप्रभुं सःतादिल, “शमूएल!” अले व दनाः एलीयाथाय् वन अले वं धाल, “जि थन हे दु। छिं जितः सःतादियागु खः ला?” एलीं धाल, “जिमि काय, जिं छन्त मसःता। हूँ, घं हूँ।”

7 थुबलय् तक नं शमूएलं परमप्रभुयात म्हमस्यूनि। अले परमप्रभुया वचन नं वयात मब्यूनि।

8 परमप्रभुं स्वकः खुसि वयात सःतादिल, अले वं हाकनं एलीयाथाय् वना न्यं वन, “छिं जितः सःतादियागु खः। जि थन हे दु।” अनंलि परमप्रभुं हे श्वयात सःतादीगु खः धकाः एलीं थुइकल।

9 वं शमूएलयात धाल, “वनाः सुम्क ग्वार्तुला च्वँ, छुं जुयाः वय्कलं हानं सःतादिल धाःसा थथे धा, ‘परमप्रभु, धयादिसँ, छिकपिनि दासं न्यनाच्चंगु दु।’ ” अले शमूएल वनाः थःगु थासय् ग्वार्तुवन।

10 अनंलि परमप्रभु वया न्ह्यःने दंझाल अले न्हापा थें तुं सःतल, “शमूएल, अय् शमूएल।” शमूएलं लिसः बिल, “धयादिसँ, छिकपिनि दासं न्यनाच्चनागु दु।”

11 परमप्रभुं वयात धयादिल, “स्व, जिं इस्राएलय् याकनं हे छुं याये त्यनागु दु, थ्व न्यना: फुक्क छक्क जुइ।

12 उखुन्हु हे जिं एली व वया परिवारया विरोधय् धयागु फुक्क खँ शुंनिसें अन्त तक हे पूवनी।

13 परमेश्वरया विरोधय् वया: काय्पिन्सं पाप या:गु स्युसां वं इमित मपंगुलि वयागु परिवारं न्हाबलेया नितिं सजाँय फयेमाली धका: जिं वयात न्हापा हे धयागु दु।

14 अथे जुया: जिं पाफया: एलीया परिवारया बारे धयाच्चनागु दु, ‘एलीया परिवारं या:गु पापया प्रायश्चित न बलि न अन्नबलि छुकिं गुबलें नं जुइ मखु।’ ”

15 शमूएल सुथय् तक हे घनाच्चन। अले वं परमप्रभुया पवित्र पालया लुखा चाय्कल। शमूएलं एलीया बारे खंगु दर्शन कनेत ग्यात।

16 तर एली शमूएलयात स:ता: धाल, “शमूएल जिमि काय्!” वं लिस: बिल, “जि थन हे दु।”

17 एली धाल, “परमप्रभुं छन्त छु धयादिल? जित: फुक्कं खँ मसुचुकुसे धा। छुं जुया: छं वय्कलं धयादीगु खँ सुचुकल धा:सा परमेश्वरं हे छन्त कडा न्याय यानादीमा।”

18 अथे जुया: शमूएलं वयात छुं नं खँ सुमचुकुसे फुक्क खँ धयाबिल, अले एली धाल, “वय्क: परमप्रभु ख:। वय्क:यात छु भिं ताल व हे यानादीमा।”

19 शमूएल ब्वलना वन। परमप्रभु व नाप दी, अले वय्कलं यानादीगु अगमवाणी छगू नं सिंति मवं फुक्कं पूवकादिल।

20 अनंलि उत्तरय् दाननिसें बेर्शेबा तकयापि फुक्क इस्राएलीतय्सं शमूएल परमप्रभु पाखेंयाम्ह अगमवक्ता ख: धका: म्हसिल।

21 परमप्रभुं हानं शीलोय् नापलायेगु पालय् दर्शन बियादिल, अन वय्कलं थ:गु वचनपाखें थ:त शमूएलयाथाय् क्यनादिल।

4

1 अनंलि शमूएलया वचन सकल इस्राएलीतय्सु निति वल।

पलिशतीतय्सं बाचाया सनू थ:गु कब्जाय् का:गु

इस्राएलीत पलिशतीतयनापं लडाइँ यायेत न्ह्यज्यात। अले इस्राएलीतय्सं एबेन-एजेरय् व पलिशतीतय्सं धा:सा अपेकय् थथ:गु पाल ग्वल।

2 पलिशतीतयस् इस्त्राएलीतय नाप लडाईं यायेत सिपाईत थाय् थासय् तल। अले इमिगु दथुइ ताहाकःगु लडाईं जुल अले इमिसं प्यद्वः ति इस्त्राएली मनूत लडाईया ख्यलय् हे स्यानाबिल थथे पलिशतीतयस् इस्त्राएलीतयत बुकल।

3 लडाईलय् बचय्जूपिं सिपाईत लिहांवये धुंकाः इस्त्राएलया थकालितयत धाल, “थौं झीत परमप्रभुं छाया पलिशतीतयपाखें बुकादीगु? वय्कः झीपिं नापं हे झायादीमा अले झी शत्रुतयगु ल्हातं झीत बचय् यानादीमा धकाः परमप्रभुया बाचाया सनू शीलोपाखें हयेनु।”

4 अथे जुयाः इमिसं शीलोय् मनूत छवल अले कस्बतय् दथुइ च्वनादीम्ह दक्व शक्ति दुम्ह परमप्रभुया बाचाया सनू हल। एलीया निम्ह कायपिं होप्नी व पीनहास नं व सनू नापं हे वल।

5 बाचाया सनू छाउनिइ थ्यनेवं फुक्क इस्त्राएलीत ततःसलं हालहल। गुकिं यानाः पृथ्वी हे लिगिलिगि सन।

6 पलिशतीतयस् नं व सः ताल अले इमिसं धाल, “हिब्रूतयगु छाउनीइ थथे ततःसलं छाया हाला हःगु?”

अले इमिसं परमप्रभुया बाचाया सनू हिब्रूतयगु पालय् थ्यके हल धकाः सीकल।

7 पलिशतीत तसकं ग्यानाः थथे धाल, “इमिगु छाउनिइ घः दुहां वःगु दु! आः झीत बांलाइ मखुत! थथे जूगु ला न्हापा गुबलें नं मखंनि।

8 आः झीगु भिं जुइ मखुत! सुनां झीत उपिं दकलय् तःधपि घःतपाखें बचय् याइ? मिश्रीतयत थीथी कथंया महामारी हयाः मस्भूमिइ नाश याःपिं थुपिं हे घःत खः।

9 हे पलिशतीत, बल्ला व साहसी जु! तसकं बल्लाःपिं मनूतयसं थें ज्या या, मखुसा गथे झीसं हिब्रूतयत दास दासी यानागु खः अथे हे झीपिं हिब्रूतयगु दास दासी जुइमाली। तसकं बल्लाःपिं मनूतयसं थें लडाईं या!”

10 थुकथं पलिशतीतयसं थःपिनिगु तःधंगु बलं लडाईं यात अले इस्त्राएलीतयत बुकल। अले इस्त्राएलीत फुक्कं थथःगु पालय् बिस्युं वन। थुपालय् यक्वः मनूत स्यात। स्विद्वः इस्त्राएली सिपाईत स्यात।

11 अले पलिशतीतयसं परमेश्वरया बाचाया सनू थःपिनिगु कब्जाय् कयाः एलीया निम्ह कायपिं होप्नी व पीनहासयात नं स्यात।

एली सीगु

12 उखन्हु बेन्यामीन कुलया छम्ह मनू लडाईं जगु थासं व्वांय् वयाः शीलोय् थ्यंकवल। वं थःगु दुःख क्यनेत थःगु लं खुनाः छेनय् धू बुलातःगु दु।

13 एली धाःसा परमप्रभुया बाचाया सनूया निति तसकं धन्दा कयाच्वन। अले लैसिथय् थः च्वनेगु थासय् च्वनाः त्वलय् जुयाच्वन। व मनुखं शहरय् न्यंकभनं खबर थ्यंकल, अले फुक्क मनूत ग्यानाः तसकं हाला हल।

14 थ्व सः तायाः एलीं न्यन, “थ्व छुकिया हाःसः खः?” खबर न्यकेत हथाय् चाचां व मनू एलीयाथाय् वल।

15 एली गुइच्यादें दये धुंकूम्ह खः अले वया मिखा नं मछुइ धुंकल।

16 व मनुखं धाल, “जि लडाइँनं बिस्सुं वयाम्ह खः। थौं छिथाय् तक नं थ्यंकः वया।” एलीं न्यन, “हे जिमि काय्, छु जुल?”

17 व खबर ज्वनावःम्ह मनुखं लिसः बिल, “इस्त्राएलीत पलिशतीतपाखें बिस्सुं वन। थ्व झीगु निति तसकं ग्यानापुगु बगु खँ खः। थुलि जक मखु छिकपिनि काय् होप्नी व पीनहासयात स्यानाः परमेश्वरया बाचाया सनू नं लाकायंकल।”

18 व मनुखं परमेश्वरया बाचाया सनूया बारे खँ ल्हाःबलय् एली ध्वाखाया लिक्कसं दुगु थः च्वनाच्वनागु थासं लिउनेपाखे ग्वार्तु वन। व बुरा जुइ धुंकूम्ह व तसकं ल्हंगुलि ककु लघानाः सित। व पिइदें तक इस्त्राएलीतय् नायः जुइ धुंकूम्ह खः।

पीनहासया कलाः सीगु

19 एलीया भौ पीनहासया कलाः प्वाथय् दुम्ह खः, अले वया मचाबुइगु ई वये धुंकूगु खः। वं परमेश्वरया बाचाया सनू लाकायंकूगु अले थः ससःबौ सीगु व थः भाःत सीगु खँ न्यँसेलि वया मचाबुइ बेथा जुल, अले मचा बुइकल।

20 व ब्यथा जुयाः सी थें च्वंबलय् वयात सुसाःकुसाः याइपिन्सं वयात धाल, “साहस या! छं काय् बगु दु!” तर वं थ्व खँय् वास्ता नं मयाः अले लिसः नं मब्यू।

21 मचाया नां ईकाबोद* तयाः वं थथे धाल, “इस्त्राएलपाखें परमेश्वरया महिमा तनावंगु दु।” थुकथं वं परमेश्वरया बाचाया सनू लाकायंकूगु अले थः ससःबौ व भाःतयात स्याःगु खँ प्वंकल।

22 वं धाल, “परमेश्वरया महिमां इस्त्राएलीतय् त्वःता वंगु दु छायाःसा परमेश्वरया बाचाया सनू लाकायंकूगु दु।”

5

परमेश्वरया बाचाया सनू पलिशतीतय्गु शहरय्

* 4:21 ४:२१ ईकाबोद थुकिया अर्थ महिमा मदयावन

1 पलिशतीतयूंसं परमेश्वरया बाचाया सनू लाकायंकाः एबेन-एजेरं अशदोद शहरयू यंकल।

2 अले इमिसं परमेश्वरया सनू क्वबियाः दागोनया देगलय् हल अले दागोनया मूर्तिया लिक्कसं तुं तल।

3 कन्हय् खुन्हु सुथय् अशदोदया मनूत दनावःबलय् इमिसं दागोनया मूर्ति परमप्रभुया सनू न्ह्यःने भवसुलाच्चंगु खन। अथे जुयाः इमिसं व मूर्तियात ल्हनाः वयागु हे थासय् तल।

4 तर कन्हय् खुन्हु सुथय् इपिं दनावःबलय् हाकनं व मूर्ति परमप्रभुया सनूया न्ह्यःने भवसुलाच्चंगु खन। अले वया छयं व निपा ल्हाः नं छुतय् जुयाः लुखा क्वय् लाःवनाच्चन। वयागु म्ह धाःसा तमज्याः।

5 अथे जुयाः उखुन्हुनिसैं थौं तक नं अशदोदय् दागोनया पुजाहारीत व दागोनया देगलय् वनीपि सकलैं दागोनया लुखाखलुइ पलाः तइ मखु।

6 परमप्रभुं अशदोदया मनूतयत तःधंगु दण्ड बियादिल अथे जुयाः इपिं तसकं ग्यात। वयकलं इमि लिक्क लाःगु जवंखवं च्वंगु इलाकाय् च्वपिं मनूतयत नं ला बुयावइगु ल्वचं कयेकाः दण्ड बियादिल। इमिगु फुक्क शहरय् हे सीगु विनाश वल।

7 थःपिन्त छु जुयाच्चंगु खः व खनाः अशदोदया मनूतयूंसं धाल, “इस्त्राएलया परमेश्वरं झीत व झीम्ह घः दागोनयात दण्ड बियाच्चंगु दु। अथे जुयाः थ्व परमेश्वरया बाचाया सनू आः यक्व ई तक झीनापं थन तयातये मज्यू।”

8 इमिसं थ्व सनूयात छु यायेमाली धकाः न्यनेत पलिशतीतय् फुक्क शासकतयत सःताहल, अले इमिके न्यन, “थ्व इस्त्राएलया परमेश्वरया सनूयात जिमिसं छु यायेगु?”

अले इमिसं लिसः बिल, “इस्त्राएलया परमेश्वरया सनूयात गातय् तयेयंकि।” अथे जुयाः इमिसं इस्त्राएलया परमेश्वरया सनूयात अन तये यंकल।

9 तर सनू अन थ्यनेवं हे परमप्रभुं थःगु ल्हाः अन शहरय् च्वपिं मनूतयगु विरोधय् ल्हनादिल अले व शहरय् च्वपिं मनूत तसकं ग्यात। अन च्वपिं ल्याय्म्हपिं व बुरापिं सकसितं वयकलं ला ग्वारा दयावइगु ल्वचं कयेकाः दण्ड बियादिल।

10 अथे जुयाः परमेश्वरया बाचाया सनू इमिसं नं एक्रोनय् छवल।

तर परमेश्वरया बाचाया सनू एक्रोनय् थ्यनेवं अनयापिं मनूत थथे धकाः ततःसलं हाल, “जिपिं व जिमि मनूतयत स्यायेत छिमिसं इस्त्राएलया परमेश्वरया बाचाया सनू थन हयागु ला?”

11 अथे जुयाः हाकनं इमिसं पलिशतीतय् फुक्क शासकतयत सःताहल, अले इमित धाल, “परमेश्वरया बाचाया सनू जिमि थासं छवयादिसैं। थ्व सनूयात तइगु

थासय् हे लित छवयादिसँ। मखुसा थुकिं याना: झीपिं सकलें सी माली।” मृत्युया कारण फुक्क शहरय् भयया ल्वचं जाल। छाया:सा परमप्रभुया ल्हा: इमिगु विरोधय् ल्हनादीगु खः।

12 अले मसीनिपिं मनूतयत् धा:सा ला ग्वारां तसकं सास्ती जुल अले व शहरय् च्वंपिनिगु तःसलं हा:गु सः स्वर्गय् तक हे थ्यन।

6

बाचाया सनू इस्राएलय् लित हःगु

1 परमप्रभुया बाचाया सनू पलिशतीतयगु देशय् न्हयला तक च्वन।

2 अले पलिशतीतयसं पुजाहारीत व ज्योतिषीतयत् सःता: इमिके न्यन, “परमप्रभुया बाचाया सनूयात आ: छु यायेगु? जिमित धयादिसँ, थ्वयात तयातःगु हे थासय् जिमिसं गथे याना: छवयेगु?”

3 इमिसं लिस: बिल, “छुं जुया: छिकपिन्सं इस्राएलया परमेश्वरया सनू लित छवयेगु खःसा खालि ल्हातं छवये मते। तर वय्कःया नितिं दोषबलि नं पक्का छवयादिसँ। अले छिकपिनिगु ल्वय् लनी व वय्कलं छाया छिकपिनिपाखें ल्हंगु ल्हा: लितकयामदिल धइगु खँ थुइ।”

4 अले पलिशतीतयसं न्यन, “वय्कःयात जिमिसं गुकथंयागु दोषबलि छवयेगु?”

इमिसं लिस: बिल, “छिकपिं सकसित व छिकपिनि शासकतयत् दुःख ब्यूगु महामारीया नमूनाकथं न्यागू लुँया ला ग्वारा व न्यागू लुँया छुँ पलिशतीतय् शासकतयगु ल्याःकथं छवयाब्यु।

5 छिकपिनिगु ला ग्वारा व देशयात स्यंकाच्चंपिं छुँया नमूना दयकादिसँ। अले इस्राएलया परमेश्वरया महिमा यानादिसँ। सके वय्कलं छिकपिनिपाखें, छिकपिनि घःतयपाखें व छिकपिनि देशपाखें थःगु ल्हा: लित कयादी।

6 छिकपिं छाया फारो व मिश्रीत थें जिराहा जुयेगु? वय्कलं इमित कडा सजाँय बियादी धुंका: इमिसं इस्राएलीतयत् थःगु लँय् वने ब्यूगु, मखु ला?

7 “आ: गुबलें ज्वतय् मया:म्ह दुरु ब्यूम्ह निम्ह सा अले छगू न्हगु रथ तयार या। अले व सातयत् रथय् चिनाब्यु इमि साचात धा:सा गलय् हे लित यंकि।

8 अले परमप्रभुया बाचाया सनू यंका: रथय् ति। अले वया लिक्कसं छगू कन्तुरय् छिकपिन्सं वय्कःया नितिं छवयेत्यनागु लुँया दोषबलि तयाब्यु। अले रथयात थःगु लँपुइ वनेबियादिसँ।

9 तर उकियात स्वयाच्चवँ। छुं जुया: व रथ बेथ-शेमेशपाखे थ:गु हे थासय् च्वयपाखे थ:त यंकल धा:सा, परमप्रभुं हे व त:धंगु विपत्ति झीथाय् छवयाह:गु ख:। मखुसा, वय्कलं थ:गु ल्हातं झीत कय्कूगु मखु बरु थ्व संयोगं जक जूगु धका: सीके फइ।”

10 उपि मनूतय्सं थथे हे यात, इमिसं निम्ह सा हया: रथय् चित अले इमि साचात धा:सा गलय् यंका: चित।

11 अले इमिसं कन्तुरय् दुगु लुँया ला ग्वारा व लुँया छुँ परमप्रभुया बाचाय् सनूनापं रथय् तल।

12 अनंलि उपि सात लँ धुछिं हाला: थुखे उखे मस्व:से तप्यंक हे बेथ-शेमेशपाखे वन। पलिशतीतय् शासकत नं इमिगु ल्यूल्यू बेथ-शेमेशया लागा तक हे वन।

13 उगु इलय् बेथ-शेमेशया मनूत ब्यासिइ छव लयाच्चंगु जुयाच्चन, अले इमिसं च्वयपाखे स्व:बलय् परमप्रभुया बाचाया सनू खना: इपि तसकं लयल्यताल।

14 रथ बेथ-शेमेशय् यहोशूया बुँइ वना: अन लिक्कसं दुगु छग्व: तग्व:गु ल्वहँतय् न्यावन। अले रथय् च्वंगु सिं चाना: उपि सातय् स्याना: परमप्रभुया निति होमबलिकथं छाल।

15 अले लेवीतय्सं परमप्रभुया सनू व लुँया देछा दुगु कन्तुर ल्हना हया: व तग्व:गु ल्वहँ घ:ने तल। उखुन्हु बेथ-शेमेशया मनूतय्सं परमप्रभुयात होमबलि व बलिदान छाल।

16 पलिशतीतय् न्याम्हं शासकतय्सं धा:सा उपि फुक्कं स्वयाच्चन अले उखुन्हु हे इपि एक्रोनय् लिहां वन।

17 उपि लुँ ग्वारा, पलिशतीतय्सं दोषबलिकथं छवयाह:गु ख:। उपि अशदोद, गाजा, अश्कलोन, गात व एक्रोन फुक्कया निति छगू छगू ख:।

18 लुँया छुँ धा:सा पलिशतीतय् शासकतय्सं शासन याइगु प:खा: दुगु न्यागू शहर व उपि शहरया ज:ख: च्वंगु गांया ल्या:कथं ख:। परमप्रभुया सनू तयात:गु त:ग्व:गु ल्वहँ थौं तक नं बेथ-शेमेशया यहोशूया बुँइ साक्षी दु।

19 तर परमप्रभुं बेथ-शेमेशया छुं मनूत मध्ये न्हयेम्हयसित स्यानादिल, छायाधा:सा इमिसं परमप्रभुया सनू चाय्का: स्व:गु ख:। परमप्रभुं थथे त:धंगु विपत्ति हयादीगुलि इमिसं विलाप यात।

20 अले बेथ-शेमेशया मनूतय्सं धाल, “परमप्रभु, पवित्र परमेश्वरया न्ह्य:ने सु दने फइ? थ्व सनू थनं सुयाथाय् छवयेगु?”

21 अले इमिसं किर्यत-यारीमया मनूतयथाय् थ्व खबर छवत, “पलिशतीतयसं परमप्रभुया बाचाया सनू लित हःगु दु। क्वहां वयाः थ्व छिकपिन्थाय् यंकादिसँ।”

7

शमूएल इस्राएलया न्यायकर्ता

1 अथे जुयाः किर्यत-यारीमया मनूत वयाः परमप्रभुया सनू यंकल। इमिसं सनू डाँडाय् च्वनाच्च्वंम्ह अबीनादाबया छैय् हल। वया काय् एलाजारयात सनू स्वयेगु ज्याया निति लःल्हाना बिल।

शमूएलयापाखें पलिशतीत ब्रू

2 थुकथं ताःई तक लगभग निइदें तक सनू किर्यत-यारीमय् हे तया तल। व हे इलय् फुक्क इस्राएलीतयसं दुखं च्वनाः परमप्रभुयाके ग्वाहालिया निति बिन्ति यात।

3 अले शमूएलं फुक्क इस्राएल जातियात थथे धाल, “छिपि दुनुगलंनिसें परमप्रभुयाथाय् लिहां वयेगु खःसा, छिकपिनि दथुं मेपि घःत व अशतोरैत घःमय्जुया थां लिकयाः वांछव। अले थःगु फुक्क मन व दुनुगलंनिसें परमप्रभुपाखे लिहां वा, अले वय्कःया सेवा या। अले तिनि वय्कलं छिकपिन्त पलिशतीतयगु ल्हातं त्वःतकादी।”

4 अथे जुयाः इस्राएलीतयसं बाल घःत व अशतोरैत घःमय्जुया थां लिकयाः वांछवयाबिल। अले परमप्रभुया जक आराधना यात।

5 अले शमूएलं धाल, “फुक्क इस्राएलीतय् मिस्पाय् मुंकि अले जिं छिकपिनिगु निति परमप्रभुयाके प्रार्थना याये।”

6 अथे जुयाः इपिं सकलें मिस्पाय् मुन, अले इमिसं लः जायकाहयाः परमप्रभुया न्हःने देछाकथं प्वंकाबिल। उखुन्ह “जिमिसं परमप्रभुया विरोधय् पाप यानागु दु” धकाः मानय् यानाः न्हिच्छि हे इपिं अपसं च्वन। अले शमूएल मिस्पाय् इस्राएलीतय् नायः जुल।

7 पलिशतीतयसं इस्राएलीत मिस्पाय् मुनाच्च्वंगु दु धइगु खँ न्यनाः इमि शासकत व सिपाइँत इस्राएलीतलिसें लडाइँ यायेत वल। पलिशतीत ल्वायेत न्ह्यज्यात धइगु खँ न्यनाः इस्राएलीत तसकं ग्यात।

8 अले इस्राएलीतयसं शमूएलयात धाल, “पलिशतीतयगु ल्हातं जिमित बचय् यायेत परमप्रभु इी परमेश्वरयात प्रार्थना यायेगु त्वःते मते।”

9 अथे जुयाः शमूएलं नकतिनियाम्ह मचाम्ह भ्याःचायात हयाः होमबलि छाल, अले इस्राएलीतयगु निति परमप्रभुयात ततःसलं हालाः प्रार्थना यात। परमप्रभुं वं याःगु प्रार्थनाया लिसः बियादिल।

10 शमूएलं बलि छायाच्चंगु इलय् पलिशतीत लडाईं यायेत इस्राएलीतयथाय् लिक्क वल। उखुन्हू परमप्रभु पलिशतीतयगु विरोधय् नॅन्याये थें ततःसलं हालादिल। अले पलिशतीतयगु दथुइ अलमल जुल अले इपिं इस्राएलीतपाखें बांमलाक बुत।

11 इस्राएलीतयसं मिस्पानिसें पलिशतीतयत् लिना यंकाः लैय् स्यास्यां बेथ-कर तक हे वन।

12 अले शमूएलं मिस्पा व शेनया दथुइ लुमन्तिकथं छग्वः ल्वहं धस्वाकाः थथे धाल, “परमप्रभुं झीत थन तक ग्वाहालि यानादिल।” अथे जुयाः व थाय्या नां एबेन-एजेर* धकाः तल।

13 थुकथं पलिशतीत बुत अले हाकनं छुं ई तक इस्राएलीतनापं लडाईं याः वये मफुत।

शमूएलया जिवंकाछि हे परमप्रभुया ल्हाः पलिशतीतयगु विरोधय् लात।

14 पलिशतीतयसं कब्जा यानातःगु एक्रोननिसें गात तकया शहरत हाकनं इस्राएलीतयसं तुं लित काल। अले इस्राएलीतयसं लिक्क लाःगु लागात पलिशतीतपाखें त्वःतकल। अले इस्राएलीत व एमोरीतय् दथुइ नं शान्ति जुल।

15 थःगु जिवंकाछि हे शमूएल इस्राएलीतय् न्यायकर्ता जुल।

16 वं दैयदसं बेथेल, गिलगाल व मिस्पाय् वनाः ल्वापुख्यापुया न्याय याइगु खः।

17 तर व न्ह्याबलें रामाय हे लिहां वइगु खः। छायाधाःसा वयागु छें अन हे खः अले अनं नं वं इस्राएलीतयगु न्याय याइगु खः। वं अन परमप्रभुया नितिं छगू वेदी दयकल।

8

इस्राएलीतयसं छम्ह जुजु फ्वंगु

1 शमूएल बुरा जुल, अथे जुयाः वं थः कायपिन्त इस्राएलया न्यायकर्ता दयकल।

2 वया तःधिकःम्ह काय्या नां योएल व माहिलाम्ह काय्या नां अबिया खः। इपिं निम्हं बेर्शेबाया न्यायकर्तात खः।

3 वया कायपिन्सं धाःसा थः बौनं याःकथं मयात। तर इमिसं थःगु जक भिं यायेगु बिचाः यानाः धिबा कयाः न्याय स्यंकेगु यात।

* 7:12 ७:१२एबेन-एजेर थुकिया अर्थ ग्वाहालिया ल्वहं खः।

4 अथे जुयाः इस्राएलया सकलें थकालित मुनाः रामाय् शमूएलयाथाय वल।

5 इमिसं शमूएलयात धाल, “स्वयादिसैं, आः छि बुरा जुइ धुंकल। छिकपिनि कायपिन्सं छिं याःकथं मयात। अथे जुयाः मेथाय् देशय् थें जिमित शासन यायेत छम्ह जुजु ल्ययादिसैं।”

6 थथे शासन यायेत जुजु फवं वःगुलि शमूएल दिक्क चायाः परमप्रभुयात प्रार्थना यात।

7 अले परमप्रभुं शमूएलयात धयादिल, “मनूतय्सं धाः वःगु फुक्क खँ बांलाक न्यैं। इमिसं छन्त मय्कूगु मखु बरु इमिसं ला जितः मय्कूगु खः। इमिसं जितः हे थः जुजु मानय यायेत मय्कूगु खः।

8 मिश्र देशं हया खुन्हुनिसैं इमिसं जितः छु छु याःगु खः आः इमिसं छन्त नं अथे हे यानाच्चंगु दु। इमिसं जितः त्वःताः मेपिं घःतयगु पुजा यानाच्चंगु दु।

9 इमिसं आः छु छु धाइ बांलाक न्यैं, तर जुजुं इमिगु दथुइ गुकथं शासन यायेगु खः इमित बांलाक ख्याच्चः ब्यु।”

10 जुजु फवं वःपिं मनूतयत् परमप्रभुं धाःगु फुक्क खँ शमूएलं धयाबिल।

11 वं धाल, “छिमिगु दथुइ शासन याइम्ह जुजु छिमि थः कायपिन्त कयाः थःगु रथय् व सल गइगु ज्या याकिम्ह अले इमित थःगु रथया न्ह्यःने न्ह्यःने ब्वाके यंकीम्ह जुइ।

12 अले वं द्रुःछि द्रुःछिया दथुइ व नेय्म्ह नेय्म्हया दथुइ नायःत ल्ययातइ। अले मेपिन्सं हे वयागु बुँपालेगु याइ अले बाली लयेगु याइ। मेपिन्सं हे वयागु निति लडाइँया ल्वाभःत व रथया सामानत दय्काबी।

13 वं हे छिमि म्हायपिन्त अन्तर दय्किगु, नसा ज्वरय् यायेगु ज्या याकी।

14 अले वं हे छिमिगु दक्वसिबय् बाबांलाःगु बुँत, दाखक्यब व जैतूनया क्यबत कयाः थः भारदारतयत् बी।

15 थः भारदारत व मेपिं हाकिमतयत् बीत छिमिगु अन्न व दाखया फलपाखें झिब्वय् छब्व यंकी।

16 वं छिमि दासदासीत व छिमि दक्वसिबय् बाबांलाःपिं सा द्रुहं व गधात थःगु ज्याय् छ्यलेत यंकी।

17 वं छिमिगु बाबांलाःपिं फैच्चलयत् बथानं झिब्वय् छब्व यंकी। अले छिपिं थः नं वया दास दासी जुइ।

18 व ई वइबलय् छिमिसं ल्यःम्ह जुजुपाखें छुत्काराया निति तसकं हाली। अथेसां व दिनय् परमप्रभुं छिमित लिसः बियादी मखु।”

19 तर मनूतयसं शमूएलया खँ मन्यन। इमिसं धाल, “अथे मखु, जिमिगु निति छम्ह जुजु मा हे मा!

20 अले तिनि जिमित शासन यायेत व लडाईं या: वनेत जुजु दइ अले जिपिं नं मेपि जातित थें तुं जुइ।”

21 मनूतयगु खँ न्यने धुंका: शमूएलं व फुक्क परमप्रभुयाथाय् वना: धाल।

22 अले परमप्रभुं लिस: बियादिल, “इमिसं धा:कथं हे या, अले इमिगु निति छम्ह जुजु नं ल्य।”

अले शमूएलं इस्राएलया फुक्क मनूतयत् थथ:गु छें छवल।

9

शाऊलं शमूएलयात नापला:गु

1 बेन्यामीन कुलया हनेबह:म्ह व त:मिम्ह मनू छम्ह दु। वयागु नां कीश ख:। व अबीएलया काय्, जरोरया छय्, बकोरतया छुइ, आपीहया उइ ख:।

2 वया शाऊल नांयाम्ह बांला:म्ह छम्ह काय् दु। उगु इलय् इस्राएलय् व थें ज्या:म्ह सं मदु। व दक्कसिबय् त:धिक:म्ह ख:।

3 छन्हु शाऊलया बौ कीशया छुं गधात तन। अथे जुया: वं थ:काय् शाऊलयात धाल, “छम्ह च्य:यात ज्वना: गधात मा: हूँ।”

4 व एफ्राइमया पहाडय् च्वंगु देश जुया: शलीशया जिल्लाया वन तर अनं नं वं लुइके मफुत। इपिं शालीमया जिल्ला जुया: वन तर गधात अनं नं लुइके मफुत। इपिं बेन्यामीनया इलाका जुया: वन अथेसां इमिसं गधात लुइके हे मफुत।

5 इपिं सूपया जिल्लाया थ्यंक: वन। शाऊलं थ:नापं व:म्ह च्य:यात धाल, “थन वा! इपिं छैय् लिहां वनेनु। मखुसा जिमि बौनं गधाया धन्दा कायेगु त्व:ता: इगीगु धन्दा कयाच्चनी।”

6 तर व च्यलं धाल, “थ्व शहरय् तसकं इज्जत दुम्ह परमेश्वरया मनू छम्ह दु। वं धा:गु खँ फुक्कं पूरा जु। इपिं नं वयाथाय् वनेनु। इगीगु ज्याया बारे नं वं छुं धयादी ला?”

7 शाऊलं धाल, “इपिं वयाथाय् वन धा:सा इीसं वयात छु बी फु धका: ? इगीगु म्हिचाय् छुं नं नयेगु नसा मदु। परमेश्वरया मनूयात बीत इीके छुं नं कोसेलि मदु। इीके छु दु धका:?”

८ व च्यलं हाकनं धाल, “स्वयादिसँ! जिके थन छगू शेकेल वहःया प्यब्वय् छब्वः* दु। थ्व जिं परमेश्वरया मनूयात बी अले वं हे झीपिं गन वनेमाःगु खः धयाबी।”

९ (न्हापा न्हापा परमेश्वरनापं सल्लाह कायेमाल धाःसा इस्राएलय् थथे धायेगु चलन दु, “झीपिं लिपा जुइगु खँ धायेफुम्ह मनूयाथाय् वनेनु।” छायाधाःसा थौकन्हय्यापि अगमवत्तायात उबलय् लिपा जुइगु खँ धायेफुम्ह मनू धकाः धाइगु खः।)

१० अले शाऊलं लिसः बिल, “ज्यू, आः झीपिं वयाथाय् वनेनु।” अथे जुयाः इपिं व परमेश्वरया मनू दुगु शहरय् वन।

११ इपिं व शहरया डौंडाय् थाहां वनाच्चंबलय् इमिसं अन सं ल्यासेपिं मिसात लः कायेत वयाच्चंगु नापलात अले इमिके न्यन, “छु लिपा जुइगु खँ धायेफुम्ह मनू छँ हे दु ला?”

१२ इमिसं धाल, “खः, छँ हे दु। वयकः छिकपिं स्वयाः भच्चा जक न्ह्यः झाःगु खः। याकनं झासँ वयकः नकतिनि शहरय् दुहां झाःगु खः, छायाधाःसा थौं आराधना याइगु थासय् वनाः मनूतय्सं बलि छाः वनीतिनि।

१३ आराधना याइगु थासय् वयकः भव्य नःवने न्ह्यः हे छिकपिन्सं वयकःयात शहरय् दुहां वयाच्चंबलय् हे नापलाइ। वयकः अन झायाः छायेहःगु बलिइ सुवाः मब्युतले मनूतय्सं भव्य नइ मखु। अथे जुयाः याकनं झासँ वयकःयात नापलानादिसँ।”

१४ अथे जुयाः शाऊल व वया च्यःत शहरय् वन। इपिं शहरय् दुहां वनाच्चंबलय् इमिसं शमूएल थःपिपाखे आराधना याइगु थासय् वनेत वयाच्चंगु खन।

१५ शाऊल वये छन्हु न्ह्यः परमप्रभुं शमूएलयात धयादिल,

१६ “जिं कन्हय् थ्व हे इलय् बेन्यामीनया लागां छम्ह मनू छवयाहये। वयात हे छं जिमि प्रजा इस्राएलया निति जुजु अभिषेक या। वं जिमि प्रजातयत पलिशतीतयगु ल्हातं त्वःतका हइ। जिं जिमि प्रजायागु दुःख खनागु दु छायाधाःसा इमिगु ख्वःसः जिथाय् थ्यंगु दु।”

१७ शमूएलं शाऊलयात खनेवं परमप्रभुं वयात धयादिल, “जिं छन्त धयाम्ह मनू थ्व हे खः। थ्व हे मनुखं जि प्रजायात शासन याइ।”

* ९:८ छगू शेकेल वहःया प्यब्वय् छब्वः थथे धयागु ३ ग्राम ति खः

18 शाऊल ध्वाखाय् थ्यनेवं शमूएलयाके न्यन, “लिपा जुइगु खँ धायेफुम्ह मनु गन च्वनादी? जितः धयादिसँ।”

19 शमूएलं लिसः बिल, “लिपा जुइगु खँ धायेफुम्ह ला जि हे खः। जिगु न्ह्यः न्ह्यः आराधना यायेगु थासय् वनेनु। छिकपिं निम्ह थौं जिनापं भव्य नयेगु जुइ। कन्हय् सुथ न्हापां हे जिं छिगु मनय् च्वंगु खँ छु खः व धयाबी अले छितः बिदा बीगु जुइ।

20 स्वन्हु न्ह्यः तपिं गधातयगु च्यूताः कयादी मते छायाधाःसा इपिं लुयावये धुंकुगु दु। तर फुक्क इस्त्राएलीतय्सं छु फ्वनाच्चंगु दु? छु इपिं छ व छिमि बौया फुक्क परिवारया मखु ला?”

21 शाऊलं धाल, “तर जि ला इस्त्राएलया दक्कसिबय् चिधंगु कुलया छम्ह बेन्यामीनी खः। अले बेन्यामीन कुलया वंशतय् जिगु वंश दकलय् चिधंगु वंश खः। छिं छाया जितः थ्व खँ धयादियागु?”

22 अनलि शमूएलं शाऊल व वया च्यःयात नयेगु कोथाय् हल अले ब्वना तःपिं स्विम्ह मनूत स्वयाः नं दकलय् च्वय्यागु थासय् तल।

23 अले शमूएलं ज्वरय् याइम्हय्सित धाल, “जिं छन्त ब्यागल तयाति धकाः बियागु ब्व थन ज्वना वा।”

24 अथे जुयाः ज्वरय् याःम्हय्सिनं ज्वरय् यानातःगु बांया तुति व खम्पा शाऊलया न्ह्यःने तयेहल। अले शमूएलं धाल, “छंगु नितिं तया तयागु लाया ब्व थ्व हे खः। भपियादिसँ, पाहांत सःतागु जूसां जिं थ्व पाहांत नापं नयेत छिगु नितिं धकाः तया तयागु खः।” अथे जुयाः शाऊलं उखुन्हु शमूएलनापं हे नयेत्वने यात।

25 आराधना यायेगु थासं इपिं शहरय् क्वहां वल। शमूएलं शाऊल लिसे थःगु छँया कःसिइ खँ ल्हात।

26 सुथय् खिउँ खिउँ धाःबलय् शमूएलं शाऊलयात कःसिइ हे सःताः धाल, “दुँ, आः जिं छिमित बिदा बियाछवये।” शाऊल दन अले व नापं तुं शमूएल निम्हं नापं लँय वन।

27 इपिं शहरया लिक्क थ्यनेवं शमूएलं शाऊलयात धाल, “थ्व च्यःयात न्ह्यःनेहुँ धा,” च्यः न्ह्यःने वन। अले शमूएलं शाऊलयात धाल, “छि थन हे पलख पियादिसँ, अले जिं छंगु नितिं परमेश्वरया वचन धाये फइ।”

10

शमूएलं शाऊलयात जुजु अभिषेक याःगु

1 शमूएलं छथल चिकं कया: शाऊलया छेनय् प्वंकाबिल, अले वयात चुप्पा नया: धाल, “परमप्रभुं छित: थ: प्रजा इस्राएलीतय् जुजु अभिषेक यानादीगु दु।

2 थौं छि थनं जिनापं बिदा जुया: वनीबलय् बेन्यामीनया सिमानाय् दुगु सेल्सहय् राहेलया चिहान लिक्क निम्ह मनू नापलाइ। इमिसं छित: थथे धाइ, ‘छि मालाच्चं पि गधात लुयावल। अले छिकपिनि बौनं वयागु पीर कायेगु त्व:ता: छिगु पीर कया: थथे धयाच्चन, “आ: जिमि काय्या निति जिं छु जक यायेगु?” ’

3 “अनं तबोरया त:मागु सिमायाथाय् थ्यनेवं बेथेलय् परमेश्वरयात आराधना यायेत वनाच्चं पि स्वम्ह मनूतय् छिं नापलाइ। इपिं मध्ये न्हापाम्हं स्वम्ह दुगुचात, अनं लिपाम्हं स्वपा मरि अले दकलय् लिपायाम्हं छेगूया म्हिचाय् दाखमघं जा:गु थल ज्वना वयाच्चंगु नापलाइ।

4 इमिसं छित: ज्वजलपा धया: निपा मरि बी। अले छिं व काइ।

5 “अनंलि छि परमेश्वरया आराधना यायेगुथाय् गिबाय् झायादी। अन पलिशतीतय्गु छाउनी दु। छि शहरया लिक्क थ्यनेवं छिं आराधना यायेगु थासं क्वहां वयाच्चं पि अगमवत्तातय्गु छपुच:यात सारंगी किया: दम्फु ज्वना: बाँसुरी पुया: व वीणा थाना: वयाच्चंगु नापलाइ। अले इमिसं अगमवाणी कना: वयाच्चनी

6 अनंलि परमप्रभुया आत्माया शक्ति छिके वइ अले छिं नं इपिं नापनापं अगमवाणी ल्हानादी अले छित: मेम्ह मनूकथं दय्कादी।

7 थुपि चिंत पूवनिबलय् छु यायेगु बांला: व हे यानादिसँ छायाधा:सा परमेश्वर छिनापं दी।

8 “छि जि वये न्ह्य: हे गिलगालय् क्वहां झासँ अले जिं होमबलि व मेलबलि छायेत छिथाय् वये। तर जि छिथाय् मथ्यंतले छि न्हयन्हु तक पिचाच्चने मालि। अले जि वया: छिं यायेमा:गु छु ख: व धयाबी।”

शाऊल जुजु जुगु

9 अनंलि शाऊल शमूएलपाखें बिदा जुया: वन, अले परमेश्वरं वयागु मन न्हगु यानादिल। उखुन्हु हे शमूएलं धा:गु फुक्क चिं छुं हे मपाक पूवन।

10 इपिं गिबाय् थ्यनेवं अन अगमवत्तातय्गु छपुच: क्वहां वयाच्चंगु ख:। अले परमेश्वरया आत्मा तुस्त हे वयाके वल अनंलि इपिं नापंतुं अगमवाणी ल्हायेगु शुरू यात।

11 वयात न्हापा हे म्हस्यूपिं मनूतयसं व खना: थ:थवय् खँ ल्हात, “कीशया काय्यात थ्व छु जुगु ख:? छु शाऊल नं अगमवत्ता जुल ला?”

12 अन दुपि मध्ये छम्हयसिनं न्यन, “इमि बौ सु खः?” अथे जुयाः थ्व उखान ल्हायेगु यात, “छु शाऊल नं अगमवक्ता जुल ला?”

13 शाऊल अगमवाणी ल्हाये सिधय्काः आराधना यायेगु थासय् थाहां वन।

14 शाऊलया ककां व अले वया च्यःयात धाल, “छिपिं गन वनाच्चनागु?” अले शाऊलं लिसः बिल, “गधात माः वनाच्चनागु खः। जिमिसं लुइके मफुगुलि जिपिं शमूएलयाथाय् वना।”

15 वया ककां धाल, “शमूएलं छु धाल, जितः धा।”

16 शाऊलं धाल, “गधात लुयाः वये धुंकल धकाः वं जिमित धाल।” वं थः जुजु जुल धकाः शमूएलं धाःगु खँ धाःसा ककायात मधाः।

शाऊलयात जुजु घोषणा याःगु

17 अनंलि शमूएलं इस्राएलया मनूतय्त मिस्पाय् परमप्रभुयाथाय् मुनेत सःतल।

18 अले इस्राएलया मनूतय्त वं धाल, परमप्रभुं इस्राएलया परमेश्वरं थथे धयादी, “जिं इस्राएलीतय्त मिश्र देशं छुत्कारा यानाः हया। इमित दुःख बीपिं मिश्रीतय्त व फुक्क राज्यपाखें जिं इमित मुक्त यानाबिया।

19 तर छिमिगु फुक्क दुःखकष्टपाखें बचय् यानादीम्ह थः परमेश्वरयात छिमिसं थौं हेला यात। छिमिसं थथे धाल, अथे मखु, जिमिगु निंति छम्ह जुजु ल्ययादिसँ। अथे जुयाः परमप्रभुया न्ह्यःने कुल कुल व वंश-वंश यानाः मुँ।”

20 अले शमूएलं इस्राएलया फुक्क कुलयात न्ह्यःने वयेत इनाप यात। अले गोला तःबलय् बेन्यामीन कुलयात लात।

21 अले वं बेन्यामीन कुलया वंश-वंश यानाः थःगु न्ह्यःने वयेत इनाप यात। अले मत्रीया वंशयात ल्यल। थुकथं दकलय् लिपा कीशया काय् शाऊलयात ल्यल। अनंलि मनूतय्सं वयात माः जुल अय्नं लुइके मफुत।

22 अले हाकनं इमिसं परमप्रभुयात न्यन, “छु व मनू थन वःगु दु ला?” परमप्रभुं लिसः बियादिल, “व अन सामान तया तःथाय् दथुइ सुलाच्वंगु दु।”

23 इपिं ब्वाँय् वनाः वयात कयाः हल, अले व मनूतयगु दथुइ दन फुक्क मनूत वयागु ब्वः स्वयाः चिधिकः जुयाच्वन।

24 शमूएलं मनूतय्त धाल, “स्वयादिसँ! परमप्रभुं ल्ययादीम्ह मनू थ्व हे खः। व थें ज्याःम्ह झीगु जातिइ मेपिं सुं हे मदु।” अनंलि उपिं सकलें मनूतय्सं ततःसलं थथे धकाः हाल, “जुजुया जय जुइमा!”

25 अले शमूएलं मनूतयूत जुजुं यायेमाःगु अधिकार व ज्याखँया बारे धयाबिल। अले वं व छगू सफुतिइ च्वयाः परमप्रभुया न्ह्यःने तयाबिल। अनंलि वं मनूतयूत थथःगु छँ हँ धकाः बिदा बियाः छवत।

26 शाऊल नं गिबाय् थःगु छँय् वन अले परमप्रभुं नुगलय् थ्यूपिं छुं बल्लाःपिं मनूत नं व नापं तुं वन।

27 तर इपिं मध्ये लुच्चात नं दु अले इमिसं धाल, “थ्व मनूखं झीत गथे यानाः बचय् याइ?” इमिसं शाऊलयात हेपय यात अले छुं कोसेलि नं ज्वनाः मवः। अथेसां शाऊलं इमित छुं नं मधासे सुम्क च्वन।

11

शाऊलं अम्मोनीतयूत बुकूगु

1 अम्मोनी जुजु नाहाशं याबेश-गिलादयात हमला यानाः घेरय् यात। याबेशया मनूतयसं नाहाशयात धाल, “जिपिनापं सन्धि यानादिसँ अले जिपि नं छिकपिनि प्रजा जुइ।”

2 तर नाहाशं इमित लिसः बिल, “छगू हे जक खँय् जिं छिपिनापं सन्धि याये। जिं छिपिं मध्ये फुक्क मनूतयगु जवय् च्वंगु मिखा लिकयाबी अले थुकिं यानाः फुक्क इस्राएलीतयगु बेइज्जत जुइ।”

3 अले याबेश-गिलादया थकालितयसं धाल, “इस्राएल देय्न्त्यंक खबर यायेत मनूत छवयेत जिमित न्हयन्हु तक बियादिसँ। अनंलि सुनानं जिमित ग्वाहालि मयात धाःसा जिपिं छिथाय् वयाः थःपिन्त लःल्हाये।”

4 खबर यायेत वंपिं मनूत शाऊलया गिबाय् वनाः थःगु खबर ब्यूबलय् अन च्वंपिं फुक्क मनूत तस्सलं ख्वल।

5 शाऊल धाःसा बुं द्रुहं ज्वनाः वयाच्वंगु खः। अले शाऊलं न्यन, “मनूतयूत छु जुल? छाय् फुक्क मनूत ततःसलं ख्वया हयाः च्वंगु?” अले याबेशपाखें खबर बीत वःपिं मनूतयसं न्यंकूगु खबर फुक्क शाऊलयात धयाबिल।

6 शाऊलं थ्व खँ न्यंबलय् परमेश्वरया आत्माया शक्ति वयाके वल अले व तसकं तंम्बल।

7 अले वं छज्वः द्रुहं कयाः कुचा कुचा जुइक पालाः व कुचात कयाः खबर यायेत वःपिं मनूतयूत बियाः इस्राएल देय्न्त्यंक थथे धकाः खबर छवत, “सु सु शमूएल व शाऊलया ल्यूल्यू लडाईं यायेत वइ मखु इमि द्रुहंयात नं थथे हे यायेगु जुइ।” अले मनूतयसं परमप्रभुया भय काल व इपिं फुक्क छप्पँ जुयाः पिहां वल।

8 शाऊलं इमित लडाईं यायेगु निति बेजेकय् मुंकल। अन इस्राएलया मनूत स्वंगू लाख व यहदाया स्विद्रः मनूत वःगु खः।

9 इमिसं खबर यायेत वःपि मनूतय्त धाल, “याबेश-गिलादया मनूतय्त थथे धा, ‘कन्हय् निभाः छाइबलय् छिमिगु उद्धार जुइ।’ ” याबेश-गिलादया मनूत व खँ न्यनाः तसकं लयताल।

10 अले इमिसं अम्मोनी जुजुयात धाल, “कन्हय् जिपि पिहां वयाः छिथाय् वये अले छितः छु याये मास्ति वः जिमित यानादिसँ।”

11 कन्हय् खुन्हु शाऊलं थः मनूतय्त स्वंगू पुचःयात। सुथ न्हापां इपि अम्मोनीतयगु छाउनी दुने दुहां वन अले निभाः छाःबलय् तक अम्मोनीतय्त स्यानाच्वन। अनंलि म्वाःपि निम्ह छथाय् मजुइक फुक्क छ्यालब्याल जुल।

12 अले मनूतय्सं शमूएलयात धाल, “शाऊलं इतीत राज्य याये मते धकाः धाःम्ह सु खः? इमित स्यायेत जिमिगु ल्हातय् लःल्हानाब्यु।”

13 तर शाऊलं धाल, “थौं छम्ह नं स्यायेगु जुइ मखु छायाधाःसा थौंयागु न्हिइ परमप्रभुं इस्राएलीतय्त बचय् यानादी।”

14 अले शमूएलं इमित धाल, “इतीपि फुक्कं गिलगालय् वनेनु अले हाकनं छकः शाऊलयात थः जुजु धकाः घोषणा याये नु।”

15 अथे जुयाः इपि फुक्क गिलगालय् वनाः परमप्रभुया न्ह्यःने मेलबलि छाल अले परमप्रभुया न्ह्यःने शाऊलयात जुजु घोषणा यात। शाऊल व फुक्क इस्राएलीतय्सं खुशी जुयाः तःधंगु नखः हन।

12

शमूएलं इस्राएलीतपाखें बिदा काःगु

1 अले शमूएलं इस्राएलीतय्त थथे धाल, “जिं छिमिसं धाःगु फुक्कं खँ न्यना अले छिमिगु निति जुजु नं ल्यया।

2 आः व हे जुजु छिमि नायः जूगु दु। जि धाःसा बुरा जुयाः जिगु सँ तयुसे च्वने धुंकल। जिमि कायपि नं छिपिनापं हे दु। जि ला ल्याय्म्हबलय्निसें थौं तक हे छिमि नायः जुया वयाच्वनागु खः।

3 जि थन हे दु। छिमि सुयां जिगु विरोधय् छुं धाये मास्ति वःसा थन परमप्रभु व वय्कलं ल्ययादीम्ह जुजुया न्ह्यःने हे धा। जिं सुयागुं द्रुहं कयागु दु ला? जिं सुयागुं गधा कयागु दु ला? जिं सुयातं ध्वंलानागु दु ला? जिं सुयागुं दोष सुचुका घुस नयागु दु ला? जितः धा, जिं वयात पलेसा पुलाबी।”

4 इमिसं लिसः बिल, “छिं जिमित ध्वंलाःगु मदु। छिं जिमित क्वत्यलादीगु मदु। छिं सुं मनूपाखें छुं कयादीगु मदु।”

5 अले शमूएलं इमित धाल, “छिकपिन्सं जिगु ल्हातय् छुं दोष खंगु मदु धकाः परमप्रभु व वय्कलं अभिषेक यानादीम्ह जुजु थौं साक्षी दु।”

अले इमिसं लिसः बिल, “खः, परमप्रभु हे साक्षी खः।”

6 शमूएलं मनूतय्त धाल, “मोशा व हारूनयात ल्ययादीम्ह अले छिमि पुर्खातय्त मिश्र देशं पितः हयादीम्ह परमप्रभु हे खः।

7 आः थन हे दनाच्चं, छायाधाःसा परमप्रभुया न्ह्यःने जिं छिमित पाः याये, अले छिमिगु निति व छिमि पुर्खातय्त निति वय्कलं यानादीगु फुक्क धार्मिकताया ज्याया बारे कने।

8 “याकूब मिश्र देशय् वने धुंकाः इमिसं ग्वाहालिया नितिं परमप्रभुयात प्रार्थना यात। अथे हे वय्कलं मोशा व हारूनयात मिश्र देशय् छवयाः छिमि पुर्खातय्त अनं पित हयादिल अले थ्व थासय् तयादिल।

9 “तर इमिसं परमप्रभु थः परमेश्वरयात ल्वमंकल। अथे जुयाः वय्कलं इमित त्वःताः हासोरया सेनापति सीसरा, पलिशतीत व मोआबया जुजुपिनिगु ल्हातय् लःल्हानादिल, अले इमिसं इस्राएलीतय्गु विरोधय् लडाइँ यात।

10 अले इमिसं ग्वाहालिया नितिं तःसलं परमप्रभुयात थथे धाल, जिमिसं पाप यानागु दु छायाधाःसा जिपिं छि परमप्रभुपाखें फहिलाः बाल व अशतोरेत मूर्तितय्गु पुजा यानागु खः। तर जिमित जिमि शत्रुतपाखें बचय् यानादिसँ। अले जिमिसं छिगु हे सेवा याये।

11 अले परमप्रभुं यरूब-बाल, बाराक, यिप्ता व जि शमूएलयात छिमि प्यखेरं च्वंपिं शत्रुतपाखें छिमित छुत्कारा बीत छवयाहयादिल। अनंलि छिपिं याउँक च्वन।

12 “अनंलि अम्मोनीतय् जुजु नाहाश छिमित हमला यायेत वयाच्चंगु छिमिसं खंबलय् परमप्रभु छिमि परमेश्वर हे छिमि जुजु जुयादीगु जूसां छिमिसं जितः धाल, ‘मखु, जिमित शासन यायेत छम्ह जुजु माल।’

13 छिमिसं हे ल्यःम्ह जुजु थन दु। छिमिसं वयात फ्वन अले परमप्रभुं हे वयात जुजु ल्ययादिल।

14 छिपिं व छिमि जुजुं परमप्रभु थः परमेश्वरया भक्ति यानाः वय्कःयागु सेवा यात, वय्कःया आज्ञा मानय् यात अले वय्कया आज्ञाया विरोध मयात धाःसा फुक्क खँय् छिमिगु भिं हे जुइ।

15 तर छिमिसं परमप्रभुया वचन मानय् मयात अले वय्कःया विरोध यानाः आज्ञा मानय् मयात धाःसा परमप्रभुं छिमि पुर्खातय्गु विरोधय् ल्हाः ल्हंगु थें छिमिगु विरोधय् नं ल्हाः ल्हनादी।

16 “अथे जुयाः छिपिं गन दु अन हे दँ, अले परमप्रभुं छिमिगु न्ह्यःने यानादीत्यंगु अजू चायापुगु ज्या यात स्त्र।

17 आः छव लयेगु ई खः मखु ला? जिं परमप्रभुयाके इनाप याये, अले वय्कलं नँ न्यासः व वा वय्कादी। थथे जुइबलय् छिमिसं परमप्रभुयाके जुजु फ्वनाः वय्कःया विरोधय् गुलि तःधंगु पाप याःगु दु धकाः सीका काइ।”

18 अथे जुयाः शमूएलं परमप्रभुयात इनाप यात, अले उखुन्ह हे परमप्रभुं नँ न्याःगु सः व वा वय्कादिल। अनंलि फुक्क मनूत परमप्रभु व शमूएल खनाः तसकं ग्यात।

19 अले फुक्क मनूतयसं शमूएलयात धाल, “जिपिं सीगुपाखें बचय् जुइमा धकाः परमप्रभु छिकपिनि परमेश्वरयाके जिपिं छिकपिनि दासतय्गु नितिं प्रार्थना यानादिसँ। छायाधःसा जिमिसं थःपिनिगु नितिं जुजु फ्वनाः अझ अप्वः पाप यानागु दु।”

20 अले शमूएलं फुक्क मनूतयत धाल, “ग्याये मते,” छिपिं थथे मभिगु ज्यायागु जूसां परमप्रभुपाखें फःहिलावने मते। तर थःगु दुनुगलंनिसँ परमप्रभुया सेवा या।

21 ज्यालगय् मजूपिं घःतय् ल्यू वने मते। इमिसं न त ग्वाहालि याये फइ न बचय् याये फइ छायाधःसा इपिं ज्यालगय् मजूपिं खः।

22 थःगु तःधंगु नांया कारणं परमप्रभुं छिमित त्वःतादी मखु, छायाधःसा वय्कलं छिमित थः प्रजा यायेगु क्वःछिनादीगु दु।

23 जिगु लागि धाःसा, छिमिगु नितिं प्रार्थना यायेगु त्वःताः परमप्रभुया न्ह्यःने पाप यायेगु न्हि जिपाखें तापाक हे जुइमा। छु यायेगु पाय्छि जू अले छु यायेगु भिं व जिं छिमित स्यनेकने याये।

24 परमप्रभुया भय का अले विश्वास यायेबहःपिं जुयाः वय्कःया सेवा या। छिमिगु नितिं वय्कलं यानादीगु तःधंगु ज्याया बारे बिचाः या।

25 छुं जुयाः छिमिसं मभिगु ज्या याना तुं च्वन धाःसा छिपिं व छिमि जुजु नाश जुइमाली।

13

शाऊलं पलिशतीतय्नापं लडाइँ याःगु

1 शाऊल जुजु जूबलय् स्विदँ दुम्ह खः। वं इस्त्राएलय् पिइनिदँ राज्य यात।

2 शाऊलं स्वद्वः मनूत ल्यल अले थःनापं मिक्माशय् व बेथेलया पहाडया देशय् निद्रः तल अले थःकाय् जोनाथननापं बेन्यामीन कुलया इलाका दुने गिबाय् द्वःछि छवत। अले ल्यंदुपि मनूतयत् धाःसा वं छैं तुं लित छवयाबिल।

3 जोनाथनं गेबाय् च्वंगु पलिशतीतयग् छ्वाउनी हमला यात। थुक्किया खबर पलिशतीतयग् दथुइ थ्यन। अले शाऊलं “फुक्क हिब्रूत न्यै” धकाः देय् न्यंक तुरही पुइकल।

4 अले शाऊलं पलिशतीतयग् छ्वाउनीइ हमला यात व पलिशतीतयस् इस्त्राएलीतयत् तसकं मयकल धयाग् खँ फुक्क इस्त्राएलीतयस् न्यन। अथे जुयाः वयाग् इनाप न्यनाः इपि गिलगालय् शाऊलयाथाय् मुंवल।

5 अले पलिशतीत इस्त्राएलीतनापं लडाइँ यायेत छथाय् मुन। इमिके स्वद्वः रथ व खुद्वः रथ चले याइपि व समुद्रया सिथय्या फि ति हे अल्याख न्यासि वनीपि सिपाइँत दु। इपि थाहां वनाः बेथ-आवनया पुर्बय् मिक्माशय् छ्वाउनी तल।

6 इस्त्राएलीत तसकं संकष्टय् लात, छायाधाःसा इपि शनूतपाखें आपतय् लाःगु खः। अथे जुयाः इपि गुफाय् झालय् व लःकुथिइ, ल्वहं कापिचाय् व तुंथिइ सुचुवन।

7 गुलि गुलि हिब्रूत यर्दन खुसि पुलाः गाद व गिलादया जिल्लाया त्क नं बिस्वुं वन।

शाऊल धाःसा गिलगालय् हे च्वनाच्वन व वया ल्यूल्यु वःपि फुक्क मनूत ग्यानाः तसकं खात।

शाऊलं आज्ञा मानय् मयाःगु व शमूएलं ब्वःब्यूगु

8 शमूएलं धाःकथं शाऊल न्हय् न्हु तक पियाच्वनाच्वन तर शमूएल गिलगालय् मवः। अले वया मनूतयस् शाऊलयात त्वःताहल।

9 अथे जुयाः शाऊलं धाल, “होमबलि व मेलबलित जिथाय् हजि।” अले वं होमबलि छाल।

10 शाऊलं होमबलि नकतिनि छाये सिधय् कूबलय् शमूएल वल अले शाऊल वयात नाप लानाः लसकुस यायेत वन।

11 शमूएलं धाल, “थ्व छिसं छु यानादियागु?” शाऊलं लिसः बिल, “मनूत जितः त्वःताः बिस्वुं वंगु जिं खना अले छिसं क्वछ्यूगु इलय् छि नं झाया मदी। पलिशतीत धाःसा मिक्माशय् मुनेगु शुरू यात।

12 जिं थथे बिचाः याना की ‘पलिशतीतयस् जितः गिलगालय् हमला यायेत वइ अले जिं ग्वाहालिया निंति परमप्रभुयाके बिन्ति नं यानागु मदु।’ अथे जुयाः जिं होमबलि छाये हे माः धकाः मतिइ तयाः थथे यानागु खः।”

13 शमूएलं शाऊलयात धाल, “छिसं मूर्ख ज्या यानादिल। परमप्रभु छिकपिनि परमेश्वरं छितः बियादीगु आज्ञाकथं छिसं यानामदी। छिसं मानय् याःगु जूसा वय्कलं छिगु राज्य इस्राएलय् सदांया निति ल्ययादी।

14 तर आः छिगु राज्य सदांया निति जुइ मखु। परमप्रभुं थःगु मन नाप मिलय् जूम्ह छम्ह मनू मालादीगु दु। अले वयात हे इस्राएलीतय् नायः ल्ययादीगु दु, छायाधाःसा छिसं परमप्रभुया आज्ञा मानय् मया।”

15 अनंलि शमूएल गिलगाल त्वःताः बेन्यामीनया गिबापाखे वन। अले शाऊलं थःनापं दुपि मनूत ल्याः खात। इपिं खुसः ति जक दु।

ल्वाभः मदुपि इस्राएलीत

16 शाऊल, वया काय् जोनाथन व व नापं दुपि मनूत बेन्यामीनया गिबाय् च्वन। पलिशतीतय्सं धाःसा मिकमाशय् पाल ग्वल।

17 पलिशतीतय्गु पालं लुतय् याइपिं स्वंगू पुचः वल। छगू पुचः शूआलया जिल्लाय दुगु ओप्रापाखे वन।

18 मेगु पुचः बेथ-होरोनपाखे वन। अले स्वंगू पुचः मरूभूमिया लिक्क लाःगु सबोईमया ब्यासिया च्वय् सिमानापाखे वन।

19 उगु इलय् इस्राएल न्यंक गन नं नैकःमि मदु, छायाधाःसा पलिशतीतय्सं हिब्रतय्गु तरवार व भाला मदय्केगु क्वःछिनातःगु खः।

20 इस्राएलीतय् थथःगु कु, त्वःकू, पा व ईचा नं पलिशतीतय्थाय् पाँय् तय्केत वनेमाः।

21 छपु कु व त्वःकू पाँय् तयेगु ज्याला निगू वहःया कुचा, अले द्रुहं ख्यायेगु क्वाकेचा मिलय् यायेगु व पा पाँय् तयेगु ज्याला छगू शेकेल वहःया स्वब्वय् छब्व* खः।

22 अथे जुयाः लडाइँ शुरू जूबलय् शाऊल व जोनाथनया ल्यूल्यू वःपिं मनूतय्के तरवार व भाला मदु। शाऊल व जोनाथनयाके जक दु।

23 उबलय् मिकमाशया भन्ज्याङ रक्षा यायेत पलिशतीतय्सं छपुचः सिपाईत छवयाहल।

14

जोनाथनं साहस मत्वःतुसे याःगु ज्या

* 13:21 १३:२१ छगू शेकेल वहःया स्वब्वय् छब्व थथे धयागु ४ ग्राम ति खः

1 छन्हू शाऊलया काय् जोनाथनं थःगु ल्वाभः ज्वनीम्ह ल्यायम्हम्ह मनूयात धाल, “वा, झीपि उखेपाखेया डौंढाय् च्वंगु पलिशतीतय्गु छाउनी वनेनु।” तर थ्व खँ वं थः बौयात मधाः।

2 उबलय् शाऊलं गिबाया लिक्कसं च्वंगु मिग्रोनय् धालेमाया तःलय् थःगु पाल ग्वयाः च्वनाच्चंगु खः। व नापं खुसः मनूत दु।

3 उपि मध्ये ईकाबोदया किजा अहीतूबया काय् अहियाह पुजाहारीया भिंगु सूती कापःया वसः फिनातःम्ह खः। अहीतूब पीनहासया काय् अले शीलौय् च्वम्ह परमप्रभुया पुजाहारी एलीया छय् खः। अले जोनाथन वंगु मनूतय्सं मसिल।

4 पहाडया दथुइ, गुगु लँपु जुयाः जोनाथन पलिशतीतय्गु छाउनी वनेमाःगु खः, अन बोसेस व सेनेह नांयागु निगू च्वामुगु पहाड दु।

5 उपि छगू मिक्माशया उत्तरपाखे व मेगु गेबाया दच्छिनपाखे दु।

6 जोनाथनं ल्वाभः ज्वनीम्हयसित धाल, “वा, झीपि परमेश्वरयात मानय् मयाइपिं उपिं म्हय् चिं मतःपिनिगु छाउनी स्वःवनेनु। परमप्रभुं झीत ग्वाहालि यानादी। झीपि यक्व दयेमा वा म्हो जुइमा झीत बचय् यायेगुपाखें वय्कःयात सुनानं पने फइ मखु।”

7 वं धाल, “छितः छु यायेगु पाय्छि जू व हे यानादिसँ। छिं यानादीगु फुक्क खँय् जिं छितः दुनुगलनिसें ग्वाहालि याये।”

8 जोनाथनं लिसः बिल, “ठीक जू! झीपिं उखेपाखे वनेनु अले इमिसं झीत खनेमा।

9 छुं जुयाः इमिसं ‘जिपि मवतले छिपि अन हे च्वनाच्चं’ धकाः धाल धाःसा झीपिं अन च्वनाच्चनागु हे थासय् च्वने, इमिथाय् वने मखु।

10 तर इमिसं ‘जिमिथाय् थाहां वा’ धकाः धाल धाःसा झीपि थाहां वने छायाधःसा परमप्रभुं इमित झीगु ल्हातय् लःल्हानादीगु दु धयागु व झीगु नितिं छगू चिं जुइ।”

11 अथे जुयाः इपिं पलिशतीतय्गु छाउनीइ खनेदय्क वन। अले पलिशतीतय्सं धाल, “स्वसा, हिब्रत थः सुचुला च्वंगु प्वालं पिहां वयाच्चंगु दु।”

12 अले इमिसं जोनाथन व वया ल्वाभः ज्वनीम्ह मनूयात तःसलं हालः थथे धाल, “छिपि थन याकनं थाहां वा। जिमिसं छिमित छुं खँ स्यने माःगु दु।”

अथे जुयाः जोनाथनं थःगु ल्वाभः ज्वनीम्हयसित धाल, “जिगु ल्यूल्यू वा, परमप्रभुं इमित इस्राएलीतय्गु ल्हातय् लःल्हानादीगु दु।”

13 जोनाथन लहाः तुतिं चुयाः च्वय् थाहां वन, अले वया ल्वाभः ज्वनीम्ह मनू नं वया ल्यूल्यू वन। जोनाथनं पलिशतीतयत् हमला यात अले वया ल्यूल्यू वयाच्चंम्ह ल्वाभः ज्वनीम्ह मनुखं इमित स्यात।

14 जोनाथन व वया ल्वाभः ज्वनीम्ह पेपी जग्गाय् न्हापां याःगु हमलाय् इमि निइम्ह मनूतयत् स्यात।

इस्त्राएलीतयस् पलिशतीतयत् त्याकूगु

15 अनंलि छाउनी व लडाईं जूगु थासय् च्वंपि फुक्क सेनात तसकं ग्यात। छाउनीइ दुपि सिपाईत व आकाझाकां हमला याइपि सिपाईत तसकं ग्यानाः खात। पृथ्वी सन अले इपि परमेश्वर खनाः तसकं ग्यात।

16 बेन्यामीनया लागाया गिबाय् पिवाः च्वनाच्चंपि शाऊलया मनूतयस् पलिशतीत ग्यानाः उखेंथुखें बिस्युं वनाच्चंगु खन।

17 अले शाऊलं सु सु सिपाईं मदु धकाः सीकेत थः मनूतयत् सिपाईत ल्याःखाय्त् धाल, अले जोनाथन व वया ल्वाभः ज्वनीम्ह अन मदुगु सीकल।

18 शाऊलं अहियाहयात धाल, “परमेश्वरया सनू थन हजि।” (उबलय् सनू इस्त्राएलीतनापं हे यंकाच्चंगु खः।)

19 शाऊल पुजाहारी नापं खँ ल्हाना च्वंबलय् पलिशतीतयगु छाउनीइ झन ततःसलं खलबल जुल। अथे जुयाः शाऊलं पुजाहारीयात धाल, “परमप्रभुलिसे सल्लाह कयाच्चनीगु ई मदु!”

20 अनंलि शाऊल व वया फुक्क सिपाईत पलिशतीतलिसें ल्वायेत वन। पलिशतीत धाःसा अलमलय् जुयाः तरवारं पाला थःथवय् हे ल्वानाच्वन।

21 गुलिखय् हिब्रत, गुम्ह पलिशतीतयस् इमिगु छाउनी यंकूगु खः। इपि हाकनं पलिशतीतयत् त्वःताः शाऊल व जोनाथननापं दुपि इस्त्राएलीतनापं मिलय् जूवल।

22 एफ्राइमया पहाडी देशय् सुलाच्चंपि इस्त्राएलीतयस् पलिशतीत बिस्युं वंगु खबर सिल, इपि नं मिलय् जुयाः पलिशतीतयत् लिनुलिनाः यंकल।

23 उखुन्हू परमप्रभुं इस्त्राएलयात बचय् यानादिल अले लडाईं बेथ-आवनया पारि तक न्यनावन।

जोनाथनं कस्ति नःगु

24 उखुन्हू इस्त्राएलीत तसकं त्यानु चाल, छायाःसा शाऊलं मनूतयत् थथे धकाः पाफ्यकातःगु खः, “जिं जिमि शन्नतयत् ब्वलामकातले सुनां सन्ध्या ई जुइ न्ह्यः छुं नसा नइ व मनुखं सराः फयेमा।” अथे जुयाः सुनानं नसाया सवाः तक नं मकाः।

25 इपि फुक्क मनूत छगू जंगल दुगु थासय् बल अन न्ह्याथासं हे कस्ति दुगु जुयाच्चन।

26 मनूत जंगलय् दुने दुहां वनेवं इमिसं हाप्बलं पिहां वयाच्चंगु खंकल, अथेसां शाऊलनापं पाफःगु खं लुमंकाः ग्यानाः सुनानं कस्ति कयाः मनः।

27 तर थः बौनं मनूतय् पाफय्कूगु खं जोनाथनं ताःगु हे मदु। वयाके दुगु कथि च्चकां हा प्वलय् सुयाबिल। अले वं थःगु ल्हाः ल्हनाः म्हुतुइ यंकाः नल। अनंलि वया म्हाय् बल वःगु वं सीकल।

28 अले छम्ह सिपाई वयाः वयात धाल, “छिमि बौनं सिपाईतय् पाफय्काः थथे धयादीगु दु, ‘थौं खुन्हु नसा नःम्ह मनूयात सराः लायेमाः।’ अथे जुयाः मनूत तसकं नयेपित्याकाः कमजोर जुयाच्चंगु दु।”

29 जोनाथनं धाल, “जिमि बौनं देय्या निति हानि यानादीगु दु। स्व, जि थ्व कस्ति नये धुंकाः बल वःगु दु।

30 शत्रुतपाखें थौं लुतय् याना हयागु नसा नये दःसा गुलि बांलाइगु खः। अले गुलि अप्वः पलिशतीतय् स्याये फइगु खः छकः बिचाः यानादिस्।”

31 उखुन्हु इमिसं पलिशतीतय् मिक्माशंनिसें अय्यालोन तक हे हमला यात। अले इपि नयेपित्यानाः तसकं कमजोर जुल।

32 इमिसं हथासं सामानत लुतय् यात अले फै, सा द्रुहं कयाः ख्यलय् हे स्यानाः हि* नापं नल।

33 “मनूतय्सं ला हिनापं नयाः परमप्रभुया विरोधय् पापयात” धकाः सुं वयाः शाऊलयात धाःवल।

शाऊलं धाल, “छिपि सकसिनं बाचा त्वाःथूगु दु।” “अथे जुयाः छम्बः तग्बःगु ल्वहं ग्वारातुइकाः थन जिथाय् हजि।”

34 अले शाऊलं धाल, “मनूतयगु दथुइ वनाः धा, ‘छिपि सकसिनं थथःगु फै व सा द्रुहं थन जिथाय् हजि अले उपि स्यानाः न। थथे ला नयेबलय् छिमिसं हिनापं नयाः परमप्रभुया विरोधय् पाप याये मते।’ ”

अथे जुयाः बहनी जुइ धुंकाः फुक्क मनूत थथःम्हं द्रुहं स्यानाहल अले अन हेस्यात।

35 अनंलि शाऊलं परमप्रभुया निति थःगु वेदी दय्कल। शाऊलं थ्व वेदी परमप्रभुया निति दय्कूगु दकलय् न्हापांगु वेदी खः।

* 14:32 १४:३२ हिया बारे स्वयादिसें उत ९:४; लेवी ७:२६,२७; १७:१०-१४; १९:२६; व्य १२:१६,२३; १५:२३

36 शाऊलं धाल, “झीपिं थौ चान्हय् क्वहां वनाः पलिशतीतय् हमला याः वनेनु। सुथया खिउँ खिउँ धाःबलय् तक हे इमित लुतय् यायेनु। इमि छम्ह नं मनूतयत् ल्यंकातये मखु।”

मनूतय्सं लिसः बिल, “छितः छु यायेगु बांलाः व हे यानादिसँ।”

तर पुजाहारीं धाल, “दकलय् न्हापां झीसं परमेश्वरयाके सल्लाह कायेनु।”

37 अथे जुयाः शाऊलं परमप्रभुयाके न्यन, “छु जिं पलिशतीतय् हमला यायेत वने ला? छु छिसं इमित इस्राएलीतय्गु ल्हातय् लःल्हानादियागु मखु ला?” तर उखुन्ह परमेश्वरं वयात छुं हे लिसः बियामदी।

38 अथे जुयाः वं धाल, “फुक्क मनूतय् नायःत न्ह्यःने वा अले थौं छु पाप जूगु दु सिइकेनु।

39 धात्थें इस्राएलयात उद्धार यानादीम्ह परमप्रभु म्वाःम्ह खः थें, जिमि काय् जोनाथनं हे पाप याःगु दुसा वयात स्यायेगु जुइ।” तर सुनानं छसः नं नमवा।

40 अनंलि शाऊलं फुक्क इस्राएलीतय् धाल, “छपिं सकलें छथाय् च्वं, अले जि व जिमि काय् जोनाथन छथाय् च्वने।”

अले मनूतय्सं धाल, “छितः छु यायेगु पायछि जू व हे यानादिसँ।”

41 अथे जुयाः शाऊलं परमप्रभु इस्राएलया परमेश्वरयात थुकथं प्रार्थना यात, “थौं छिसं थः दासयात छाया लिसः बियामदियागु? परमप्रभु, इस्राएलया परमेश्वर, सु दोषी खः सु दोषी मखु व जिमित क्यनादिसँ। छु जुयाः थ्व दोषं जि व जिमि काय् जोनाथनयागु हे खः धयागु जूसा, हे परमप्रभु इस्राएलया परमेश्वर चिष्टा तयेबलय् इमिगु भागय् ‘ऊरीम’ लायेमा। छु जुयाः थ्व दोष इस्राएलतय्गु खः धयागु जूसा इमित ‘तुम्मीम’ लायेमाः।[†]” मनूतपाखें जोनाथन व शाऊलयात चिष्टां अलग तयाबिल।[☆]

42 अनंलि शाऊलं धाल, “जि व जिमि काय् जोनाथनया दथुइ चिष्टा ति। अले चिष्टा जोनाथनया नामय् लात।”

43 शाऊलं जोनाथनयाके न्यन, “छं छु पाप यानागु दु? जितः धा।”

जोनाथनं धाल, “जिं थःगु कथि च्वकाय् यागु भतिचा कस्ति जक नयागु खः। छु अथेसा जि सी माल ला?”

44 शाऊलं धाल, “जोनाथन, छ मसित धाःसा परमेश्वरं जितः पक्का कडा सजाय बियादीमा।”

[†] 14:41 १४:४१ ऊरीम व तुम्मीम थुपि परमेश्वरया इच्छाकथं खँ क्वछित छ्यालिगु पवित्र त्वहंत खः।

[☆] 14:41 १४:४१ प्रस २८:३०; गन्ती २७:२१; १ शमू १७:२१; १ शमू २८:६; एज्र २:६३

45 तर मनूतयूसं शाऊलयात धाल, “छु जोनाथनयात स्यायेगु ला? थथे ला जुइ हे फइ मखु! व हे जोनाथन गुम्हयूसिनं फुक्क इस्राएलीतयगु निंतिं थुलि तःधंगु विजय यानादिल, व सीगु ला? धात्थें परमप्रभु म्वाःम्ह खः थें, वयागु छपु नं सँ बैय कुतुं वनी मखु, छायाःसा थौं वं हे परमेश्वरया ग्वाहालि ज्या याःगु दु।” थुकथं मनूतयूसं जोनाथनयात सीगुपाखें बचय् यात।

46 अनलि शाऊलं पलिशतीतयत् ल्यू वनीगु त्वःतल अले पलिशतीत थथःगु देशय् लिहां वन।

शाऊलया शासन व परिवार

47 शाऊलं इस्राएलय् शासन यानाच्चंबलय् वं प्यखेरं च्वंपिं शनूतनापं लडाइँ यात। वं मोआबीत, अम्मोनीत, एदोमीत, सोबाया जुजुपिं व पलिशतीतनापं लडाइँ यात। गन गन वं लडाइँ यात अन अन वं इमित बुकल।

48 वं अमालेकीतयत् नं त्याकल। थथे आकाझाकां हमला याइपिं सिपाइँतपाखें इस्राएलीतयत् बचय् यानाः वं तःधंगु साहस दुगु ज्या यात।

49 शाऊलया कायूपिं – जोनाथन, यिश्वी व मल्कीशूअ खः। वया तःधिकःम्ह म्हायया नां मेराब व कान्छिम्ह म्हायया नां मीकल खः।

50 वया कलाः धाःसा अहीमासया म्हाय् अहीनोम खः। अले वया सेनापति वया कका नेरया काय् अबनेर खः।

51 शाऊलया बौ कीश व अबनेरया बौ नेर अबीएलया कायूपिं खः।

52 शाऊलं थःगु जिवंकाछि पलिशतीतनापं लडाइँ याये माल। अथे जुयाः सु सु बल्लाः अले साहस यायेफु इमित हे थःगु ज्याया निंतिं सेनापति ल्ययादिल।

15

परमेश्वरं शाऊलयात त्वःतादीगु

1 शमूएलं शाऊलयात धाल, “परमप्रभुं छितः इस्राएलया जुजु अभिषेक या हूँ धकाः जितः छवयाहःगु खः। आः परमप्रभुया वचन ध्यान बियाः न्यनादिसँ।

2 दक्व शक्ति दुम्ह परमप्रभुं थथे धयादी, ‘इस्राएलीत मिश्र देशं पिहां वःबलय् अमालेकीतयूसं इमित हमला याःगुलि जिं इमित सजौय बी।

3 आः छिं अमालेकीतयत् हमला या हूँ अले इमिके दुगु फुक्क छुं नं ल्यंमदय्कः भज्यं नाश यानाब्यु। इमि फुक्क मनूत, मिसात, ल्याय्म्ह ल्यासेपिं, मचात, दुरु त्वंपिं मचात, सा द्रुहं, फै-च्चलय्, ऊँट व गंधा फुक्कं नाश या।’ ”

4 अथे जुयाः शाऊलं सिपाईतयत् सःताः तेलैमय् मुंकल। अन निगू लाख सिपाईत व झिद्रः यहदाया मनूत दु।

5 शाऊल थः सिपाईतनापं अमालेकया शहरय् वन अले अन चिब्यागु खौचय् ल्वायेत पियाच्चनाच्चन।

6 शाऊलं केनीतयत् धाल, “छिपिं अमालेकीतय् थासं त्वःता हूँ, मखुसा छिपिं नं इपिं नापंतुं नाश जुइ, छायाःसा इस्त्राएलीत मिश्र देशं पिहां वःबलय् छिमिसं दयामाया याःगु खः।” अथे जुयाः केनीतयसं अमालेकीतयत् त्वःतावन।

7 अनंलि शाऊलं अमालेकीतयत् हवीलानिसें मिश्रया पुर्वया लागाय् च्वंगु शूर तक हे हमला यात।

8 वं अमालेकीतय् जुजु अगागया फुक्क मनूतयत् तरवारं भज्यंक नाश यानाः अगाग जुजुयात धाःसा मस्यासे ज्वन।

9 तर शाऊल व वया सिपाईतयसं अगाग जुजुयात बचय् यात अले वया बांवांलाःपिं फै व सा द्रुहं, ल्हपिं साचा व भ्याःचा, गुलिखय् भिंगु भिंगु खँत धाःसा नाश मयासें तया तल। तर ज्याख्यलय् मज्जुगु व मू मवंगु फुक्क भज्यंक नाश यानाछवल।

10 परमप्रभुया वचन शमूएलयाथाय् वल,

11 “शाऊलयात जुजु यानाः जि तसकं पस्ताय् चाःगु दु, छायाःसा व जिपाखें तापाक वंगु दु, अले वं जिगु आज्ञा मानय् याःगु नं मदु।” शमूएलयात छु धाये छु धाये जुल, अले वं चच्छि खवयाः परमप्रभुयात बिन्ति यात।

12 कन्हय् खुन्हु सुथ न्हापां हे व शाऊलयात नापलायेत वन। तर “शाऊल कर्मेल डाँडाय् वनाः अन लुमन्तिया चिंकथं थःगु हनाबनाया निंति छगू सालिक दय्काः अनं गिलगालय् क्वहां वयाच्चन” धकाः वयात न्यंकल।

13 अन हे वं शाऊलयात नापलाकल अले शाऊलं वयात थथे धकाः हनाबना यात, “परमप्रभुं छितः आशिष बियादीमा! जिं परमप्रभुया वचन मानय् यानागु दु।”

14 तर शमूएलं धाल, “अथे जूसा फैतयगु सः व सा द्रुहंतयगु सः जिगु न्हाय्पनय् गथे ताये दुगु?”

15 शाऊलं लिसः बिल, “सिपाईतयसं उपिं अमालेकीतपाखें कयाः हःगु खः। इमिसं बांवांलाःपिं व सेल्लापिं फै व सा-द्रुहंत परमप्रभु छिकपिनि परमेश्वरया निंति बलि छायेत ल्यंकातःगु दु। अले ल्यंदुपिं फुक्कसित जिमिसं भज्यंक नाश यानाबिया।”

16 शमूएलं शाऊलयात धाल, “आसे! वंगु चान्हय् परमप्रभुं जितः छु धयादीगु दु व जिं छितः कने।”

शाऊलं धाल, “धयादिसँ!”

17 शमूएलं धाल, “उगु इलय् छि थःम्हं थःत जि ला छुं नं मखु धकाः ताय्कल, तर आः ला छि इस्राएली कुलतय् नायः खः। अले परमप्रभुं हे छितः जुजु अभिषेक यानादिल।

18 परमप्रभुं छितः इपिं दुष्ट जाति अमालेकीतय् भज्यंक नाश या धकाः कडा आज्ञा बियाः छवयाहयादीगु खः। इपिं फुक्क नाश मजुतले छिं इमित हमला यानातुं च्वनेमाःगु खः।

19 तर छिसं छाया् परमप्रभुया आज्ञा पालन मयानागु? छिं छाया् लुतय् यानाहःगु सामान कयागु? अले छाया् छिं परमप्रभुया न्ह्यःने छु मभिगु खः व हे यानागु?”

20 शाऊलं शमूएलयात लिसः बिल, “तर जिं ला परमप्रभुया आज्ञा पालन यानागु दु। परमप्रभुं धयादीगु थासय् जि वनागु दु अले अमालेकीतय् जुजु अगागयात ज्वनाः हयागु दु। तर इपिं मध्ये ल्यंदुपिन्त धाःसा भज्यंक नाश यानाबियागु दु।

21 लुतय् यानाः हःगु सामान मध्ये सिपाईतय्सं देछाय्माःगु भिपिं फै व सा-द्रं, अले दकलय् भिगु भिगु मालताल धाःसा गिलगालय् परमप्रभु छिकपिनि परमेश्वरया निंति बलि छायेत तयातःगु दु।”

22 तर शमूएलं धाल,

“परमेश्वरं होमबलि व बलि छायेगु स्वयाः अप्वः

परमप्रभु आज्ञा पालन याःगु हे यय्काः मदी ला?

आज्ञा पालन बलि छायेगु स्वयाः भिं,

अले वय्कया वचन पालन यायेगु फैया दा स्वयाः भिं।

23 वय्कःया आज्ञा मानय् मयायेगु हे तन्त्रमन्त्र यायेगु पाप थें खः,

अले तःछुइगु मूर्ति पुज्यायेगु ति हे मभिगु खः।

छिसं परमप्रभुया वचनयात त्वथगु दु,

अथे जुयाः परमप्रभुं नं छितः जुजुया सिंहासनं लिकयादीगु दु।”

24 शाऊलं शमूएलयात धाल, “जिं पापयात हैं! छु जिं परमप्रभुया आज्ञा व छिसं धाःगु खँ मन्यना ला। जि मनूतपाखें ग्याना, अले इमिगु खँ जिं न्यना।

25 जिं छितः इनाप याये, जिगु पाप क्षमा यानादिसँ, जिनापं झासँ, अले जि परमप्रभुया न्ह्यःने क्वछुनाः भागियाये।”

26 तर शमूएलं लिसः बिल, “जि छिनापं वने फइ मखु। छिं परमप्रभुया वचनयात क्वह्यंकूगुलि वय्कलं नं छितः इस्राएलीतय् जुजु जुइत क्वह्यंम्ह ताय्कादीगु दु।”

27 अले शमूएल वनेत फहिल तर शाऊलं वयागु गाच्चः ज्वन अले व गुत।

28 शमूएलं वयात धाल, “थौं परमप्रभुं इस्राएलया राज्य छिगु ल्हातं लाकाः छि स्वयाः भिम्ह मनूयात बियादीगु दु।

29 परमप्रभु, इस्राएलया गौरव खः, वय्कलं मखुगु खँ ल्हानादी मखु, अले थःगु मन हीकादी मखु। थःगु मन हीकादीत वय्कः मनू मखु।”

30 शाऊलं धाल, “जिं पाप यानागु दु। अथे जूसां दया यानाः जि प्रजाया थकालित व इस्राएलया न्ह्यःने छकः जकसां जिगु इज्जत तयादिसँ। जिनापं झासँ अले जिं परमप्रभु छिकपिनि परमेश्वरया न्ह्यःने आराधना याये।”

31 अथे जुयाः शमूएल शाऊलनापं लिहां वन, अले शाऊलं परमप्रभुया आराधना यात।

32 अनंलि शमूएलं धाल, “अमालेकीतय् जुजु अगागयात थन हजि।” अगाग दुक्क जुयाः थथे बिचाः यायां वल, “धात्थें हे जितः स्याइ मखुत, जि बचय् जुल।”

33 तर शमूएलं धाल,
“छंगु तरवारं यक्व मिसातय् मस्त मदुपि याः थें
छिमि मां नं आः मस्त मदुम्ह जुइ।”

अनंलि शमूएलं अगागयात परमप्रभुया न्ह्यःने गिलगालय् स्यात।

34 अनं लिपा शमूएल रामाय् वन, तर शाऊल थःगु छँय् गिबाय् वन।

35 शमूएल थः मसीतले हाकनं गुबलें शाऊलयात नापलाः मवन। तर वं शाऊलया निंतिं दुखं च्वना हे च्वन। अनंलि शाऊलयात इस्राएलीतय् जुजु दय्काःगुलि परमप्रभु तसकं पस्ताय् चाल।

16

दाऊदयात जुजु अभिषेक याःगु

1 परमप्रभुं शमूएलयात धयादिल, “छ ग्वःन्हु तक शाऊलया निंतिं दुखं च्वनेगु? जिं वयात इस्राएलया जुजुया थासं लिकाये धुनागु दु। अथे जुयाः छंके दुगु नेकुलिइ जैतूनया भतिचा चिकं तयाः ज्वनाः हूँ। जिं छन्त बेथलेहेमय् यिशैयाथाय् छवयेत्यनागु दु। छायाधाःसा जिं वया काय्पिं मध्ये छम्हय्सित जुजु ल्ययागु दु।”

2 तर शमूएलं धाल, “जिं गथे यानाः सीकेगु? शाऊलं थ्व खँ सिल धाःसा ला जितः वं स्याइ का।”

परमप्रभुं धयादिल, “छम्ह साचा छनापं हे यंकी अले ‘परमप्रभुया निति बलि छायेत वयागु खः’ धकाः धा।

3 अले यिशैयात नं बलि बीबलय् ब्वति कायेत इनाप या, अले छं यायेमाःगु छु खः व जिं छन्त धाये। जिं सुयात क्यने वयात जक छं जिगु निति जुजु अभिषेक या।”

4 अनंलि शमूएलं परमप्रभुं धयादीकथं यात। अले व बेथलेहेमय् वन। अन च्वंपि थकालितय्सं वयात नापलायेत ग्यात। इमिसं न्यनं, “छु छि याउँक झायादिया ला?”

5 शमूएलं धाल, “याउँक हे वया! जि परमप्रभुया निति बलि छायेत वयागु खः। छिपि नं थथःपिन्त शुद्ध यानाः बलि छायेत जिनापं वा।” अले वं यिशै व वया काय्पिन्त शुद्ध यानाः बलिया निति इमित सःतल।

6 इपि अन वल, शमूएलं एलीआबयात खनाः थथे बिचाः यात, “परमप्रभुया न्ह्यःने दंवने फुम्ह अले वय्कलं ल्ययादीम्ह जुजु पक्कां थ्व हे जुइमा।”

7 तर परमप्रभुं शमूएलयात धयादिल, “व तःधिकःम्ह जूसां अले तसकं बांलाःम्ह जूसां वयागु वास्ता याये मते। व जुजु जुइत ल्वःम्ह मखु, छायाधाःसा मनूतय्सं ला ख्वाः स्वयाः बिचाः याइ तर परमप्रभुं नुगः स्वयाः बिचाः यानादी।”

8 अनंलि यिशैनं अबीनादाबयात सःताः शमूएलया न्ह्यःने हल। तर शमूएलं धाल, “मखु, परमप्रभुं वयात नं ल्ययादीगु मखु।”

9 अनंलि यिशैनं शम्मायात हल। तर शमूएलं धाल, “परमप्रभुं थ्वयात नं ल्ययादीगु मखु।”

10 थुकथं यिशैनं थः न्हयम्ह काय्पिन्त शमूएलया न्ह्यःने हल, तर शमूएलं धाल, “परमप्रभुं थुपि छम्हय्सित नं ल्ययादीगु मखु।”

11 अनंलि शमूएलं यिशैयात न्यन, “छु छिकपिनि फुक्कं काय्पि थुलि हे खः ला?” अले यिशैनं धाल, “कान्छाम्ह छम्ह नं दनि तर व फै ज्वःवनाच्चन।”

शमूएलं यिशैयात धाल, “वयात थन सःताः हजि। व मवतले जिपि बलि छायेत फेतुइ मखु।”

12 अथे जुयाः यिशैनं मनूत छवयाः वयात सःतके छवत।

वया न्यता ह्याउँसे च्वं, मिखा तसकं बांलाः अले व हिसि दुम्ह ल्याय्म्हम्ह खः।

परमप्रभुं धयादिल, “थ्व हे खः, थ्वयात अभिषेक या!”

13 शमूएलं नेकुलि चिकं कयाः वया दाजुपिनिगु न्ह्यःने हे वयात अभिषेक यात। उखुन्हुनिसैं परमप्रभुया आत्मा दाऊदयाके वल। अनंलि शमूएल दनाः रामाया लँपु जुयाः वन।

दाऊद शाऊलया निंति म्ये हालीम्ह व ल्वाभः ज्वनीम्ह जुगु

14 परमप्रभुया आत्मां शाऊलयात त्वःतल, अले परमप्रभुं सास्ती बीगु आत्मा छवयाहयाः वयात तच्चकं सह याये मफयक कसाः यात।

15 शाऊलया च्यःतयूसं वयात धाल, “स्वयादिसँ! परमप्रभुपाखें वःगु सास्ती बीगु आत्मां छितः कसाः यानाच्चवंगु दु।

16 जिमि प्रभु, थःगु न्ह्यःने वयाः वीणा थाये फुम्ह च्यःयात मालाः हयेत उजं बियादिसँ। अले परमप्रभुपाखें वःगु व सास्ती बीगु आत्मां छितः कसाः याइबलय् व मनुखं वीणा थाइ अले छितः याउँसे च्वनी।”

17 अथे जुयाः शाऊलं थः च्यःतयूत धाल, “बांलाक थायेसःम्ह छम्ह मनूयात मालाः जिथाय् हजि।”

18 वया च्यःत मध्ये छम्हयसिनं धाल, “बेथलेहेमय् च्वम्ह यिशैया कायपि मध्ये छम्हयसिनं वीणा थाःगु जिं खनागु दु। व साहसी व वीर मनु खः। व खँ ल्हाये सःम्ह व स्वइबलय् बांलाःम्ह खः अले परमप्रभु नं वनापं दी।”

19 अथे जुयाः शाऊलं दूततयूत थ्व खबर बियाः यिशैयाथाय् छवत, “छिकपिनि फैजवाः काय् दाऊदयात जिथाय् छवयाहयादिसँ।”

20 अले यिशैनं थःकाय् दाऊदनापं छम्ह च्वलय्चा व मरिया कु क्वबियातःम्ह गधा व छगू छेगूया म्हेचा जायकः दाखमघ शाऊलयाथाय् छवल।

21 दाऊद शाऊलयाथाय् थयंकः वल अले वं थःगु ज्याय् दुथ्याकल। दाऊदयात शाऊलं तसकं माया यात अले व शाऊलया ल्वाभः ज्वनीम्ह जुल।

22 अथे जुयाः शाऊलं यिशैयाथाय् थथे धकाः खबर छवल, “दाऊदयात जिगु सेवा याकेब्यु छायाःसा जि व खनाः तसकं लय्ता।”

23 अले परमप्रभुपाखें व सास्ती बीगु आत्मा शाऊलयाके वक्व पतिकं दाऊदं वीणा कयाः थाइगु। अनंलि शाऊलयात याउँसे च्वनीगु अले व सास्ती बीगु आत्मां त्वःतावनीगु खः।

17

दाऊद व गोल्यात

1 पलिशतीतयूसं लडाइँ यायेत यहदाया सोकोय् थः सिपाइँतयूत मुंकल। अले इमिसं सोको व आजेकाया दथुइयागु एपेस-दम्मीमय् पाल ग्वल।

2 अले शाऊल व इस्राएलीत नं मुनाः एलाहया ब्यासिइ पाल ग्वल। इपि पलिशतीतनापं ल्वायेत इवःलाक च्वन।

3 पलिशतीत छगू डाँडाय् अले इस्राएलीत मेगु डाँडाय् इवलाक च्वन, इमिगु दथुइ छगू ब्यासि दु।

4 पलिशतीतयगु पालया दथुं गातय् च्वनीम्ह गोल्थत नांयाम्ह छम्ह दकलय् वीरम्ह सिपाईं इस्राएलीतनापं ल्वायेत वल। व स्वंगू मिटर ति तःधिकःम्ह खः।

5 वयागु छेनय् कँय्यागु तपुलि दु अले वं खुइगू किलोग्राम दुगु कँय्यागु कोट फिनातःगु दु।

6 तुतिइ कँय्यागु पाता तयातःगु दु अले वयागु ब्वहलय् कँय्यागु भाला पाछायतःगु दु।

7 वयागु भालाया कथि कापः थायेगु तानया कथि थें च्वं। भालाया च्चामुसे च्चका नँयागु खः, व न्हयगू किलोग्राम ति दु। वयागु ढाल क्वबिम्ह न्ह्यः न्ह्यः वन।

8 गोल्थत दनाः इस्राएलीतय्त तःसलं धाल, “छिपिं छाया लडाइँ यायेत वयागु? छु जि पलिशती मखु ला? अले छु छिपिं शाऊलया च्यःत मखु ला? जिनापं ल्वायेत छिमिं छम्ह मनू ल्य अले व ल्वायेत जिथाय् क्वहां वा।

9 छुं जुयाः व याकःचां हे जितः स्यात धाःसा जिपिं छिमि दास जुइ। तर छुं जुयाः जिं वयात स्यात धाःसा छिपिं जिमि दास जुयाः सेवा यायेमाः।”

10 अले व पलिशती धाल, “थौयागु न्हि जिं इस्राएलीतय्त क्वहंके। आँट दुसा जिनापं ल्वाये फुम्ह छम्ह मनू छ्वयाहिँ। अले झीपिं ल्वाये।”

11 शाऊल व इस्राएलीतय्सं व पलिशती धाःगु खँ न्यनेवं तसकं ग्यानाः नुगः कुतुवंकल।

दाऊद शाऊलया पालय्

12 आः दाऊद यिशै धाःम्ह एप्रातीया काय् खः। व यहदाया बेथलेहेमय् च्वंम्ह खः। यिशैया च्याम्ह काय्पि दु। शाऊलया इलय् व बःमलाय् धुंकूम्ह व बुरा जुइ धुंकूम्ह खः।

13 वया तःधिकःम्ह, माहिलाम्ह, साहिँलाम्ह काय्पि शाऊलनापं लडाइँलय् हे वनाच्वंगु खः। तःधिकःम्ह एलीआब, माहिलाम्ह अबीनादाब व साहिँलाम्ह शम्मा खः।

14 दाऊद दकलय् चिधिकःम्ह खः। उपिं स्वम्ह दाजुपिं शाऊलया ल्यूल्यू हे वंपि खः।

15 उबलय् शाऊलया छाउनी व बेथलेहेमय् थः बौया फैत स्वयेत वनीगु वयेगु यानाच्चंम्ह खः।

16 पिङ्हु तक सुथय् बहनी गोल्यत थःनापं ल्वायेत ख्याच्चः ब्युब्यु इस्त्राएलीतय् न्ह्यःने दं वयाच्चन।

17 छन्हु यिशैनं दाऊदयात धाल, “थ्व झिगू किलोग्राम सियातःगु अन्न व झिपा मरि ज्वनाः याकनं थः दाजुकिजापिनिगु पालय् हूँ।

18 थ्व झिक् पनीर धाःसा कप्तानयात यंकाब्यु। छिमि दाजुपिं छु छु यानाच्चंगु दु स्वयाः वा अले इमि म्हं फु धइगु खँ सीकेत छगू चिं ज्वनाः वा।

19 शाऊल जुजु, छिमि दाजुपिं व मेमेपिं फुक्क इस्त्राएलीत एलाहया बैसीइ पलिशतीतनापं लडाइँ यानाच्चंगु दु।”

20 दाऊद कन्हय् खुन्हु सुथ न्हापां दनाः फैत मेम्ह मनूयात स्वयाच्चँ धकाः धाल, नयेगु नसा ज्वनाः यिशैनं धाथें बिदा जुयाः वन। उबलय् इस्त्राएलीत पालं पिहां वयाः लडाइँया नितिं ततःसलं हालाः लडाइँ यायेगु ख्यलय् वनाच्चंबलय् व अन हे थ्यन।

21 इस्त्राएलीतय् व पलिशतीतय् सिपाइँत ल्वायेत थथःगु थासय् इवःलाक दनाच्चंगु जुल।

22 सिपाइँतयगु सामान स्वयाच्चंम्हयसित थःम्हं हयागु नसा जिम्मा बियाः ब्वाँय् वनाः थः दाजुपिं लडाइँ ख्यलय् इवःलाक च्वनाच्चंथाय् वन। अले थः दाजुपिन्त ज्वजलपा धकाः हनाबना यात।

23 वं दाजुपिनापं खँ ल्हाना च्वंबलय् गोल्यत न्ह्यःने वयाः न्ह्याबलें थें इस्त्राएलीतय् ख्याच्चः बिल। दाऊदं थ्व फुक्क खँ ताल।

24 गोल्यतयात खनाः इस्त्राएलीत ग्यानाः बिस्सुं वन।

25 इमिसं थःथवय् थथे धाल, “वयात स्वसा! व इस्त्राएलयात ख्याच्चः बीत पिहां वयाच्चंगु दु! वं धाःगु ख्याच्चःयात न्यै! वयात स्याइम्ह मनूयात शाऊल जुजुं तःधंगु सिरपाः बीगु अले थःम्ह्याययात नं व नापं ब्याहा यानाबी धकाः धाःगु दु। अले वया परिवारं नं कर पुलेमाली मखु।”

26 दाऊदं थः लिक्कसं च्वंपिं मनूतय्के न्यन, “थ्व पलिशतीयात स्याइम्हयसित व इस्त्राएलीतयगु थ्व बेइज्जतपाखें बचय् याइम्ह मनूयात छु दइ? म्वाःम्ह परमेश्वरयात मानय् मयाइम्ह म्हय् चिं मतःम्ह थ्व सु पलिशती खः?”

27 गोल्यतयात स्याःम्ह मनूयात गुकथं व्यवहार याइ धकाः मनूतय्सं वयात फुक्क खँ धाल।

28 दाऊदया तःधिकःम्ह दाजु एलीआबं थः किजां अथे मनूतनापं खँ ल्हानाच्वंगु ताल। अले व दाऊदनापं तं पिकयाः धाल, “छ छाया थन क्वहां वयागु? मस्भूमिइ फैत सुयात स्वकाः वयागु? छ घमण्डी व ध्वंलाइम्ह धकाः जिं स्यू। छन्त लडाईं स्वयेगु जक यः!”

29 दाऊदं धाल, “मखु, जिं छु यानागु दु धकाः? जिं छगू खँ नं न्यने मज्यू ला?”

30 अले हानं मेम्ह मनूपाखे स्वयाः व हे न्ह्यसः न्यन। खकः वं न्यन, वकः हे उथें लिसः दत।

31 गुलिखय् मनूतय्सं दाऊदं धाःगु खँ न्यन। अले शाऊलयात न्यंकाबिल। अले शाऊलं वयात सःतल।

32 दाऊदं शाऊलयात धाल, “महाराज! थ्व पलिशतीतनापं छति नं ग्याये म्वाः। छपिनि दास वनाः व नापं ल्वाःवने।”

33 शाऊलं लिसः बिल, “फइ मखु, छ गुकथं व नापं ल्वाये फइ? छ नकतिनिम्ह ल्याय्म्ह मचा तिनि अले व जिवंकाछि ल्वानाः वयाच्वंम्ह खः।”

34 तर दाऊदं शाऊलयात धाल, “स्वयादिसँ, जि छःपिनि दासं थः बौया फैत बिचाः यानाच्वनागु दु, सिंह व भालु वयाः बथानं फै सालाः यंकीबलय्

35 जि इमिगु ल्यूल्यू वनाः वयात हयकयाः वयागु म्हुतुं फैयात त्वःतकाः बचय् याना हयेगु। वं जितः नं हयकाः वःसा जिं वयात नं स्यानाबीगु।

36 छपिनि दासं सिंह व भालू निम्हयसित नं स्याये धुनागु दु। थ्व परमेश्वरयात मानय् मयाइम्ह म्हय् चिं मतःम्ह पलिशतीयात नं अथे हे यानाः स्यानाबी। वं म्वाःम्ह परमेश्वरया सिपाईतय्त क्वह्यंकूगु दु।

37 सिंह व भालूपाखें बचय् यानादीम्ह परमप्रभुं थ्व पलिशतीयागु ल्हातं नं जितः बचय् यानादी।”

शाऊलं धाल, “अथे खःसा छ हूँ, अले परमप्रभु छनापं दीमा।”

38 अनंलि शाऊलं दाऊदयात थःगु हे गा न्ययक्ल, नँ पाताया लं फिकाः, कँययागु तपुलि छैनय् पुइक्ल।

39 अले दाऊदं शाऊलया तरवार जँय् चित। अले व न्यासि वनेगु कुतः यात तर वने मफुत छायाधाःसा वयात व वसः पुनेगु बानी मदु।

अथे जुयाः वं शाऊलयात धाल, “थुपिं पुनाः जि वनेमफु छायाधाःसा थुपिं पुनेगु जितः बानी मदु।” अले वं व त्वःतल।

40 अनंलि वं थःगु कथि ल्हनाः खुसिं न्यागः पिचुसे पिचुसे च्वंगु ल्वहं कयाः थःगु म्हिचाय् तल। अले कय्कीगु खिपः ल्हातय् ज्वनाः व पलिशतीनापं ल्वायेत वन।

दाऊदं गोल्यतयात स्याःगु

41 अले व पलिशती थःगु ल्वाभः ज्वनीम्हय्सित न्ह्यः न्ह्यः तयाः दाऊदपाखे न्ह्यज्यात।

42 वं दाऊदयात लिकसं बांलाक स्वल, अले दाऊदया न्यता ह्याउँसे च्वंगु अले तसकं बांलाःम्ह ल्याय्म्ह मचायात खनाः वयात तसकं हेपय् यात।

43 वं दाऊदयात धाल, “छु जि खिचा खः ला? कथि च्वनाः जिनापं ल्वाः वयेत!” अले वं थः घःतय्गु नां कयाः दाऊदयात सराः बिल।

44 वं धाल, “का वा, जिं छंगु ला आकाशय् च्वंपिं चखुं व बैय् च्वनिपिं जन्तुतय्त नकेबी।”

45 दाऊदं लिसः बिल, “छ ला जिनापं ल्वायेत तरवार, भाला व च्वामुगु कथि ज्वनावःगु दु, तर जि छनापं ल्वायेत छं क्वह्यंकूम्ह इस्राएलया परमेश्वर दक्व शक्ति दुम्ह परमप्रभुया नामं वयागु दु।

46 थौंयागु दिं परमप्रभुं छन्त जिगु ल्हातय् लःल्हानादीगु दु, अले जिं छन्त स्याना छंगु छ्यं धेनाबी। थौं पलिशतीतयगु सीम्ह आकाशय् च्वंपिं चखुं व जमिनय् च्वंपिं जन्तुतय्त नकेगु जुइ। अले तिनि इस्राएलय् छम्ह परमेश्वर दु धकाः सारा संसारं सीका काइ।

47 अले थन दुपिं सकसिनं सीकी परमप्रभुं नं तरवारं न भालां बचय् यानादी। छायाःसा लडाइँ परमप्रभुयागु हे खः, अले वय्कलं हे छिपिं सकले जिमिगु ल्हातय् लःल्हानादीगु दु।”

48 व पलिशती दाऊदपाखे न्ह्यज्याः वंभलय् दाऊद नं व नापं ल्वायेत याकनं हे न्ह्यज्यानाः ब्वाँय् वन।

49 दाऊदं थःगु म्हिचाय् च्वंगु छग्वः ल्वहं लिकयाः खिपतय् तयाः व पलिशतीया कपालय् कय्काबिल। व ल्वहंचा वयागु कपालय् हे दुहां वन अले गोल्यत क्वपुसां पुयाः बैय् ग्वारात् वन।

50 थुकथं दाऊद थःगु खिपतः व ल्वहंचां यानाः त्यात। थःके तरवार मदुसां नं वं गोल्यतयात कय्काः स्यानाबिल।☆

51 अले ब्वांय् वनाः व पलिशती ग्वारातूगु थासय् वन अले गोल्थतयागु हे तरवार दापं कयाः वयागु छ्यं धेनाबिल।✧

पलिशतीतय्सं व तसकं बल्लाःम्ह मनू सीगु खनाः इपिं बिस्युं वन।

52 अनंलि इस्राएल व यहदाया मनूत तःसलं हा हां इमिगु ल्यूल्यू वन अले इमित गात व एक्रोनया मू ध्वाखाय् तक हे लिनायंकल। शारैमपाखें गात व एक्रोन वनेगु लैय् उखेंथुखें इमिगु सीम्ह जक जुल।

53 इस्राएलीतय्सं पलिशतीतय्त् लिना यंकाः लिहां वःबलय् इमिगु पाल लुतये यात।

54 दाऊदं गोल्थतया छ्यं ज्वनाः यरूशलेमय् हल, वयागु ल्वाभःत धाःसा थःगु हे पालय् तल।

दाऊदयात शाऊलया न्ह्यःने हःगु

55 शाऊलं दाऊद गोल्थत नापं ल्वायेत वंबलय् थः सेनापति अबनेरयात न्यन, “अबनेर, व ल्याय्म्ह मचा सुया काय् खः?”

अबनेरं धाल, “महाराज! छसपोल सदां म्वानादीमा! जिं मस्यू।”

56 जुजुं धाल, “अथेसा व सुया काय् सीका वा हूँ।”

57 दाऊद व गोल्थतयात स्यानाः लिहां वःबलय् अबनेरं वयात शाऊलया न्ह्यःने यंकल। दाऊदं व पलिशतीया छ्यं थःगु ल्हातय् ज्वनातःगु खः।

58 शाऊलं वयात न्यन, “अय् ल्याय्म्ह मचा, छ सुया काय् खः?”

दाऊदं लिसः बिल, “जि छसपोलया दास बेथलेहेमय् च्वंम्ह यिशैया काय् खः।”

18

जोनाथनं दाऊदयात माया याःगु

1 दाऊद शाऊलनापं खँल्हाबल्हा यायेधुंकाः जोनाथन दाऊदनापं आत्माय् मिलय् जुल अले वं दाऊदयात थःत थें हे माया यात।

2 उखुन्हुनिसें शाऊलं दाऊदयात थःनापं हे तल अले थः बौया छें लिहां वने मबिल।

3 जोनाथनं दाऊदयात थःत थें हे मायायाःगुलि जोनाथनं दाऊदनापं छगू बाचा चित।

4 जोनाथनं थःम्हं न्ययातःगु गा व फिनातःगु युवराजया तपाःलं त्वयाः थःगु तरवार, धनु व पेटीनापं दाऊदयात बिल।

5 शाऊलं याके छवःगु न्ह्याथें ज्याःगु ज्या यायेत नं दाऊद तसकं ताःलात। अले शाऊलं वयात थःगु सेनापतिया पदय् तयेत ल्यल। थुकथं वयागु मान व पद च्वन्ह्याःगुलि फुक्क सिपाईत व शाऊलया हाकिमत नं लय्ताल।

शाऊलं दाऊदयात डाहा याःगु

6 दाऊदं गोल्थतयात स्याये धुंकाः दाऊद व सिपाईत थथःगु छें लिहां वयाच्वंबलय् मिसात इस्राएलया फुक्क शहरं पिहां वल, अले इमिसं दम्फु व बाजं थाथां म्ये हालाः प्याखं हुहुं शाऊल जुजुयात नापलायेत वल।

7 मिसात लय्तातां थथे धकाः म्ये हाल,
शाऊलं द्रुलंद्रुःयात स्यात,

अले दाऊदं ला लखं लखयात स्यात।*

8 थुकिं यानाः शाऊल तसकं तंम्वल अले उपिं खँग्वलं वयागु नुगः क्वतुंवन। वं धाल, “दाऊदया नितिं इमिसं लखंलख धाल, जितः धाःसा इमिसं द्रुलंद्रुः जक धाल। अथेसा वयात ला जुजु हे धाःसा छुं मपानि।”

9 उखुन्हुनिसें शाऊलं दाऊदयात डाहा याना हल।

10 कन्हय् खुन्हु परमेश्वरयापाखें छगू सास्ती बीगु आत्मा शाऊलयाके दुहां वन। अले व थःगु छेंय वंय् थें अगमवाणी हाला जुल। न्हापा थें दाऊदं शाऊलया नितिं वीणा थाना तुं च्वन। शाऊलया ल्हातय् थःगु भाला ज्वनातःगु दु।

11 जिं दाऊदयात अंगलय् हे तानाबी धकाः मति तयाः वयात भालां कय्कल तर निकवः तक दाऊद चिलावनाः बचय् जुल।

12 शाऊल दाऊद खनाः दाह जुल, अले ग्यात छायाःसा दाऊदनापं परमप्रभु दी तर शाऊलयात परमप्रभुं त्वःतादी धुंकुगु खः।

13 अथे जुयाः वं दाऊदयात थःगु लायकुलि अलग तयाः द्रुःछिमह सिपाईत ल्यल। अले दाऊदं थः सिपाईतय् न्ह्यलुवाः जुयाः लडाईलय् ब्वना यंकल।

14 परमप्रभु व नापं दीगुलि वं याःगु न्ह्यागु ज्याय् नं व ताःलात

15 थुकथं दाऊद ताःलाःगु खनाः शाऊल व नापं तसकं ग्यात।

16 तर सकले इस्राएल वं यहूदां दाऊदयात तसकं माया यात, छायाःसा लडाईलय् वं इमित न्ह्यलुवाः जुयाः यंकुगुलि खः।

दाऊदं शाऊलया म्हायनापं ब्याहा याःगु

17 अनंलि शाऊलं दाऊदयात धाल, “जिं जिमि तःधिकःम्ह म्हाय् मेराबयात छनापं ब्याहा यानाबी, तर उकिया पलेसा छं जिगु सेवा यायेमाः अले परमप्रभुया नितिं लडाईं यायेमाः।” शाऊलं थःगु हे ल्हातं मखु तर पलिशतीतय्गु ल्हातं दाऊदयात स्यायेगु बिचाः याःगु खः।

18 तर दाऊदं लिसः बिल, “जि सु खः? अले जिमि परिवार सु खः? जिमि थःथितित इस्राएलय् सु दु? छु जि जुजुया जिलाजं जुइ फइ ला?”

19 शाऊलया म्हाय् मेराब दाऊदनापं ब्याहा यायेगु ई वल तर मेराबया ब्याहा ला छम्ह महोलाय् च्वनीम्ह अद्रीएल नांयाम्ह मनूनापं जक जुल।

20 तर शाऊलया मेम्ह म्हाय् मीकल दाऊदनापं मतिनाय् फसय् जुल। थ्व खँ शाऊलया न्हयपनय् थ्यनेवं व तसकं खुसी जुल।

21 वं थःगु मनय् थथे धकाः बिचाः यात, “जिं मीकलयात हे दाऊदनापं ब्याहा यानाबी। व दाऊदया नितिं छगू जाः जुइमा अले पलिशतीतय्सं वयात स्यायेमा।” अथे जुयाः शाऊलं दाऊदयात थः जिलाजं यायेत निक्वः खुसि इनाप यात।

22 दाऊदयात सुनानं मसीक थथे धा धकाः शाऊलं थः भारदारतय्त हुकुम यात, “जुजु छिनापं तसकं लयतायादीगु दु, अले छि जिपिं सकसित तसकं यल। अथे जुयाः आः छि जुजुया जिलाजं जुयादिसँ।”

23 अले शाऊलया मनूतय्सं दाऊदनापं थथे खँ ल्हात। वं इमित धाल, “जुजुया म्हाय्नापं ब्याहा यायेगु चिधंगु खँ बिचाः यानादिया ला? जि छुं मदुम्ह मनू जक खः। जिगु लागिं ला थ्व तसकं तःधंगु खँ खः।”

24 दाऊदं धाःगु खँ भारदारतय्सं शाऊलयात न्यंकल।

25 अले वं धाल, “दाऊदयात थथे धा, ‘शत्रुतय्त ब्वलासाय्गु नितिं जुजुं भम्चाया मूकथं सःछि पलिशतीतय्गु च्वफायेगुलिइ च्वंगु छेगू जक फवंगु दु।’ ” थुकथं पलिशतीतय्गु ल्हातं दाऊदयात स्यायेमा धकाः शाऊलं मति तःगु खः।

26 शाऊलं धाःगु खँ भारदारतय्सं दाऊदयात न्यंकल। अले दाऊद थ्व नियमकथं हे जुजुया म्हाय्नापं ब्याहा यायेत मानय् जुल। ब्याहा याये न्ह्यः,

27 दाऊद व वया थः मनूतनापं वनाः निसः पलिशतीतय्त स्यानाः इमिगु च्वफायेगुलिइ च्वंगु छेगू ध्यनाः जुजुयाथाय् हल, गुकिं यानाः दाऊद जुजुया जिलाजं जुइ फयेमा। अनंलि शाऊलं थः म्हाय् मीकलयात दाऊदनापं ब्याहा यानाबिल।

28 थुकथं परमप्रभु दाऊदनापं दी धइगु खँ शाऊलं खन, अले थः म्हाय् मीकलं वयात मतिना याना तुं च्वन धकाः नं सीकल।

29 अथे जुयाः व दाऊदनापं अझ अप्वः ग्यात अले थःगु ल्यं दुगु जिवंकाछि हे व दाऊदया शत्रु जुल।

30 पलिशतीतय् सिपाईत व हाकिमत लडाईं यायेत वया तुं च्वन तर फुक्क लडाईंलय् दाऊद हे त्यात। शाऊलया मेपिं हाकिमत स्वयाः अप्वः व हे त्याइगु खः। थुकथं दाऊदया नां फुक्क थासय् बयबय् जुल।

19

शाऊलं दाऊदयात स्यायेत कुतः याःगु

1 दाऊदयात स्यायेगु धकाः शाऊलं थःकाय् जोनाथन व थः फुक्क भारदारतयत् धाल। तर जोनाथनं दाऊदयात तसकं येयक्कु जुयाच्चन।

2 अथे जुयाः थः बौ शाऊलं छन्त स्यायेगु कुतः यानाच्चंगु दु धकाः जोनाथनं दाऊदयात कनाबिल। अले जोनाथनं धाल, “कन्हय् सुथय् बांलाक होश यानाच्चं अले गनं खने मदगु थासय् वनाः सुपिलाच्चं।

3 जि पिहां वयाः छ सुपिलाच्चंगु बुँइ थः बौया मेखेपाखे दं वये, अले बौनापं छंगु बारे खँ ल्हाये। छुं खँ सीदत धाःसा जिं छन्थाय् वयाः धाये।”

4 अथे जुयाः जोनाथनं थः बौ शाऊलयात थथे धाल, “स्वयादिसँ, थः दास दाऊदयात छुं मभिं याये मते। वं गुबलें छिगु मभिं याःगु मदु। वं याःगु ज्यां छितः फाइदा हे जूगु दु।

5 व पलिशतीयात स्याःबलय् वं थःगु ज्यान तकं पात। परमप्रभुं इस्राएलीतयत् तःधंगु विजय बियादिल, अले छि व खनाः लयत्तायादीगु खः। छम्ह छुं दोष मदुम्ह मनूयात छि छाय् मभिं याये त्यनागु, छाय् छुं कारण हे मदय्क दाऊदयात स्याये त्यनागु?”

6 शाऊलं जोनाथनया खँ न्यन अले थथे पाफयाः धाल, “गथे धातर्थे परमप्रभु म्वाःम्ह खः, दाऊदयात नं स्यायेगु जुइ मखु।”

7 अले जोनाथनं दाऊदयात सःतल अले वयात फुक्क खँ धयाबिल। अनंलि जोनाथनं दाऊदयात शाऊलयाथाय् हल अले वं न्हापा थें तुं जुजुया सेवा यात।

8 लडाईं हाकन शुरु जुल। दाऊदं पलिशतीतयत् बांमलाक बुकल अले इपिं वया न्ह्यःनं बिस्वुं वन।

9 तर छन्हू, शाऊल थःगु ल्हातय् भाला ज्वनाः छें तुं च्वनाच्चंगु खः। अले परमप्रभुया सास्ती बीगु आत्मां वयात त्वपुल। अले दाऊदं वीणा थानाच्चन।

10 शाऊलं दाऊदयात अंगलय् हे ताना: छवये धका: भालां कय्कल तर दाऊद चिला वन अले भाला वना: अंगलय् यग्गात। उखुन्हु चान्हय् हे दाऊद बिस्सुं वना: बचय् जुल।

11 वयात सुथय् हे स्यायेगु बिचा: याना: शाऊलं थ: दूतयत् दाऊदया छँ चिवा कायेत तल। तर दाऊदया कला: मीकलं ख्याच्च: बिया: वयात धाल, “छि थौं चान्हय् हे बिस्सुं मवन धा:सा कन्हय् छित: स्याइ।”☆

12 मीकलं दाऊदयात छपा इयालं क्वछवल अले व सुनानं मखंक बिस्सुं वन।

13 अनंलि मीकलं छगू मूर्ति कया: वयागु लासाय् तयाबिल। अले च्वलय्चिया सँ तया: मूर्तियात लं फिका: छ्यं फुंगा तलय् तयाबिल।

14 दाऊदयात ज्वनेत शाऊलं छवयाह:पि मनूत व:बलय् मीकलं धाल, “व ला म्हं मफयाच्चंगु दु।”

15 शाऊलं हाकनं इमित दाऊदयात थ:गु हे मिखां स्वया वा धका: लितछवल। शाऊलं इमित थ्व उजं बिल, “वयागु खाता नापं ल्हना: जिथाय् हजि अले जिं वयात स्यानाबी।”

16 इपि हाकनं वल अले खाताय् मूर्ति व छ्यं फुंगा तलय् च्वलय्चिया सँ लुइकल।

17 शाऊलं मीकलयात धाल, “छं छाय् जित: मखुगु खँ ल्हानागु? जि शत्रुयात छाय् याउँक हे बिसिके छवयागु?” मीकलं लिस: बिल, “वं जित: बिसिके मछवसा छन्त स्याये धका: ख्याच्च: बिल।”

18 दाऊद रामाय् शमूएलयाथाय् बिस्सुं वन अले शाऊलं थ:त गुकथं व्यवहार या:गु ख: व फुक्क शमूएलयात धाल। अनंलि दाऊद व शमूएल नैयोतय् वना: अन हे च्वन।

19 दाऊद रामाया नैयोतय् दु धइगु खँ सुं छम्हयसिनं शाऊलयात धाल।

20 दाऊदयात ज्वनेत छपुच: सिपाइँत अन छवत। इमिसं शमूएल न्ह्यलुवा: जुया: छपुच: अगमवत्तात नापं अगमवाणी कनाच्चंगु खन। अले शाऊलया सिपाइँतयके नं परमेश्वरया आत्मा वल अले इमिसं नं अगमवाणी धयाहल।

21 शाऊलं थ्व खँ न्येनेवं वं मेगु छपुच: सिपाइँत छवयाहल। इमिसं नं अगमवाणी ल्हायेगु यात। अले स्वक्व: खुसि नं सिपाइँतयत् छवयाहल। इमिसं नं अगमवाणी ल्हायेगु शुरू यात।

22 अनंलि शाऊल थ: हे रामाय् वन अले सेक्यू च्वंगु त:धंगु बुंगालय् थ्येनेवं वं थथे धका: न्यन, “शमूएल व दाऊद गन दु हँ?”

अले इमिसं धाल, “इपिं ला रामाया नैयोतय् दु।”

23 शाऊल अनया लैपु जुया: वनाच्चंबलय् परमप्रभुया आत्मा वयाके नं वल अले रामाया नैयोतय् तक हे वं नं अगमवाणी धाधां वन।

24 वं अन थःगु लं त्वःतल अले शमूएलया न्ह्याःने अगमवाणी धाधां उखुन्हु न्हिच्छि चच्छि पचिनांगां हे बैय् ग्वारातुलाच्चन। अथे जुया: मनूतय्सं थथे धयाहल, “छु शाऊल नं अगमवक्तातय्गु पुचःयाम्ह हे जुल ला?☆”

20

जोनाथनं दाऊदयात ग्वाहालि याःगु

1 अनंलि दाऊद रामाय नैयोतपाखें बिस्युं वना: जोनाथनयाथाय् वन। वं वयात धाल, “जिं छु यानागु दु? जिगु छु दोष दु? छिमि बौया विरोधय् जिं छु मभिगु यानागु दु अले छाया वं जितः स्यायेत स्वःगु?”

2 जोनाथनं लिसः बिल, “थथे मजुइमा! छि सी मखु। जितः मन्यंसे जिमि बौनं छुं यानादी मखु धका: जिं सी हे स्यू। अले थ्व खँ जिमि बौनं छाया सुपिका तइ लय? थ्व खँ सत्य मखु।”

3 तर दाऊदं धाल, “छितः जि गुलि यः धका: छिकपिनि बौनं स्यू, छिकपिनि बौनं थःगु मनय् थथे धाःगु दु, ‘थ्व खँ जोनाथनं मसीमा, मखुसा व दुःखी जुइ।’ धाथें परमप्रभु म्वाःमह खः थें अले छि म्वाःमह खः थें, जिगु मृत्यु न्ह्याःने थ्यंकः वःगु दु।”

4 जोनाथनं दाऊदयात धाल, “छितः छु याःसा यः जिं छिगु निंति व हे याये।”

5 दाऊदं लिसः बिल, “कन्हय् अमाइया नखः खः अले जि जुजुलिसें नयेत्वने यायेमाः। तर जि कंस सन्ध्या ई तक बुँइ हे सुपिलाच्चने।☆

6 छुं जुया: छिकपिनि बौनं जितः लुमंकल धाःसा वयकःयात थथे धयादिसँ, ‘बेथलेहेमय् थःगु छें याकनं वने माःगुलि दाऊदं जिनापं बिदा कया: वन छायाधाःसा दैय्दसं अन वया परिवारनापं बलि छायेमाःगु जुयाच्चन।’

7 छुं जुया: वयकलं ‘व पायछि जू’ धका: धाल धाःसा छिकपिनि दास बचय् जुइ। तर वयकः तसकं तंम्वल धाःसा जिगु निंति भिं बिचाः याःगु मदु धका: छिं सीकादिसँ।

8 स्वयादिसँ, छपिनि दासयात सदां दयाच्चनीगु दयामाया यानादिसँ, छायाःसा छि व जि परमप्रभुया न्ह्यःने बाचा चिनागु दु। जि दोषी जूसा छिं हे जितः स्यानादिसँ। छाया जि छिमि बौया ल्हातं सी माल?”

9 जोनाथनं धाल, “अथे मखु! जिमि बौनं छिगु मभिं यायेगु मति तःगु दु धइगु जिं स्यूगु जूसा छन्त मधाइ ला?”

10 दाऊदं जोनाथनयात धाल, “छिकपिनि बौ तंपिकयाः छितः ब्वःब्यूगु खँ सुनां वयाः जितः धाः वइ?”

11 अले जोनाथनं दाऊदयात धाल, “वा, जिनापं बुँइ वनेनु।” अले इपि निम्हं बुँइ वन।

12 जोनाथनं धाल, “दाऊद, परमप्रभु इस्राएलया परमेश्वरया न्ह्यःने जिं पाफयाः धाये, कंस थ्व हे इलय् जिं थः बौलिसे खँ ल्हाये, छिगु बारे वयक्ःया बिचाः बांलासा जिं छितः खबर याये।

13 तर जिमि बौनं छिगु बारे मभिं बिचाः याःगु दुसा, जिं छितः खबर बियाः याउँक बिसिके मछवल धाःसा परमप्रभुं जितः स्यानादीमा। परमप्रभु जिमि बाःलिसें दीगु थें छिनापं नं दीमा।

14 जि म्वानाच्चंतले परमप्रभुं थें छि जितः सदां दयाच्चनीगु दया माया यानादिसँ।

15 जिगु परिवारयात नं सदां दयाच्चनीगु दया माया यायेगु गुबलें त्वःतादी मते, परमप्रभुं पृथ्वीई फुक्क छिगु शत्रुतयत् नाश याये धुंक्सां नं त्वःतादी मते।☆”

16 जोनाथनं दाऊदया वंशनापं थुकथं बाचा चित, “परमप्रभुं दाऊदया फुक्क शत्रुतयत् सजौंय बियादीमा।”

17 हाकनं छकः जोनाथनं दाऊदयात थः पक्का माया याये धकाः बाचा ल्हाकल छायाःसा वं दाऊदयात थःत थें तुं माया याःगु खः।

18 अले वं दाऊदयात धाल, “कन्हय् अमाइया नखः खः। छि मझाल धाःसा थाय् खालि जुइ अले सकसिनं सीकी छि थन मदी।

19 कंस खुन्हु छ न्हापा आपत जूबलय् सुपिलाच्चंगु थासय् वनाः सुपि हूँ अले अन एजेलया ल्वहंया ल्युने पियाच्वँ।

20 जिं उकियात ताकय् यानाः कयक् थें च्वंक स्वंगू तीरं कयके।

21 अले जिं छम्ह ल्याय्महयसित व मालेत छवयाहाये। जिं वयात थथे धाये, ‘स्व, तीरत छ च्वनाच्चंगु थासं थुखेपाखे दु, कयाहिँ हूँ’ धकाः धायेबलय् छ

सुलाच्चंगु थासं पिहां वयेफु। धात्थें परमप्रभु म्वाःम्ह खः थें, जिं पाफयाः धाये छितः छुं जुइ मखु, धन्दा कयादी म्वाः।

22 तर जिं व ल्याय्म्हयसित ‘स्व, तीरत छंगु उखेपाखे दु’, धकाः धायेबल्य् छि झासँ, परमप्रभुं हे छितः छवयादीगु खः।

23 झीपि निम्हयसिया दथुइ परमप्रभुयात साक्षी तयाः यानागु बाचा न्ह्याबलेंया निति जुइ।”

24 अथे जुयाः दाऊद बुँइ सुपिला च्वन। अमाइया नखःबल्य् अले जुजु भ्वय् नयेत फेतुनादिल।

25 जुजु न्ह्याबलें थः च्वनेगु थासय् अंगया लिक्कसं तुं च्वन। जोनाथन शाऊलया चुलिचू उखेपाखे च्वन। अले अबनेर जुजुया लिक्क च्वन। दाऊदयाथाय् धाःसा खालि दु।

26 उखुन्हु शाऊलं छुं मधाः। वं “व विधिकथं अशुद्ध जुयाः व मवःगु जुइमा, धात्थें व अशुद्ध हे जुल जुइ” धकाः बिचाः यात।

27 तर कन्हय् खुन्हु ला निगूगु दिं दाऊदयाथाय् हानं खालि हे तिनि। अले शाऊलं जोनाथनयात न्यन, “म्हिगः व थौं यिशैया काय् दाऊद छाया भ्वय् नयेत मवःगु?”

28 जोनाथनं शाऊलयात धाल, “दाऊदं बेथलेहेमय् वनेत जितः थथे धकाः बित्ति यात,

29 ‘जिमि परिवारपिं शहरय् बलि छायाच्चंगु दु। जिमि दाजुं जितः अन वा धकाः आज्ञा यानाच्चंगु दु। छिसं जितः येयकादीसा, जिमि दाजुयाथाय् वनेबियादिसँ।’ अथे जुयाः व छिगु भोजय् वये मफुत।”

30 थ्व खँ न्यनाः शाऊलं जोनाथननापं तंपिकायाः धाल, “ग्वाज्यः, छ विद्रोही मिसाया काय् खः। छ यिशैया काय्या पं लिनाच्चंगु दु धकाः जिं स्यू। थुकथं छं थःगु व थःत बुइक्मह मांयागु बेइज्जत याःगु दु।

31 यिशैया काय् म्वानाच्चंतले छं थ्व देशया जुजु जुइ फइ मखु धकाः छं थ्व खँ सीकाति। आः थथें वनाः वयात थन जिथाय् सःताः हजि। वयात धात्थें स्यायेमाः।”

32 जोनाथनं थः बौयात लिसः बिल, “छाय् वयात स्याये हे माः? वं छु याःगु दु?”

33 तर थ्व खँ न्यनाः शाऊलं थःगु भाला ल्हनाः काय्यात कयकाछवत। अले थः बौनं दाऊदयात पक्का हे स्यायेत स्वयाच्चंगु खः धकाः सीकल।

34 अले जोनाथन तसकं तंम्वयाः टेबिलं दनाः वन, नखःया निन्हु खुन्हु वं छुं नं मनः। छायाःसा वया बौनं दाऊदयात मछालपुगु व्यवहार याःगुलि वया नुगः क्वतुन।

35 कन्हय खुन्हु सुथय क्वःछिनातःगु इलय् हे जोनाथन दाऊदयात नापलायत छम्ह ल्याय्मम्ह ज्वनाः बुँपाखे वन।

36 वं व ल्याय्मम्हयसित धाल, “जिं तीर कय्के छ ब्वाय् वनाः तीर माला हिं।” अले व वन, व पुलावने न्ह्यः हे जोनाथन तीर कयकल।

37 व जोनाथन वाण कय्कूगु थासय् थ्यनाः जोनाथनं तःसलं थथे धाल, “स्व, वाण छंगु उखेपाखे दु।

38 ई सितिं छवये मते, याकनं या।” अले वं तीरत कयाः थः मालिकयाथाय् तुं लिहां वल।

39 तर थुकिया कारण जोनाथन व दाऊदं जक स्यू। व ल्याय्महयसिनं छुं नं मस्यू।

40 जोनाथनं थःगु ल्वाभः वयात बिल अले शहरय् यंकि धकाः धाल।

41 व ल्याय्मम्ह वने धुंकाः दाऊद दच्छिनं त्वहंया ल्युने पिहां वयाः जोनाथनयात क्वछुनाः स्वकः तक भागि यात। अले निम्हयसिनं चुप्पा नयाः निम्हं ख्वल। अले जोनाथनयात स्वयाः दाऊदयात अप्वः दुःख लगय् जुल।

42 अनलि जोनाथनं दाऊदयात धाल, “याउँक हूँ, छ व जि अले छिकपिनि सन्तान व जिमि सन्तानया दथुइ सदां साक्षी जुयादीम्ह परमप्रभुया नामं झीसं बाचा चिनागु दु।” अले दाऊद याकनं हे अनं वन, जोनाथन धाःसा शहरय् तुं लिहां वन।

21

दाऊदं छायेहःगु मरि काःगु

1 दाऊद अहीमेलेक पुजाहारीयाथाय् नोबय् वन। अहीमेलेक थरथर खाखां दाऊदयात नापलायेत वल, अले वयात धाल, “छि छाया याकःचा जक झायागु? छिनापं छाया सुं नं मवःगु?”

2 दाऊदं अहीमेलेक पुजाहारीयात धाल, “जितः छु ज्या यायेत जुजुं छवयाहःगु खः, व सुयातं धाये मते धाःगु दु। जिं थः मनूतय्त जितः छथाय् नापलाः धकाः धयागु दु।

3 आः, छिके नयेगु छु दु? जितः न्यापा मरि बियादिसँ वा गुलि दु उलि बियादिसँ।”

4 अले पुजाहारी वयात लिसः बिल, “जिके छायातःगु शुद्ध मरि बाहेक मेगु मरि मदु। तर छु छिकपिनि मिजंत मिसानापं लसपस मयासैं च्वनाच्वंगु खःसा छिसं थ्व यंकादीफु।”

5 दाऊदं पुजाहारीयात लिसः बिल, “थौं तक जिपिं छुं ज्याया निंति वनीबल्य् मिसातपाखें तापाक्क हे च्वनागु दु। चिचाधंगु ज्या यायेत वनीबल्य् ला इमिगु अंग नं चोख जू धाःसा थौंया न्हि झन इमिगु अंगत गुलि शुद्ध जुइ।”

6 अथे जुयाः अन छायातःगु मरि मेगु मदुगुलि व पुजाहारी वयात छायातःगु मरिसां बिल। व मरि परमप्रभुया न्ह्यःनं कयाहयाः उखुन्हु हे क्वाःगु मरि हाकनं व हे थासय् तयातःगु खः। ☆

7 शाऊलया दासत मध्ये सुं छम्ह नं उखुन्हु अन परमप्रभुया न्ह्यःने च्वनाच्वंगु खः। वयागु नां एदोमी दोएग खः। व शाऊलया फैजवाःतय् मूम्ह नायः खः।

8 दाऊदं अहीमेलिकयात धाल, “छुं छिके भाला व तरवार दु ला? जिगु थःगु हे तरवार वा मेगु सामान ल्हातय् मदु छायाधःसा जुजुं हुकुम बियादीगुलि जि हथाय् चाचां वया।”

9 पुजाहारी लिसः बिल, “एलाहया ब्यासिइ छिसं स्यानादीम्ह पलिशती गोल्थतया तरवार थन दु। थ्व कापतं हिनाः पुजाहारीया भिंगु सूती कापःया लंया ल्युने तया तयागु दु। व यंकेगु इच्छा दुसा यंकादिसैं थन मेगु छुं ल्वाभः मदु।” दाऊदं धाल, “थ्व थें ज्याःगु तरवार मेगु मदु। जितः थ्व हे बियादिसैं।”

दाऊद गातय् वंगु

10 उखुन्हु दाऊद शाऊलया थासं बिस्सुं वनाः गातया जुजु वन।

11 तर आकीशया हाकिमतय्सं वयात धाल, “छु व देय्या जुजु दाऊद मखु ला? वयागु बारे प्याखं हुलाः इमिसं थथे म्ये हाःगु खः -

“शाऊलं द्रुलंद्रुयात स्यात,

अले दाऊदं लखं लखयात स्यात।”

12 थ्व खँ दाऊदं मनय् तया तल अले व गातया जुजु आकीश खनाः तसकं ग्यात।

13 अथे जुयाः वं उमिगु न्ह्यःने वँय् जूम्ह थें यानाक्यन। इमिगु सकसिगु न्ह्यःने मू ध्वाखाया निखें च्वंगु पःखालय् च्वच्चः अले दाही लाः त्वाला-त्वाला वय्काः वँय् थें पहः यानाच्वन।

14 अले आकीशं थः दासतयत् धाल, “स्व, थ्व मनू ला वँय् जूगु दु। छाया छिमिसं थ्वयात जिथाय् हयागु?

15 छु जिथाय् वँय् जूपि मदयाः जितः दुःख बीत वयात हयागु ला? छु वयात जिगु छँय् दुकायेगु ला?”

22

अदुल्लामया गुफाय् दाऊद

1 दाऊद गातं बिस्युं वनाः अदुल्लामया गुफाय् वन। वया दाजुपिन्सं व परिवारं थ्व खँ सिल अले इपि दाऊदयाथाय् वल।

2 कष्टय् लाःपि, धिबा पुलेमानिपि व चित्तबुझय् मज्जूपि मनूत प्यसःति वयाथाय् मुन अले व इमि नायः जुल।

3 अनं दाऊद मोआबया मिस्पाय् वनाः मोआबया जुजुयात बिनित्ति यात “परमेश्वरं जिगु निति छु यानादी व मस्युतले दया यानाः जिमि मां-बौयात छिगु हे शरणय् तयादिसँ।”

4 अले दाऊदं थः मां-बौयात मोआबया जुजुया लायकुलिइ हे त्वःताथकल। व सुरक्षित थासय् सुलाच्चंबलय् इपि मोआबयाम्ह जुजुया लायकुलिइ च्वनाच्वन।

5 छन्हु अगमवक्ता गादं दाऊदयात धाल, “छि थन च्वनादी मते, याकनं यहूदियाय् झासँ।” अथे जुयाः दाऊद अनं हारेत धाःगु बनय् वन।

शाऊलं नोबया पुजाहारीयात स्याःगु

6 अले शाऊलं दाऊद व वया मनूत खनेदुगु खबर न्यन। व गिबाया डाँडा च्वकाय् च्वंगु तितिसिमाया तलय् ल्हातय् भाला ज्वनाः च्वन। वया सकलें हाकिमत वया चाकःछिं च्वन।

7 शाऊलं थः मनूतयत् धाल, “हे बेन्यामीनीत, जिगु खँ बांलाक ध्यान बियाः न्यँ। छु यिशैया काय् नं छिमित बुँ व दाखक्यब बी अले छिमित दूःछि व सःछिया पुचःया सेनापति दय्की धकाः छिमिसं आशा यानाच्वना ला?

8 अथे जुयाः छिपि सकलें मिलय् जुयाः जिगु विरोधय् मभिं गु ज्याया ग्वसाः ग्वयागु ला? अयनं जिमि काय् नं यिशैया काय् लिसें बाचा च्यूगु खँ छिपि सुनानं जितः मधाः। छिपि सुनानं जिगु वास्ता हे मयाः। जिमि हे काय् नं जि थः हे दासयात जिगु विरोधय् यंकाः थौं जितः स्यायेत पिवाः तय्कातल, अयनं छिमिसं जितः छुं मधाः।”

9 तर शाऊलया भारदारतय् दथुइ दनाच्चंम्ह एदोमी दोएणं धाल, “जिं यिशैया काय्यात नोबय् अहीतूबया काय् अहीमिलेकयाथाय् वयाच्चंगु खना।

10 अहीमिलेकं वयागु पंलिना: परमप्रभुनापं सल्लाह फ्वन। अनंलि वं नयेगु नसा व पलिशती गोल्थतया तरवार नं दाऊदयात बिल।”

11 अले शाऊलं अहीतूबया काय् नोबया पुजाहारी अहीमिलेक व नोबय् पुजाहारीया ज्या याइपिं वया अबुया फुक्क परिवारयात सःतके छवत। अले इपिं सकले जुजुया न्ह्यःने वल।

12 शाऊलं धाल, “अय् अहीतूबया काय्, न्यँ!”

अले वं लिस: बिल, “मालिक, धयादिसँ!”

13 शाऊलं वयात धाल, “छ व यिशैया कायनं जिगु विरोधय् छाय् मखुगु ज्या यायेगु ग्वसा: ग्वयागु? छं वयात नयेगु नसा व तरवार नं बिल हँ, वयागु पंलिना: परमेश्वरनापं सल्लाह नं काल हँ। व जिगु विरोधय् दंगु दु अले आ: थौं व जित: स्यायेत स्वयाच्चंगु दु।”

14 अहीमिलेकं लिस: बिल, “छसपोलया दासत मध्ये दाऊद विश्वास याये बहःम्ह मनु, जुजुया जिचाभाजु, छि थःगु हे वास्ता याइम्ह अङ्गरक्षकतय् कप्तान अले लायकुलिइ सकसिनं हनाबना यानातःम्ह, छिगु घरानाय् व थें ज्याःम्ह मेपिं सु दु धकाः?”

15 खः, जिं वयागु पंलिना: परमेश्वरयाके सल्लाह कयाः, थ्व न्हापांगु सल्लाह नं ला मखुनि। छिगु विरोधय् मखुगु ज्या यायेत सल्लाह बिल धका: छिकपिनि दासयात सुनानं दोष बियादी मते। थुकिया बारे जिं छुं हे मस्यु।”

16 तर जुजुं धाल, “अहीमिलेक, छन्त स्यायेगु जुइ। छ व छं फुक्क परिवारनापं स्यायेगु जुइ।”

17 अले शाऊलं थःगु न्ह्यःने दनाच्चंम्ह पाःच्चंम्हय्सित धाल, “वना: परमप्रभुया पुजाहारीतयत् स्यानाब्यु। छाथःसा इमिसं दाऊदनापं मिलय् जुया: व बिस्सुं वनाच्चंगु खँ सिक सिकं नं जित: मधाल।”

तर जुजुया हाकिमत मध्ये सुनानं परमप्रभुया पुजाहारीतयत् स्यायेत ल्हा: ल्हने मानय् मजुल।

18 अथे जुया: जुजुं एदोमी दोएगयात धाल, “अय् दोएग, वना: पुजाहारीतयत् स्या।” अले एदोमी दोएणं वना: पुजाहारीतयत् स्यात। उखुन्हु वं चयन्याम्ह एपोद फिनातःपिं पुजाहारीतयत् थःगु हे ल्हातं स्यात।

19 अनंलि वं पुजाहारीया शहर नोबया फुक्क प्राणीतयत् स्यानाबिल, गथेकि, मिजंपिं, मिसात, मचात, दुरु त्वंपिं मचात, सा द्रहं, गधा, फै-च्चलय् फुक्कं स्यानाबिल।

20 अहीमेलेकया अबियाथार नांयाम्ह छम्ह काय् धा:सा दाऊदयाथाय् बिस्युं वन।

21 शाऊलं गुक्कथं परमप्रभुया पुजाहारीतयत् स्यात व फुक्क खँ वं दाऊदयात धयाबिल।

22 अले दाऊदं वयात धाल, “उखुन्हु एदोमी दोएग अन हे च्वनाच्चंगु खः अले वं शाऊलयात फुक्क खँ धयाबी धका: जिं स्यू। छं बौया फुक्क छँजःपिं स्यूगुया कारण जि हे जुल।

23 छ थन हे जिनापं तुं च्वँ, ग्याये मते। छंगु प्राण कायेत स्वःमंह जिगु नं प्राण कायेत स्वःगु खः। छ जिनापं सुरक्षित जुइ।”

23

दाऊदं कीलाह शहरया रक्षा या:गु

1 पलिशतीतयसं कीलाह शहर हमला याना: नकतिनि मुंकात:गु न्हगु अन्न लाकायंकल, दाऊदं थ्व खँ न्यन।

2 अले वं परमप्रभुयाके थथे धका: सल्लाह काल, “जि वना: उपिं पलिशतीतयत् हमला याये कि मयाये?”

अले परमप्रभुं लिस: बियादिल, “वना: इमित हमला या हूँ, अले कीलाह शहरयात बचय् या।”

3 तर दाऊदया मनूतयसं वयात धाल, “अथें ला झीपिं यह्दाय् ग्यानाच्चनागु दु कीलाहय वना: पलिशतीतय् सिपाईतयत् हमला या: वन धा:सा इन झीत तसकं थाकु मजुइ ला?”

4 दाऊदं हाकनं छक: परमप्रभुयाके सल्लाह काल। अले परमप्रभुं थथे धका: लिस: बियादिल, “कीलाह शहरय् हूँ। जिं पलिशतीतयत् छंगु ल्हातय् बी।”

5 अथे जुया: दाऊद व वया मनूत कीलाह शहरय् वन, अले पलिशतीतनापं लडाईं यात। इमिसं यक्व पलिशतीतयत् स्याना: इमिगु सा द्रहं यंकल। थुकथं दाऊदं कीलाह शहरयागु रक्षा यात।

6 अहीमेलेकया काय् अबियाथार बिस्युं वना: दाऊदनापं मिलय् जूव:बलय् थ:नापं पुजाहारीया भिंगु सूती काप:या लं नं यंकूगु खः।

7 दाऊद कीलाहय् वंगु खँ सुं छम्हयसिनं शाऊलयात कन अले वं धाल, “इमित परमेश्वरं जिगु ल्हातय् लःल्हानादीगु दु। पःखालं घेरय् यानातःगु बल्लाक गजबार तयातःगु ध्वाखा दुगु शहरय् दाऊद थःम्हं थः हे दुहां वनाः कुंकेगु थें जूगु दु।”

8 अथे जुयाः शाऊलं थः सिपाईतय्त लडाईया निंति मुंकल अले कीलाहय् हमला यानाः दाऊद व वया मनूतय्त घेरय् यायेत छवत।

9 शाऊलं थःत हमला यायेत तयार याःगु दु धइगु खँ न्यनाः दाऊदं पुजाहारी अबियाथारयात धाल, “एपोद ज्वनाः थन वा।”

10 अनलि दाऊदं धाल, “हे परमप्रभु इस्राएलया परमेश्वर, शाऊल कीलाहय् वयाः जिगु कारणं व शहरयात नाश यायेगु बिचाः याःगु दु धइगु खँ जि छिकपिनि दासं न्यनागु दु।

11 छु कीलाहय् च्वपिं मनूतय्सं जितः शाऊलया ल्हातय् लःल्हाइ ला? छु जिं न्यना थें शाऊल धातर्थें हे वइ ला? परमप्रभु इस्राएलया परमेश्वर, छपिनि दासं बिन्ति याये, छपिनि दासयात लिसः बियादिसँ।”

परमप्रभुं लिसः बियादिल, “शाऊल पक्का हे वइ।”

12 हाकनं दाऊदं न्यन, “छु कीलाहय् च्वपिं मनूतय्सं जितः व जिमि मनूतय्त शाऊलया ल्हातय् लःल्हाइ ला?”

परमप्रभुं लिसः बियादिल “पक्का इमिसं अथे हे याइ।”

13 अथे जुयाः दाऊद व वया खुसः ति मनूत कीलाह त्वःतावन। अले इपिं छगू थासं मेगु थासय् चाःहिला जूल। दाऊद कीलाह त्वःता वंगु खबर न्यनाः शाऊल थःगु योजनाकथं अनं न्हांमवन।

दाऊद पहाडी देशय्

14 दाऊद पहाडी देशय्, जीपया मरुभूमिया सुरक्षित थासय् वनाः सुला च्वंवन। शाऊलं वयात न्हिया न्हि हे मालाच्वंगु खः। तर परमप्रभुं दाऊदयात वयागु ल्हातय् लःल्हाना मदी।

15 दाऊद जीपया मरुभूमिइ होरेशय् च्वनाच्वंगु खः। उबलय् शाऊलं थःत स्याइन धकाः दाऊदं थुइकल।

16 अन जोनाथनं वयात नापालात अले वयात परमेश्वरपाखें दइगु सुरक्षाय् पक्का यानाः हपाः बिल।

17 वं थथे धाल, “ग्याये मते, जिमि बौ शाऊलं छन्त छुं हानि याये फइ मखु। छि हे इस्राएलया जुजु जुइ अले जि धाःसा छि स्वयाः क्वय् च्वनीम्ह जुइ धकाः जिमि बौ शाऊलं नं थ्व खँ स्यू।”

18 थुपि निम्हयसिनं परमप्रभुया न्ह्यःने थःथवय् स्वापु तयाः पवित्र बाचा चीत। अले जोनाथन थःगु छँ लिहां वन दाऊद धाःसा होरेशय् तुं च्वन।

19 जीपया छुं मनूत गिबाय् शाऊलयाथाय् वनाः थथे धाल, “दाऊद जिमिगु लागाय् हकीला पहाडया होरेशय् सुलाच्चंगु दु। थ्व यशिमोनया दच्छिनपाखे लागाय् दु। थ्व यहदाया मरूभूमिया दच्छिनपाखे लागाय् दु।

20 महाराज, जिमिसं स्यू वयात ज्वनेत छिगु तःधंगु इच्छा दु। अथे जुयाः छि जिमिगु लागाय् झासँ अले वयात छिगु ल्हातय् लः ल्हायेगु जिम्मा जिमिगु जुइ।”

21 शाऊलं लिसः बिल, “छिमिसं जिगु निंति दया याःगुलि परमप्रभुं छिमित आशिष बियादीमा!

22 वनाः हाकनं छकः पक्का या। व गन दु, अन वयात सुनां खन, व बांलाक न्येनेकेने यानाः स्व। व तसकं चलाखम्ह खः धकाः जिं न्यना तयागु दु।

23 व सुलाच्चंगु फुकक थाय् लुइकि अले याकनं जिथाय् खबर ज्वना वा। थ्व ज्या पक्का हे या अनंलि जि छिपिनापं वने। अयूनं व अनयागु हे लागाय् च्वनाच्चन धाःसा फुकक यहदा देशय् माःवने माःसां जिं वयात माला लुइका हये।”

24 अथे जुयाः इपि लिमबाकुसे शाऊल स्वयाः न्हापालाक हे जीपपाखे वन। दाऊद व वया मनूत धाःसा यशिमोनया दच्छिनपाखे अराबाया माओन मरूभूमिइ च्वनाच्चंगु दु।

25 शाऊल व वया मनूत दाऊदयात मालेत वन। थ्व खँ न्यनाः दाऊद ततःग्वःगु ल्वहंत दुगु माओन मरूभूमिइ वनाः च्वंवन। शाऊलं थ्व खँ न्यनेवं व दाऊदयात मालेत माओनया मरूभूमिइ वन।

26 शाऊल व वया मनूत डाँडाया छेपाखे अले दाऊद व वया मनूत डाँडाया मेखेपाखे दुगु खः। शाऊल व वया मनूत न्ह्याःवयाः लिक्क थ्यंकः वल अले दाऊद व वया मनूत धाःसा याकन याकन बिस्सुं वनेत सनाच्चन। शाऊल व वया मनूतय्सं इमित ज्वनेत सन।

27 व हे इलय् छम्ह दूत अन थ्यंकः वल अले शाऊलयात धाल, “थनं याकनं लिहांझासँ! पलिशतीतय्सं देशय् हमला याः वये धुंकल!”

28 अथे जुयाः शाऊल दाऊदयात लिउ वनेगु त्वःताः पलिशतीतय्नापं ल्वाः वन। थुकथं व थाय्यात सेला-हामालेकोथ* धाल।

29 अले दाऊद अनं वनाः एन-गदीया लागाय् सुला च्वंवन।

* 23:28 २३:२८सेला-हामालेकोथ अर्थात बायावनीगुया ल्वहंही

24

दाऊदं शाऊलयात मस्यासे त्वःताब्यगु

1 शाऊल पलिशीतनापं लडाईं यानाः लिहां वये धुंकाः इमिसं धाल, “स्वयादिसैं, दाऊद एन-गदीया मरूभूमिइ दु।”

2 अथे जुयाः शाऊलं फुक्क इम्राएलीतपाखें ल्ययातःपिं बल्लाःपिं स्वद्रः सिपाईत ज्वनाः गुंदुगु च्वनीगु ल्वहंधीया पुर्बय् दाऊद व वया मनूतय्त मालेत वन।

3 वैं लँपुइ लाःगु फैगलय् थ्यन, अन छगू गुफा नं दुगु जुयाच्वन। व हे गुफाया कुन्चाय् थ्यंक दाऊद व वया मनूत सुलाच्वंगु खः। शाऊल व गुफाय् झारा च्वनेत दुहां वन।

4 दाऊदया मनूतय्सं वयात धाल, “थ्व व हे न्हि खः गुकिया बारे परमप्रभुं धयादिल। वय्कलं छि शत्रुत छिगु ल्हातय् लःल्हानादी, अले इमित छिं छु याये यः याये फु।” शाऊलं मचाय्क दाऊदं चिसकं क्वछुनाः वनाः वय्कःया गाया च्वः चानाबिल।

5 तर दाऊदं शाऊलयागु गाया च्वः चाःगुलि वया विवेकं थःत दोष बियाच्वन।

6 अले वं थः मनूतय्त धाल, “परमप्रभुं जुजु अभिषेक यानादीमह जिमह मालिकयात जिं थःगु ल्हाः ल्हने म्वालेमा। परमप्रभुं हे बचय् यानादीमा छायाःसा व परमप्रभुया अभिषेक जूमह खः। जिं वयागु छुं भतिचा नं हानि याये म्वालेमा।”

7 अले दाऊदं थः मनूतय्त “शाऊलयात हमला याये मते” धकाः पन।

शाऊल दनाः गुफां पिहां वयाः थःगु लँपु जुयावन।

8 अनंलि दाऊद नं गुफां पिहां वयाः शाऊलयात थथे धकाः सःतल, “हे जिमि प्रभु, महाराज।” शाऊलं लिफः स्वल। अले बैय् भ्वःसुलाः दाऊदं

9 शाऊलयात थथे धाल, “जिं छितः हानि याइन धकाः मनूतय्सं धाल धायेवं छिं इमिगु खँ न्यने ज्यू ला?”

10 थौं छपिन्सं हे खंगु दु गुफाय् दुने परमप्रभुं छितः जिगु ल्हातय् लःल्हानादीगु। जिमि गुलिखय् मनूतय्सं छितः स्यायेमाः धकाः धाःगु दु अय्यं जिं छितः मस्यासे त्वःताबिया। अले जिं धया, “जिं थःगु ल्हाः जिमि मालिकया विरोधय् ल्हने मफु छायाःसा वय्कः परमप्रभुया अभिषेक जूमह खः।”

11 स्वयादिसैं! हनेबहःमह अबु, जिगु ल्हातय् दुगु थ्व छिगु हे गाया कुचा खः। स्वयादिसैं! जिं व जक चाना, छितः मस्याना। थुकिं हे छिसं सीकादिसैं, छिगु

विरोधय् विद्रोह यायेगु अले छितः मभिं यायेगु नं मति मतया। जिं छिगु छुं हे मभिं मयाना। अयनं छिं जितः स्यायेत लिनाजुल।

12 “झीपिं निम्हयसियागु दथुइ परमप्रभुं हे न्याय यानादीमा। छिसं जिगु विरोधय् यानादीगु ज्याया नितिं परमप्रभुं हे छितः बदला कयादीमा। अयनं जिं धाःसा थःगु ल्हाः छिगु विरोधय् गुब्सं ल्हने मखु।

13 न्हापा थथे धयातःगु उखान छिसं सी हे स्यू ‘मभिंम्ह मनूपाखें मभिगु हे पिहां वइ।’ अथे जुयाः जिं थःगु ल्हाः छिगु विरोधय् ल्हने मखु।

14 “इस्त्राएलया जुजु सुयागु विरोधय् दनावइ? छिसं सुयात लिनाच्चनागु दु? छम्ह सीम्ह खिचा, छम्ह कुसियात मखु ला?

15 परमप्रभुं हे झीगु न्याय यानादी अले झीपिं निम्ह मध्ये सु ठीक जू अले सुयाके दोष दु धकाः फैसला यानादी। वयकलं हे थुकिया जाँच यानादीमा अले जितः बचय् यानाः जि खःम्ह मनू खः धकाः थहरय् यानादीमा।”

16 दाऊदं थथे धाये धुंकाः शाऊलं धाल, “छु छ धात्थें व हे खः ला, जिमि काय् दाऊद?” अले वं मिखां ख्वबि वयकल।

17 अनंलि वं दाऊदयात धाल, “छ ला जि स्वयाः नं भिंम्ह जुल, जिं छन्त मभिगु व्यवहार याःसां तक नं छं जितः भिगु व्यवहार हे यात।

18 खः, छं थौं जितः छ जि प्रति गुलि भिंम्ह खः व क्यन। परमप्रभुं जितः छंगु ल्हातय् लःल्हानादिल अयनं छं जितः मस्याः।

19 सु मनुखं थः शत्रुयात नापलाकाः वयात छुं मयासैं त्वःताछ्वइ ला? अथे जुयाः थौंयागु न्हिइ छं जि प्रति छु याःगु दु परमप्रभुं उकिया पलेसा छन्त तःधंगु इनाम बियादीमा।

20 आः जिं छ हे पक्का जुजु जुइत्यंगु दु धकाः सिल। अले इस्त्राएलया राज्य छंगु ल्हातं हे शासन याइ।

21 अथे जुयाः जिमि परिवारयात स्याये मखु अले जिगु नां जिमि अबुया घरानापाखें हुयाछ्वये मखु धकाः परमप्रभुया नामं छं पाफयाः धा।”

22 अथे जुयाः दाऊदं शाऊलनापं अथे हे याये धकाः पाफल। अले शाऊल छें लिहां वन। दाऊद व वया मनूत धाःसा थः सुलाच्चंगु सुरक्षित थासय् तुं वन।

25

शमूएल सीगु

1 शमूएल सित अले सकलें इस्राएलीत मुना: दुखं च्वन। इमिसं वयात रामाया थःगु हे छैं लिक्कसं थुन।

दाऊद व अबीगेल

अनंलि दाऊद माओनया मरूभूमिइ क्वहां वन।

2 अन माओनय् छम्ह मनू दु। वया कर्मेल शहरय् यक्व सम्पत्ति दु। व तसकं धनीम्ह खः। वया स्वद्रः फै व द्रःछि च्वलय् दु। वं कर्मेलय् थः फैतय्गु सँ चानाच्वंगु खः।

3 वयागु नां नाबाल खः अले वया कलाःया नां अबीगेल खः। अबीगेल तसकं बांलाःम्ह व बुद्धि दुम्ह खः। तर वया भाःत कालेबया वंशया छम्ह नुगः छाःम्ह व मभिंगु ज्या याइम्ह खः।

4 नाबालं थः फैतय्गु सँ चानाच्वंगु धयागु खँ मरूभूमिइ दाऊदं न्यन।

5 वं थः झिम्ह मनूतय्त थथे धयाः छवत, “कर्मेलय् हूँ अले नाबालयात लुइकाः जिं ज्वजलपा धयाहःगु दु धयाब्यु।

6 छिमिसं वयात धयाब्यु, ‘छि, छिकपिनि परिवार अले छिनापं दुपि सकलें मनूतय्गु भिं जुइमा। छि थः फैतय्गु सँ चानाच्वंगु दु धयागु खँ जिं न्यनागु दु।

7 “ ‘छिकपि फैजवाःत थुलिमछि दिं तक जिमिथाय् च्वन नं जिमिसं इमित दुःख मबिया अले इपि कर्मेलय् दुबलय् नं इमिगु छुं तंगु नं मदु।

8 छिकपिनि थः मनूतय्के न्यनादिसँ, अले इमिसं छितः फुक्कं सत्य खँ धयाबी। जिमि मनूतय्त दया यानाः स्वीकार यानादिसँ छायाःसा थौंयागु न्हि तसकं भिं अले छिकपिनि दासतय्त व छपिनि काय् दाऊदयात छु बी फु बियादिसँ।’ ”

9 दाऊदया मनूत वयाः नाबालयात दाऊदयापाखें थ्व खबर बिल। अनंलि इपि लिसःया नितिं पियाच्वन।

10 नाबालं दाऊदया मनूतय्त थथे लिसः बिल, “दाऊद सु खः? थ्व यिशैया काय् धाःम्ह सु खः? थौंकन्हय् अप्वः यानाः दासत थः मालिकपाखें बिस्युं वनाच्वंगु दु।

11 जि नयेगु नसा, जि त्वनेगु दाखमघ व फैया सँ चाइपिनिगु नितिं ज्वरय् यानातयागु ला म्हमस्यूपिं मनूतय्त जिं छाया बियेगु?”

12 दाऊदया मनूत लिहां वयाः थःगु लैपु जुयावन अले दाऊदयात थ्व फुक्क खँ कनाबिल।

13 दाऊदं थः मनूतयत् धाल, “सकसिनं थथःगु तरवार ज्वँ।” इपिं सकसिनं थथःगु तरवार जँय् चित अले दाऊदं नं थःगु तरवार जँय् चित। प्यसःति मनूत दाऊदया ल्यूल्यू वन अले निसःति मनूत धाःसा सामान स्वयेत च्वन।

14 नाबालया सुं छम्ह च्यलं नाबालया कलाः अबीगेलयात धाल, “दाऊदं क्वमिलु जुयाः मरूभूमिइ झी मालिकयात ज्वजलपा धाय्केत मनूत छवयाहःगु खः। तर वं ला इमित हेस्यात।

15 इमिसं जिमित तसकं बांलाःगु हे व्यवहार यात अले जिमित दुःख नं मब्यू। इपिं नापं तुं जिपिं ख्यलय् न्ह्याथासं वंसां जिमिगु छुं नं मालसामानत तंगु नं मदु।

16 जिपिं थः फैत ज्वःवनेबलय् इपिं चान्हि जिमिगु चाकःछिं पःखाः थें च्वनाबीगु खः।

17 आः छु यायेमाःगु खः छिं बांलाक बिचाः यानादिसँ छायाःसा झी मालिक व वया परिवारय् पक्का हे नाश वयेत्यंगु दु। व तसकं लुच्चाह मनु खः व नापं ला सुं नं मनु खँ तक नं ल्हाइ मखु।”

18 अथे जुयाः हथाय् चाचां निसःपा मरि, निगू मशक छेंगूया म्हिचाय् दाखमघ, न्याम्ह फैया ला, निइनिगू किलोग्राम सियातःगु अन्न, सच्छिगः किस्मिस व गंकातःगु निसःगः यःमरिसि अबीगेलं कयाः गधातय् म्हाय् तयाबिल।

19 अले थः च्यःतयत् धाल, “छिपिं न्ह्यःने न्ह्यःने हँ जि ल्यूल्यू वये।” तर थुकिया बारे वं थः भाःतयात धाःसा छुं हे मधाः।

20 व गधाया म्हाय् गयावनाः पहाडया बच्छि लैपुइ थ्यंबलय् अन दाऊद व वया मनूत थःपिनिपाखे वयाच्चंगु खन। अले अबीगेलं इमित नापलात।

21 दाऊदं थथे मति तयाच्चंगु खः, “मरूभूमिइ छुं नं मतंक उलिमछि बांलाक थ्व मनूया सम्पत्ति रक्षा यानागु ला सिति वन। वं जितः भिं यायेगु पलेसा मभिंगु यात।

22 कन्हय् सुथय् तक व नापं दुपिं छम्ह जक मिजंत म्वानाच्चन धाःसा परमेश्वरं जितः कडा सजाँय बियादीमा।”

23 अबीगेलं दाऊदयात खनाः हथाय् चाचां थःगु गधानं क्वहां वल अले दाऊदया न्ह्यःने बैय् पुलि चुयाः

24 पाली भवःपुयाः थथे धाल, “हे जिमि प्रभु, जितः हे दोष लायेमा। छिकपिनि दासीयात छकः खँ ल्हाय्के बियादिसँ, जिमि प्रभु, छपिनि दासया खँ न्यनादिसँ।

25 जिमि मालिक, व लुच्चाह मनूया च्यूताः तयादी मते। गथे वयागु नां नाबाल खः व अथे हे खः। वयागु नांया अर्थ ‘मूर्ख’ खः अले वयागु पहःचहः नं अथे हे च्वं। तर जिं छिकपिनि दासं धाःसा छपिन्सं छवयाहयादीपि मनूतयत् खनागु मदु।

26 “आ: हे जिमि प्रभु, ल्वापु ख्या:पु याना: हि हायेकेगु व बदला कायेगु खँय छित: परमप्रभुं पनादीगु दु। धात्थें परमप्रभु छिकपिनि परमेश्वर म्वा:म्ह ख: थें, अले छि म्वा:म्ह ख: थें, जिं धाये, छपिनि शत्रुतयगु व छिकपिनिगु नाश जुइगु ययकीपिनिगु गति नाबालया थें हे जुइमा।

27 जि छिकपिनि दासीं थ: प्रभुयाथाय् ज्वना: वयागु कोस्यालि थन दु। थ्व छपिनि अधीनय दुपिं मनूतयत् बियादिसँ।

28 हे जिमि प्रभु, छिकपिनि दासीं मभिं या:गु दुसा क्षमा यानादिसँ। परमप्रभुं छिकपिनि वंशयात सदां दयका तयादी, छायाधा:सा छिं परमेश्वरया हे लडाइँ यानादीगु दु। छपिनिगु जिवंकाछि छु नं कथंयागु मभिंगु मजुइमा।

29 छुं जुया: सुं मनुखं छित: हमला याना: छिगु प्राण कायेत स्वल धा:सा परमप्रभु छिमि परमेश्वर मनूतयगु तसकं मू वंगु सम्पत्तिया रक्षा या:थें हे छिगु प्राण रक्षा यानादी। छिकपिनि शत्रुतयगु प्राण धा:सा वय्कलं खिपतय् ल्वहं तया: वांछव:थें वान्छवयादी।

30 परमप्रभु जिमि प्रभुं छित: बियादीगु फुक्क बचं पूरा याना: इस्राएलया जुजु यानादीबलय्,

31 छित: दोष मदुपिनिगु हि हाय्का: अले थ:त ब्वलासापिन्त बदला कया: धका: दु:ख जुया: सिति थथे याना: धायेमालि मखु। परमप्रभुं जिमि मालिकयात ता:लाकादीबलय् छसपोलया दासी जित: नं लुमंकादिसँ।”

32 अनलि दाऊदं अबीगेलयात धाल, “थौं जिनापं नापलायेत छित: छवयाहयादीम्ह परमप्रभु इस्राएलया परमेश्वरया महिमा जुइमा।

33 धन्य ख: छंगु बुद्धि, छ धन्यम्ह ख:, छायाधा:सा थौं छ जित: स्यायेगु व जिगु थ:गु ल्हातं बदला कायेगु दोषपाखें बचय् यानाबिल।

34 छायाधा:सा धात्थें छन्त स्यंकेगुपाखें बचय् यानादीम्ह परमप्रभु इस्राएलया परमेश्वर म्वा:म्ह ख: थें, जिं धाये, थथे छ जिनापं याकनं हे नापमला:गु जूसा नाबालया परिवारय् च्वपिं मिजंत छम्ह नं कन्हय् सुथ तक ल्यं दइ मखु।”

35 अनलि दाऊदं अबीगेलं वया निंति ह:गु कोस्यालि कया: थथे धाल, “याउँक छैं लिहां हूँ। जिं छंगु खँ न्यनागु दु अले छंगु बिन्ति स्वीकार यानागु दु।”

36 अबीगेल छैं ध्यना: वं अन नाबालं जुजुपिन्त नकेगु भव्य थें नयाच्वंगु खन। नाबाल लयताया: दाखमघ त्वना: तसकं काय्काच्वंगु दु। अथे जुया: वया कलातं वयात सुथ तक नं छुं मधासे च्वन।

37 सुथ न्हापां दाखमघं मकाःबलय् वया कलाः अबीगेलं फुक्क खँ कनाबिल, अले व ला छुं हे मचायाः त्वहं थें जुयाः सने मफयावन।

38 झिन्हु लिपातिनि परमप्रभुं वयात हयकयादिल अले व सित।

39 नाबाल सित धकाः दाऊदं न्यन अले धाल, “परमप्रभुया प्रशंसा जुइमा! जितः मभिंकाः हेस्याःगुलि वय्कलं वयात ब्वलासायादिल अले जितः मभिं यायेगुपाखें बचय् यानादिल। नाबालं याःगु मभिंगु ज्या परमप्रभुं वयागु हे छेनय् प्वंकादिल।”

अनंलि दाऊदं थः च्यःतपाखें अबीगेलयात थःनापं ब्याहा यायेगु निंति खबर छवल।

40 वया च्यःत कर्मेलय् अबीगेलयाथाय् वनाः थथे धाल, “छिं हाकनं ब्याहा यायेत दाऊदं जिमित छितः कायके छवयाहःगु खः।”

41 व जुस्क्क दन अले बैय् भ्वपुयाः थथे धाल, “जि वय्कःया दासी खः अले वय्कःया च्यःतयगु तुति तकं सिलेमासां नं सिले।”

42 अले व काचाकाचां तयार जुयाः थः न्याम्ह दासीतनापं गधा गयाः खबर हःपिं दाऊदया मनूतनापं वन, अले व दाऊदया कलाः जुल।

43 दाऊदं यिजरेल पाखेंयाम्ह अहीनोमनापं नं ब्याहा यात। थुपि निम्हं वया कलाः जुल।

44 उबलय् शाऊलं थः म्हाय् दाऊदया कलाः मीकलयात धाःसा गल्लीमया लेशया काय पल्लिएलयात बी धुंकूगु खः।

26

दाऊदं शाऊलयात हाकनं मस्यासे त्वःताब्यगु

1 जीपीतयसं गिबाय् शाऊलयाथाय् वनाः धाल, “दाऊद यशीमोनपाखे स्वःगु हकीलाया पहाडय् सुलाच्वंगु दु।”

2 अथे जुयाः स्वद्रुःति ल्ययातःपिं सिपाईत ज्वनाः दाऊदयात मालेत जीपया मरुभूमिपाखे क्वहां वन।

3 यशीमोनपाखे स्वःगु हकीलाया पहाडया क्वसं लँ लिक्क वं थःगु छाउनी तल। दाऊद अन मरुभूमिइ हे च्वन। शाऊल वयात मालेत मरुभूमिइ वयाच्वंगु दु धकाः न्यनेवं

4 दाऊदं चिवा कायेत मनूत छवत। अले शाऊल धातर्थे हे वये धुंकल धकाः सीकल।

5 दाऊद याकनं हे वनाः शाऊल व वया सेनापति नेरया काय् अबनेर घनाच्चंगु थाय् लुइकल। थः सिपाईतय् चाकःछिं छसिनिसैं मिलय् यानाः शाऊल दथुइलाक घनाच्चंगु खः।

6 दाऊदं हिन्ती अहीमेलिक व योआबया किजा सस्याहया काय् अबीशैपाखे स्वयाः धाल, “शाऊलया छाउनी दुने जिनापं सु वनेगु?”

अबीशैनं लिसः बिल, “जि वने।”

7 अथे जुयाः दाऊद व अबीशै चान्हय् छाउनी दुहां वन अले सिपाईतय् दथुइ शाऊलयात वया भाला छ्यंफुसय् बैय् तिनाः घनाच्चंगु खन। अबनेर व सिपाईत धाःसा शाऊलयात दथुइ तयाः चाकःछिं घनाच्चंगु खः।

8 अबीशैनं दाऊदयात धाल, “थौं छिकपिनि शत्रुयात परमेश्वरं छिगु ल्हातय् लःल्हानादीगु जुयाच्चन। जितः उजं बियादिसैं, भालां सुयाः छक्कलं हे वयात बैय् तियाबी। जिं निक्वः सुइ हे माली मखु।”

9 तर दाऊदं वयात धाल, “जुजुयात स्याये मते। परमप्रभुया अभिषेक जूहयसित ल्हाः ल्हंम्ह सु जक दोषी मजुगु दु?”

10 दाऊदं धाल, “धाथें परमप्रभु म्वाःम्ह खः थें, परमप्रभु थःम्ह हे वयात स्यानादी वा व थःगु कालं सी अथवा व लडाईं याः वनीबलय् सी।

11 तर जिं परमप्रभुया अभिषेक जूहयसिया विरोधय् गुबलें ल्हाः ल्हने म्वालेमा। झीसं वया छ्यं लिक्क दुगु भाला व आम्खुरा ज्वनाः वनेनु।”

12 अथे जुयाः दाऊदं शाऊलया छ्यंफुसय् च्वंगु भाला व आम्खुरा कयाः अबीशैनापं वन। छाउनी दुने घनाच्चपिं सुं नं सिपाईतय् न्ह्यलं मचाः अले सुनां खं नं मखं। परमप्रभुपाखें छवयाहःगु न्ह्यलय् इपिं घनाच्चंगु खः।

13 अले दाऊद तापाक्क मेखेपाखे च्वंगु पहाडया च्वकाय् दना च्वंवन। इमिगु दथुइ तसकं तापात।

14 अनंलि दाऊदं शाऊलया सिपाईतय् व नेरया काय् अबनेरयात तःसलं हालाः थथे धाल, “दना वा, अबनेर! छु छं जिगु सः ताःगु दु ला? जितः लिसः ब्यु।”

अबनेरं लिसः बिल, “जुजुयात ब्वःबीम्ह छ सु खः?”

15 दाऊदं अबनेरयात धाल, “अबनेर, छु छ तसकं बल्लाःम्ह मखु ला? छु इस्राएलय् छ थें ज्याःम्ह सु दु? अयनं छाय् छं थः प्रभु महाराजया रक्षा याये मफुत? सुं छम्ह सिपाईं छं मालिक छिमि जुजुयात स्यायेत वये धुंकल।

16 थ्व ला तसकं मजिल, धातर्थे परमप्रभु म्वा:म्ह खः थें, छिपिं स्यायेमा:पि हे खः, छायाधा:सा छिमिसं थः मालिक परमप्रभुया अभिषेक जूम्हयूसित रक्षा याये मफुत। स्वःसा वयागु छ्यंफुसय् च्वंगु भाला व लः त्वनेगु आम्बुरा गन वन?”

17 शाऊलं दाऊदया सः तायाः तःसलं थथे धाल, “छु छ हे खः ला जिमि काय् दाऊद?”

दाऊदं धाल, “खः, प्रभु जिमि जुजु, जि हे खः।

18 जिमि प्रभुनं वय्कःया दासयात छाया लितुलिनादीगु? जिं छु यानागु दु धकाः? छु मभिगु ज्या यानाः जि दोषी जुल?

19 हे प्रभु जिमि जुजु, जिं छु धायेत्यनागु दु बांलाक ध्यान बियाः न्यनादिसँ। थथे परमप्रभुं हे छितः जिगु विरोधय् याकेब्यगु खःसा जितः वय्कःयात छगू भेटी छायाके बियादिसँ सके वय्कःया मन हिलिला। तर छुं जुयाः थ्व मनूतय्सं याकगु जूसा इमित परमप्रभु सराः लायेमा। छायाधा:सा थौं ‘वं मेपिं घःतयगु सेवा यायेमा’ धकाः इमिसं जितः परमप्रभुया सर्वयपाखें लिकाःगु दु।

20 परमप्रभुया न्ह्यःने पाखें तापाक जितः स्याके बियादी मते छायाधा:सा छम्ह मनुखं पहाडय् चिखायात लिनाजगु थें इस्राएलयाम्ह जुजु छम्ह कुसियात मालेत झाःगु दु।”

21 अनलि शाऊलं लिसः बिल, “जिं पाप यानागु दु, लिहां वा! हे जिकाय् दाऊद, थौंया न्हिइ छं जिगु प्राण तसकं मू वंगु ताय्का जितः बचय् यात। आवलि जिं गुबलें नं छंगु हानि याये मखु। जि मूर्खम्ह खः, जि ठूकागु दु।”

22 दाऊदं लिसः बिल, “जुजुया भाला थन दु। छिकपिनि सुं छम्ह मनुखं वयाः व कयाः यंकेमा।

23 परमप्रभुं सकलें मनूतय्त वयागु धार्मिकता व विश्वास याये बहःया निंति सिरपाः बियादी। थौं परमप्रभुं छितः जिगु ल्हातय् बियादीगु दु तर जिं परमप्रभुया अभिषेक जूम्हयूसित ल्हाः ल्हने मखु धकाः छुं मयाना।

24 गथे जिं थौं छिगु प्राण तसकं मू वंगु ताय्का अथे हे परमप्रभुं नं जिगु प्राण तसकं मू वंगु ताय्केमा अले जितः फुक्क विपत्तिपाखें बचय् यानादीमा।”

25 अनलि शाऊलं दाऊदयात धाल, “हे जिमि काय् दाऊद, परमप्रभुं छन्त तःधंगु आशिष बियादीमा। छं याइगु न्ह्यागु ज्याय् नं ताःलायेमा।” अले दाऊद थःगु लैपुइ वन शाऊल धाःसा थःगु छें वन।

27

पलिशतीतयगु दथुइ दाऊद

1 दाऊदं थथे बिचाः यात, “छन्हू ला छन्हू शाऊलं जितः स्या हे स्याइतिनि। अथे जुयाः पलिशतीतयगु लागाय् बिस्सुं वनेगु हे जितः बांलाइ। अले शाऊलं जितः इस्राएलय् दक्व थासय् मालेगु त्वःती। थुकथं जि वयागु ल्हातं बचय् जुइ।”

2 अथे जुयाः दाऊद व वया खुसः मनूत माओकया काय् गातया जुजु आकीशयाथाय् वन।

3 दाऊदं थः मनूत व इमि परिवारत, थः निम्ह कलाः यिजरेली अहीनोम व कर्मेलयाम्ह सी धुकूमह नाबालया कलाः अबीगेलयात ज्वनाः आकीशनापं गातय् च्वनेत वन।

4 दाऊद गातय् बिस्सुं वन धकाः शाऊलयात कनाबिल, अले शाऊलं दाऊदयात मालेगु त्वःतल।

5 दाऊदं आकीशयात धाल, “छिसं थः दासयात यय्कागु दु धइगु खःसा छिगु देशय् जिपिं च्वनेत छगू शहर बियादिसैं। छाया जि छिकपिनि दास राजधानीइ छिनापं च्वनेगु?”

6 अथे जुयाः आकीशं उखुन्हू वयात सिक्लग शहर बिल। आः तक नं व यहदीतय् जुजुपिनिगु शहर खः।

7 दाऊद पलिशतीतयगु देशय् दच्छि व प्यला तक च्वन।

8 दाऊद व वया मनूत हमला याः वनीगु अले गशूरीत, गिज्जीत व अमालेकीतयत् लुतय् याइगु। इपिं न्हापांनिसैं हे शूर व मिश्रय् थयंकाच्चनाः च्वंपिं खः।

9 दाऊदं देय् लुतय् याइबलयु वं मिजं वा मिसा सुयातं म्वाका तइ मखु। अले वं फै-च्वलय् व सा-द्वहंत, गधा व ऊट व वसःत नं यंकाः आकीशया थासय् तुं लिहां वइगु खः।

10 आकीशं वयात थथे धकाः न्यनेगु, “थौं छं गन लुतय् यानाहया?” अले वं थथे धाइगु, “यहदाया नेगेव देशय्” वा “यरहमेलीतय्थाय् वा केनीतयगु नेगेव देशय्।”

11 दाऊदं म्वाःपिं सुं नं मिजं वा मिसात गातय् मह छायाधाःसा सुं मनूयात म्वाकातःसा वं आकीशयात जिं छु यात व कनाबी फु धकाः वं बिचाः यात। पलिशतीतनापं च्वनाच्वंतले वयागु पहःचहः थथे हे खः।

12 तर आकीशं दाऊदयात पत्याः यानाः थथे धाल, “व थः इस्राएली मनूतयगु न्ह्यःने तसकं मभिंम्ह जूगु दु, अथे जुयाः व जिवंकाःछि जिगु दास जुयाच्वनी।”

28

1 छुं ई लिपा पलिशतीतयूसं इस्राएलीतलिसें लडाईं यायेत थः सेनातयूत मुंकल। अले आकीशं दाऊदयात धाल, “छ व छिमि मनूत जिनापं लडाईंलय वनेमाः धकाः ला छं स्यू जुइमा।”

2 दाऊदं आकीशयात लिसः बिल, “बांलाक स्यू, छपिनि दासं छिगु निंति छु छु याये फु धइगु खँ छि थःमहं हे स्वयादी।”

अनंलि आकीशं दाऊदयात धाल, “जिं छन्त जिवंकाःछि जिम्ह बडीगार्ड यानातये।”

शाऊलं तन्त्रमन्त्र याइम्ह मिसालिसे सल्लाह काःगु

3 थुबलय् तक शमूएल सी धुंकूगु खः, अले सकलें इस्राएलीतयूसं वयागु निंति दुखं च्वनाः वया सीम्ह वयागु हे शहर रामाय् थुंगु खः। थुबलय् तक शाऊलं तन्त्रमन्त्र ज्या याइपि फुक्कसित इस्राएलं पितिनाछवये धुंकूगु खः।

4 पलिशतीतयूसं लडाईया निंति थः सिपाइँत मुंकाः शूनेमय् पाल ग्वल। शाऊलं नं फुक्क इस्राएलीतयूत मुंकाः गिल्बोय् पाल ग्वल।

5 अले शाऊल पलिशतीतयू सिपाइँत खनेवं तसकं ग्यात।

6 अले शाऊलं परमप्रभुयाके न्यन, “जिं छु यायेगु?” तर परमप्रभुं वयात नं म्हगसपाखें, नं “ऊरीमं” नं अगमवक्तातपाखें छुं नं लिसः बियादिल।

7 अथे जुयाः वं थः हाकिमतयूत धाल, “जिगु निंति छम्ह तन्त्रमन्त्र याइम्ह मिसा मा, अले जि वनाः व नापं न्यनेकने याये।”

वया हाकिमतयूसं लिसः बिल, “अज्याःम्ह मिसा छम्ह एन्दोरय् दु।”

8 अले शाऊलं सकसिनं पुनी थें ज्याःगु वसः पुनाः थः निम्ह मनूतनापं बहनी व मिसायात नापलायूत वन। अले वयात धाल, “प्रेत आत्मायात न्यनाः जिगु बारे धयाब्यु, अले जिं सुयागु नां कने वयात सःता ब्यु।”

9 तर व मिसां लिसः बिल, “शाऊल जुजुं छु याःगु दु व ला छिं सि हे स्यू जुइमाः। वं प्रेतया आत्माया ज्या याइपिन्त देशं पितिनाछवःगु दु। गुकिं यानाः जि सिनावनिमालि। छिं छाया जितः जाः तयाच्चवनादीयागु?”

10 शाऊलं पाफयाः धाल, “धात्थें परमप्रभुया म्वाःम्ह खः थें, अथे यानाः छंगु जीवनय् छुं नं विपत्ति वइ मखु।”

11 अनंलि व मिसां न्यन, “जिं सुयात सःतेगु लय?”

शाऊलं लिसः बिल, “शमूएलयात!”

12 शमूएल पिहां वंगु व मिसां खनाः पिच्यानाः हालाः शाऊलयात धाल, “छिं छाय् जितः छल यानाच्चवनागु? छि शाऊल जुजु हे खः।”

13 जुजुं वयात धाल, “ग्याये मते। छं छु खनागु दु?” व मिसां लिसः बिल, “बॅनं छम्ह प्रेत पिहां वयाच्चंगु खनागु दु।”

14 शाऊलं न्यन, “व गथे च्वं?” वं धाल,

“गां न्ययातःम्ह छम्ह बुराम्ह मनू बॅ च्वय् थहां वयाच्चंगु खना।”

अनंलि शाऊलं व शमूएल हे खः धकाः सिल। अले वयात भ्वसुलाः भागि यात।

15 शमूएलं शाऊलयात धाल, “छाय् छं जितः सःताः पंगः यानागु?”

शाऊलं लिसः बिल, “जि तसकं दुःखय् लाःगु दु। पलिशतीतयसं जितः हय्कयाच्चंगु दु। परमेश्वरं जितः त्वःतूगु दु। वय्कलं न अगमवत्तातपाखें न म्हगसपाखें हे जितः लिसः बियादीगु दु। अथे जुयाः जिं छु यायेमाली धकाः न्यनेत छन्त सःतागु खः।”

16 शमूएलं धाल, “परमप्रभुं छितः त्वःतूगु दु अले वय्कः छिगु विरोधी जुयादीगु दु धयागु खःसा छिं छाय् जितः न्यनेकने यानाच्चवनागु?

17 जिपाखें न्हापा हे धयादीगु खँ परमप्रभुं यानादीगु दु। वय्कलं छंगु ल्हातं राज्य लाकाः छिमि छम्ह जःलाखःला दाऊदयात बियादीगु दु।

18 छिं परमप्रभुया आज्ञा मानय् मयाः अले अमालेकीतय् विरोधय् परमप्रभुया तंयात पूर्वके मबिल। अथे जुयाः परमप्रभुं थौं छन्त थथे याःगु खः।

19 अय्जूगुलि छ व छिमि प्रजा इस्राएलीतयत् परमप्रभुं पलिशतीतयगु ल्हातय् बियादी। कन्हय् छ व छिमि काय्पिं जिनापं हे च्वनेगु जुइ। अले परमप्रभुं इस्राएलीतय् सिपाईतयत् पलिशतीतयगु ल्हातय् लःल्हानादी।”

20 शाऊल तसकं ग्यानाः बॅय् भ्वसू वन। व चच्छि न्हिच्छि छुं हे मनसे च्वनाच्चंगुलि थुकथं व तसकं बःमलात।

21 अनंलि व मिसा वयात तसकं दुःख जुयाच्चंगु खनाः धाल, “छिं धाःगु खँ छिकपिनि दासीं मानय् याये, अले जिं जिगु प्राण नं छिगु नितिं पाये धुन।

22 आः जिगु खँ न्यनादिसँ, छिगु यात्राया नितिं छि बल्लायेत छिकपिनि दासयात छुं नसा ज्वरय् यायेत उजं बियादिसँ।”

23 तर शाऊलं नसा नयेत मानय् मजुल।

अले वया मनूतयसं नं व मिसाया खँयात कयाः शाऊलयात नसा नयेत बिन्ति यात। अनंलि व मानय् जुल अले बॅय् नं दनाः खाताय् फ्यतूवन।

24 व मिसाया छैय् लहिनातःम्ह ल्हंम्ह द्रुहंचा स्यानाः छुं छुचुं न्हायाः सोडा मतःगु मरि दयकल।

25 वं शाऊल व वया मनूतयगु न्ह्यःने तथाहल। अले इमिसं व नल। व हे चान्हय् इपिं सकलें अनं बिदा कयाः वन।

29

पलिशतीतयसं दाऊदयात लितछवःगु

1 पलिशतीतयसं थःपिनिगु फुक्क सिपाईत लडाईया निति अपेकय् मुंकल, अले इस्राएलीत बुँगाःचाया लिक्क यिजरेलय् पाल ग्वल।

2 शासकतयसं सच्छि सच्छि व द्रुःछि द्रुःछिया इवः मिलय् यानाः थः सिपाईतयत् न्ह्यज्याकल। अले दाऊद व वया मनूत जुजु आकीशनापं ल्यूनेया इवल्य् च्वनाः न्ह्यज्यात।

3 तर पलिशतीतय हाकिमतयसं न्यन, “थुपि हिब्रत थन छु यायेत वयाच्चंगु?”

आकीशं लिसः बिल, “थ्व इस्राएलया जुजु शाऊलया सेवक दाऊद खः, व जिनापं दच्छि स्वयाः अप्वः च्वने धुकूम्ह खः। व जिनापं च्वंसांनिसें थौं तक जि वयाके छुं हे दोष खनागु मदु।”

4 तर पलिशतीतय सेनापतितयसं तसकं तंम्वयाः आकीश जुजुयात धाल, “व मनूयात छिं तथा तथागु शहरय् हे लित छवयादिसँ। व झीनापं लडाईलय् मवयेमा, मखुसा लडाई जुइबलय् व झीगु विरोधय् वनी। अले झी मनूतयत् स्यानाः वया थः मालिकपाखें स्याबास कायेगु थ्व थें ज्याःगु बांलाःगु मौका मेगु छु दइ?

5 छु थ्व व हे दाऊद मखु ला, इमिसं वया बारे थथे धकाः म्ये हालाः प्याखं ल्हगु खः,

“ ‘शाऊलं ला द्रुलंदःयात नाश यात,

अले दाऊदं ला लखं लखयात स्यात।’ ”

6 अनंलि आकीशं दाऊदयात सःतके छवत अले धाल, “धात्थें परमप्रभु म्वाःम्ह खः थें, छ तसकं पक्काम्ह मनू खः, अले जिगु सेनाय् छं याःगु ज्या खनाः जि तसकं लयताः। छ जिथाय् वसांनिसें जिं छंके छुं दोष लुइकागु मदु तर मेपि शासकतयसं छन्त पत्याः मयाः।

7 अथे जुयाः छ याउँक छै हूँ, अले इमिसं मभिं ताय्कूगु छुं ज्याखँ छंगुपाखें मजुइमा।”

8 दाऊदं आकीशयात धाल, “छपिनि दासं छु या:गु दु? छपिनि दासं छिगु सेवा यानाबलयनिसें थौं तक छिं जिके छुं दोष लुइकागु दु ला, मखुसा, जिं जिमि महाराजया शत्रुतयगु विरोधय् छाया लडाईं या: वने मदुगु?”

9 आकीशं लिस: बिल, “छ जिगु निति परमेश्वरया दूत थें जूगु दु धका: जिं पत्या: यानागु दु, तर छ इपिं नापं लडाईं या: वने मज्यू धका: पलिशतीतय् सेनापतितय्सं जिद्दी या:गु दु।

10 अयजूगुलि कन्हय् सुथ न्हापां हे दना: छनापां व:पिं मनूतनापां तयुज: वयेवं थनं याकनं हूँ।”

11 अथे जुया: सुथ न्हापां हे दाऊद व वया मनूत पलिशतीतयगु देशपाखे लिहां वन। पलिशतीत धा:सा च्वय् यिजरेलपाखे वन।

30

दाऊदं थ: सिपाइँतय् परिवारयात बचय् या:गु

1 स्वन्हु खुन्हु दाऊद व वया मनूत सिक्लगय् थ्यंक: वल। उगु इलय् अमालेकीतय्सं नेगेव व सिक्लगय् लुतय् याये धुंकूगु व सिक्लगय् हमला याना: मि छवयकाब्यूगु इमिसं खन।

2 इमिसं अन दुपिं मिसात व मस्त सकसितं मस्यासे ज्वना यंकूगु ख:।

3 अनंलि दाऊद व वया मनूत सिक्लग थ्यंवलय् इमिसं व शहर नाश जूगु व इमि मिसात व मस्त सकसितं यंकेधुंकूगु खन।

4 अले इपिं तसकं ख्वल। थुलि अप्व: ख्वल कि इमिके शक्ति हे मदयावन।

5 दाऊदया निम्ह कला:, यिजरेल पाखेंयाम्ह अहीनोम व कर्मेलयाम्ह सी धुंकूम्ह नाबालया कला: अबीगेलयात ज्वना यंकूगु ख:।

6 अनंलि थथ:पिनि कायम्ह्याय् व ज्वनायंकूगुलि दाऊदया मनूतय्सं तं पिकया: दाऊदयात ल्वहंत कय्केगु ख्याच्व: बिल। अले दाऊदयात वयाये थ्वयाये मन्त। तर परमप्रभु थ: परमेश्वरपाखें जक दाऊदयात बल दत।

7 दाऊदं अहीमिलेकया काय् पुजाहारी अबियाथारयात धाल, “पुजाहारीया भिंगु सूती काप:या लं जिथाय् हजि।” अले अबियाथारं व हयाबिल।

8 अनंलि दाऊदं परमप्रभुयाके न्यन, “छु जि उपिं लुतय् याइपिं मनूतय् ल्यूल्स वने ला? छु जि इमित नापलाके फइ ला?”

परमप्रभुं वयात लिसः बिल, “ज्यू, छं इमित ल्यू हूँ, छं इमित नापालाकाः फुक्क ज्वनायंकूपिन्त छुतय् याना हजि।”

9 अथे जुयाः दाऊद व वया खुसः मनूत अनं न्यासि वनाः बसोरया खुसिचाय् थ्यंकल, गुलि मनूत अन हे च्वन,

10 छायाधाःस निसः मनूत त्यानुचाया खुसि छीमफुगु खः। दाऊद व वया प्यसः मनूत धाःसा दिपाः हे मकासे इमित ल्यू तुं वन।

11 अले इमिसं ख्यलय् छम्ह मिश्रीयात नापलात अले वयात दाऊदयाथाय् हल। वयात इमिसं नयेत छुं नसा व त्वनेत लः बिल।

12 इमिसं वयात गंगु नेभारा व निगू झुप्पा किसमिस बिल। उपिं नये धुंकाः वयाके बल वल छायाधाःसा वया नयेत्वने मखंगु स्वन्हु स्वचा दये धुंकूगु खः।

13 दाऊदं वयाके न्यन, “छ सुयापाखेंम्ह खः? अले छ गनं वयाम्ह खः?”

वं लिसः बिल, “जि छम्ह मिश्री खः, अमालेकीतय् छम्ह दास खः। तर जि स्वन्हु न्हापा म्हां मफुगुलि जिमि मालिकं जितः त्वःता वंगु खः।

14 जिमिसं करेतीतय्गु नेगेव, यहदाया छुं थासय् व कालेबया नेगेवय् लुतय् यानाः अले सिक्लगायात मि छवयेका बिया।”

15 दाऊदं धाल, “छु छं जितः इमिथाय् ब्वनायंके फु ला?”

वं धाल, “छिं जितः स्याये मखु अले जिमि मालिकया ल्हातय् लःल्हाये मखु धकाः परमेश्वरया न्ह्यःने पाफयाः धयादिसँ। अले तिनि जिं छितः लँ क्यनाः इमिथाय् थ्यंकाबी।”

16 अले वं लँ क्यँक्यं दाऊदयात इमिथाय् ब्वना यंकल। अन अमालेकीत प्यखेरं छ्यालब्याल जुयाः नयेत्वने यानाच्वन। अले पलिशतीतय्गु व यहदातय्गु लागां लुतय् यानाहःगु मालताल टुंचिंकाः लयतायाच्वन।

17 तर दाऊदं इमित हमला यात अले कन्हय् खुन्हु सन्ध्याकाः इलय् तक हे लडाईं यानाच्वन। इपिं मध्ये प्यसःम्ह ल्याय्म्हपिं जक ऊँट गयाः बिस्सुं वन।

18 दाऊदं थः निम्ह कलाःपिं नापं अमालेकीतय्सं यंकूगु सकलें मनूत व फुक्कं वस्तुतय् छुतय् याना हल।

19 इमिसं लाकायंकूगु फुक्क सामान, कायम्ह्याय्पिं व इमि थःगु नितिं यंकूगु सामान नापं फुक्कं दाऊदं लितः हल। छुं नं त्वःमप्प्यू।

20 दाऊदं कै-च्वलय्, सा द्रहंया बथां नापं लितः हल अले वया मनूतय्सं उपिं बस्तुतय् बथांयात ख्याख्यां थथे धाधां यंकल, “थुपिं दाऊदं लाकाहःपिं खः।”

21 अले दाऊद बसोरया खुसि लिक्क व नापं थांवने मफया च्वनाच्वंपिं उपि निसः मनूतयथाय् थ्यंकः वल। इपिं दाऊद अले व नापं दुपिं मनूतयत् नापलायत् वल। दाऊद तसकं लयतातां इपिं सकसित ज्वजलपा यात।

22 तर दाऊदनापं वंपिं गुलिखय् लुच्चापिं व खलबल याइपिं मनूतयसं वयात थथे धकाः मभिकल, “थुपिं मनूत इनीनापं वःगु मदु। इनीसं लिफ्याना हयागु मालताल जिमिसं इमित छुं नं बी मखु। इमिसं थथःम्ह कलाः व कायम्ह्याय् जक यंकीमा।”

23 दाऊदं लिसः बिल, “अथे मखु, दाजुकिजापिं! परमप्रभु हे इनीत रक्षा यानादिल अले इनी शत्रुतयत् इनीगु ल्हातय् बियादिल। परमप्रभुं बियादीगु मालतालयात इनीसं अथे याये मज्यू।

24 छिमिसं धाःगु खँय् सुं नं राजी जुइ फइ मखु। इनीगु मालताल स्वयेत च्वनाच्वंपिन्सं नं लडाइँलय् वंपिनि ति हे ज्वलिज्वः ब्वति दयेमाः।”

25 उखुन्हुनिसें थौं तक नं दाऊदं ब्यूगु थ्व हे नियम इस्राएलीतय्सं मानय् यानाः वयाच्वंगु दु।

26 दाऊद सिक्लगय् थ्यंकः वये धुंकाः वं लिफ्याना हःगु मालताल थः पासापिन्त, यहदाया थकालितयत् थथे धयाः बियाछवत, “परमप्रभुया शत्रुतयपाखे लिफ्याना हयागु मालताल थुपिं छिकपिनिगु निंति कोस्यालिकथं बियागु दु।”

27 थुकथं दाऊदं बेथेलय्, रामोत-नेगेवय्, यत्तीरय्,

28 अरोएरय्, सिपमोतय्, एश्तमोय्,

29 राकालय् दुपिन्त, यरहमेली व केनीया शहरय् च्वंपिन्थाय्,

30 होर्माय्, बोर-आशानय्, अन्ताकय्,

31 हेब्रोनय् च्वंपिन्थाय् अले दाऊद व वया मनूत वंगु थासय् च्वंपिन्थाय् कोस्यालि छवत।

31

शाऊल व वया काय्पिं सीगु

1 पलिशतीतय्सं इस्राएलीत नापं लडाइँ यात। अले इस्राएलीत इमिगु न्ह्यः नं बिस्सुं वन। यक्व इस्राएलीतयत् गिल्बो डाँडाय् स्यात।

2 पलिशतीतय्सं शाऊल व वया काय्पिन्त लिनुलित, अले वया स्वम्ह काय्पिं जोनाथन, अबीनादाब व मल्कीशूअयात स्यानाबिल।

3 शाऊलया प्यखेरं लडाइँ जुयाच्वंगु खः। अले धनुष वाण चले याःम्ह वया शत्रुं वयात तसकं धाःपाः यात।

4 अनंलि शाऊलं थःगु निंतिं ल्वाभः ज्वनीम्हयसित धाल, “छंगु दापय तरवार लिकयाः जितः सुयाब्बु अले थुपिं म्हय् चिं मतःपिं मभिंपिन्सं निन्दा यानाः जिगु बेज्जत मयायेमा।”

तर व ल्वाभः ज्वनीम्ह तसकं ग्यानाः मानय् मजुल। वं अथे यायेगु आँट मयाः। अथे जुयाः शाऊलं थःगु तरवार काल अले उकिं सुयाः व सित।

5 शाऊल सीगु वया ल्वाभः ज्वनीम्ह ल्यायम्ह मनुखं खनाः व नं शाऊलनापं तुं थःगु हे तरवारं सुयाः सित।

6 थुकथं शाऊल व वया स्वम्हं काय्पिं व वया ल्वाभः ज्वनीम्ह ल्यायम्हम्ह सित। उखुन्हु हे शाऊलया फुक्कं मनूत सित।

7 अले यिजरेलया ब्यासि व यर्दनया उखे च्वंपिं फुक्क इस्त्राएलीतय्सं मेपिं इस्त्राएलीत बिस्सुं वंगु अले शाऊल व वया स्वम्हं काय्पिं सीगु खनाः इपिं नं थथःगु शहर त्वःताः बिस्सुं वन। अले पलिशतीतय्सं अन वनाः उपिं शहरत कब्जा यात।

8 लडाईं जूगु कन्हय् खुन्हु पलिशतीत उपिं सीम्हय् च्वंगु वस्तुत कायत वल अले इमिसं गिल्बो पहाडय् शाऊल व वया स्वम्हं काय्पिं सिनाच्चंगु लुइकल।

9 इमिसं शाऊलया छ्यं ध्यनाः अले वयागु फुक्क ल्वाभः नं यंकल। अनंलि इमिसं थःगु देशया छचाःखेरं थ्व बुखँ इमि घःतयगु देगलय् व फुक्क मनूतयथाय् धायकेत मनूत छवत

10 इमिसं शाऊलया ल्वाभः अशतोरेत घःमय्जुया देगलय् तये यंकल, व वयागु सीम्ह बेथ-शानया पःखालय् नकिं तानाः यख्खायाबिल (१ इतिहास १०:१०)।

11 पलिशतीतय्सं शाऊलया सीम्हयात छु छु याःगु खः याबेश-गिलादया मनूतय्सं न्यन।

12 अले इमि तसकं बल्लाःपिं मनूत चच्छि न्यासि वनाः शाऊल व वया कायपिनिगु सीम्ह बेथ-शानया पःखलं लिकयाः याबेशय् हल अले उपिं सीम्हत छवयकाछवत।

13 अनंलि इमिसं उपिं क्वयँत लिकयाः याबेशया तितिसिमाया क्वसं तुं थुनाबिल अले इपिं न्हयन्हु तक दुखं च्वं।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7